

## Tanaro karatamuai mabu

### *Godi ro imese namabu patu gisioidiro*

<sup>1</sup> Godi nou na-imidirotiti keba ia keba ia tau ato nedi moro ro nou tato ie. Imese namabu sirio nou ro gisioidiro.

<sup>2</sup> Keba se obo damo ro imidirotiti duwoduwo ato, goto obo ro ta-gahidimai. Goto mea sosoro ereredeadea pua. Godi nou simara huhuame ro goworohuti obo ohu ato.

<sup>3</sup> Keba saiki ato Godi ro nou gisioidiro. Godi ro iato gutura, 'Woroworo mereredeadea!'

<sup>4</sup> Woroworo iato aise gereredeadea. Woroworo Godi ro na-gowea, nou kamade aise goi. Iato nou ro woroworo ra duwoduwo ra aise gihodowa-ma.

<sup>5</sup> Woroworo nou ro saiki to gapoi, duwoduwo nou ro duwo to gapoi. Taie, duwo na-garagare iato kowaroho ro gereredeadea.

<sup>6</sup> Ina ata saiki ato Godi ro nou gisioidiro, ina nou ro iato gutura, 'Ata nakomu modoro-ro obo apepea ri.'

<sup>7</sup> Turi bobo iato gereredeadea obo iato gapepea, sapuwo obo ohu ato gowamo, sapuwo obo sopu ato gowamo.

<sup>8</sup> Turi bobo ohu ato Godi ro toboro to gapoi. Taie, duwo na-garagare, iato kowaroho ro gereredeadea.

<sup>9</sup> Ina ata saiki ato Godi ro nou gisioidiro, nou iato gutura, 'Maumo obo maradabuti kaupoti

moro to, goto kereredea sapuwo to.' Taie, aise gororosioihiro.

<sup>10</sup> Goto Godi ro duriomoro to gapoi, obo nou ro buru oromo to gapoi. Iato nou na-giraroweauti, kamade aise goi.

<sup>11</sup> Ina nou iato gutura, 'Ota daro sugamuso simara iopu mutu mosuwoduti-mo!'

<sup>12</sup> Taie erere ota aise gosuwoduti-rimo simara iopu mutu. Nou na-giraroweauti, nou kamade aise goi.

<sup>13</sup> Taie, duwo na-garagare iato kowaroho ro gereredea.

<sup>14-15</sup> Ina Godi ro nou gisioihiro, nou ro iato gutura, 'Ohu ato pina mereredea-mo, saiki ato imewiti na ina duwo ato imewiti na duriomoro woroworo sapuwo to. Nedi pina ro amadimi-imewiautiti-ri urubia umoro sapuwo to amia saiki na-woroporeai-dumo ina amia saiki kitamuai, tanaro ibo amadimo-ororosioihiro-ri.' Taie ibose aise gororosioihiro-rimo.

<sup>16</sup> Godi ro ibo gisioihiro-ma saiki ra sogomi ra, saiki ato daro duwo ato imewiti na ie, ibose kiboni iato gisioihiro.

<sup>17</sup> Godi ro a-giedea nedi pina ro toboro ato duriomoro kemewiti sapuwo to,

<sup>18</sup> nou ro saiki na-gedea saiki ato imewiti na ie, sogomi ra kiboni ra duwo ato imewiti na ie. Nou na-giraroweauti, nou kamade aise goi.

<sup>19</sup> Taie, duwo na-garagare, kowaroho ro gereredea.

<sup>20</sup> Ina ata saiki ato Godi ro nou gisioihiro. Nou ro iato gutura, 'Obo ato koroho namabu imese

mororosioi diro-mo, ina pawa  
morowadau diro-mo duriomoro ohu ato.'

<sup>21</sup> Nou ro ibose to gisioi diro imese sirio  
keremiro namabu, idaibo awawo, kainakaina,  
obo maumo ato na-oroho-dumo, imese sirio  
tamu ra mutu namabu nou ro gisioi diro. Nou  
na-giraroweauti, kamade aise goi.

<sup>22</sup> Godi ro korosa iato gimia ibo 'Imese  
namabu obo ato na-oroho-dumo, tamu mutu  
namabu duriomoro ohu ato na-oroho-dumo  
ba-dararasomai-mo sirio ba-doi-mo obo ato ina  
duriomoro ato.'

<sup>23</sup> Taie, duwo na-garagare, iato kowaroho ro  
gereredeadea.

<sup>24</sup> Ina ata saiki ato nou ro nou gisioi diro. Nou  
iato gutura, 'Goto ato koroho erere namabu  
mororosioi diro-mo, serawo namabu, serawo  
tato namabu, kainakaina, awawo, ina  
ba-darasomai-mo atu sosoro.' Iato aise  
gororosioi diro-rimo.

<sup>25</sup> Godi ro ibo gisioi diro serawo namabu,  
serawo tato namabu, kainakaina awawo neio  
kararasomai sapuwo to. Nou na-giraroweauti,  
kamade aise goi.

<sup>26</sup> Ina Godi iato gutura, 'Urubia  
misioidiro-birimo neibi ia sosoro, neio ro  
amadimi-iauri-ri nakere, pawa, serawo tato  
namabu, kainakaina namabu, awawo namabu  
daro imese duriomoro.'

<sup>27</sup> Godi ro ibo gisioi diro urubia nou ia sosoro,  
upi dubu.

<sup>28</sup> Godi ro korosa iato gimia ibo,  
'Ba-dararasomai-mo sirio ba-doi-mo imese  
duriomoro ato, iato ba-dirahidimai-mo. Nakere,

pawa, imese sirio keremiro namabu goto ato na-woroho-dumo nio ro ba-demeauri-rimo.'

<sup>29</sup> Ina Godi ro urubia aboto ibo, 'Nio mo ro ta-nimesioidiro imese ota iopu sirio ina sugamuso rudo na-wosuduti-dumo iopu sirio idaibo kono araiso kiho sapuwo to, ba-diho-mo!

<sup>30</sup> Imese goto ato koroho namabu pawa mutu neio ro kiho sapuwo to, mo ro gigasi puara ta-nimesioidiro.' Ina ibose aise gororosoidiro-rimo,

<sup>31</sup> Godi iato na-giraroweauti nou ro kisioidiro namabu na-giwia, nou auna kamade goi.

Taie 6 saiki na-goroporeai-rimo,

## 2

<sup>1</sup> nou ro nou gisioidiro idaibo toboro duriomoro imese namabu sirio ibo gisioidiro, taie aise giporeai.

<sup>2</sup> Duwo na-garagare, ata kowaroho na-gowaroho nou a-gomidiro, ata nakomu ata nou ro osioidiro pua.

<sup>3</sup> Iedi saiki ro Godi ro korosa nato gomia ina tarena to gapoi, mabu nedi saiki ro nou nato gomidiro namabu na-giporeai.

<sup>4</sup> Imese sirio namabu patu nou ro na-gisioidiro nou totomu e. Taie.

*Iawe Godi ro keba urubia beda sosoro gisioidiro*

Iawe Godi ro duriomoro toboro imese namabu sirio na-gisioidiro,

<sup>5</sup> ota sugamuso mutu osuwoduti pua goto rido. Goto ia se gowamo daroho nou ro emeiriai pua nedi goto ro nouto, ata dubu tato ie goto odi na.

<sup>6</sup> Obo abere madawa sosoro maumo rido na-wiouriotiti-ro duriomoro papamo nou ro owaititi.

<sup>7</sup> Iawe Godi ro goto na-gaudai urubia dubu nouto gosioihiro. Nou ro huhuame punugo goro rido iato gemuhudurai. Taie nou keremiro dubu to aise gararapoi.

<sup>8</sup> Duriomoro masiro Ideni saiki boido idiawado-die, Iawe Godi ro pari nato gosioihiro. Nou ro urubia dubu na-gosioihiro ina iato gowomi iedi pari ro nou ato.

<sup>9</sup> Iawe Godi ro ota ta-gibouti, ina meamea ota iopu iato gisuwoduti-rimo ihona.

Pari turi ato Iawe Godi ro ta-garo ata ota, nedi ota iopu ro keremiro imio nari kiho ato, ibose ata ota ta-garo, nedi ota iopu ro umoro kimio sapuwo to kiho ato, mea na nou beda sosoro ra, ubauba beda sosoro ra.

<sup>10</sup> Gowu obo owahautiti-ro Ideni pari ato pari namabu nou ro iwaititi pupuwo kisuwoduti sapuwo to. Nodi gowu ro noudo Ideni pari na-gorohodorai 4 oromo nato giwameuti.

<sup>11</sup> Keba oromo masiro Pisoni, Habira duriomoro nou ro gemowagegediro-ro iato edi moro ro nato meamea gorodi tiamo.

<sup>12</sup> Iedi gorodi ro meamea agoago nadi sosoro ie. Ina mea nibo dehoru iato tiamo, ibose auna wisa nadi onikisi iato tiamo.

<sup>13</sup> Ata oromo masiro Gihoni, Kusi duriomoro nou ro gemowagegediro.

<sup>14</sup> Ata oromo masiro Tigrisi, Asiria duriomoro rudo ororuwtiti-die saiki boido idiawado-die, ata oromo masiro owamo ibo Iupereitisi.

<sup>15</sup> Urubia dubu Iawe Godi ro a-gowomi Ideni ato iedi pari ro mea mino to iauri ri.

<sup>16</sup> Iawe Godi ro umoro owera iato garo urubia dubu aboto, 'Ba-dihotiti beda mutu ota iopu ra na-orowotoi pari ato,

<sup>17</sup> kaupoti oro umoro komia ota iopu meana ra ubauba ra sapuwo to oro ro ouho ate! Oro ro nama-ouho-ri oro ama-araburai-ri!'

<sup>18</sup> Iawe Godi nou na-gimaragoidiro urubia dubu nou ro na-gosiodiro, nou ro ibo, 'Nou nakara se komidiro modobo pua. Mo ro komidiro boinana anama-emesiodiro-ri, nou mea se kowarebai sapuwo to.'

<sup>19</sup> Taie, nou ro iato ta-gisiodiro amia namabu sirio idaibo pawa, ina tumu namabu mutu. Nou ro iato gemowawuti urubia dubu, nou ro masiro imio ri. Taie, urubia dubu ro iato giasoro masiro to.

<sup>20</sup> Nimo abora nouto niasoro-dumo nou ro kimio masiro to. Nou na-gimaragoidiro nou mea se kowarebai boinana pоторо ie.

<sup>21</sup> Taie, Iawe Godi ro urubia dubu maumo norou iato gowotodai. Nou maumo norou korobu maumo ato dadaru iopu nato gowagare-ro ina takamai iato gematorai,

<sup>22</sup> urubia orobo neito gosiodiro.

Nou ro kosiodiro na-goporeai nou ro aise gemowawea urubia dubu. Orobo urubia dubu ro na-gowea, nou kamade aise goi.

<sup>23</sup> Nou ro ibo, 'Nou e! Nou mo boinana ie, nou mo aboudo osiodiro, mo sosoro ie, ina nou rie mo ro orobo to kapoi.'

<sup>24</sup> Taie, nou rie nimo abora nou nemodohodai-dumo mere ro orobo na-wedea

nou simara mamu ra abera ra kimeserai-ma ie  
nou orobo mutu karadabuai ie neitiro kaupoti  
aise koi ie.

<sup>25</sup> Dubu ra orobo ra neitiro porose se  
wimidiro-do, neitiro siripo tato ie.

### 3

#### *Ubauba bida sosoro godoro-ro urubia aboto*

<sup>1</sup> Iawe Godi ro imese tumu namabu patu  
gisioidiro, kaupoti bagawe nou auna  
karasaubuti ie. Taie, iato bagawe ro urubia  
orobo aboto ibo, 'Godi ro morobise a-gutura ra  
nitiro aboto ota iopu iho ate na-worowotoi nedi  
pari ro nato?'

<sup>2</sup> Bagawe iato gemowameai orobo ro, 'Godi ro  
ta-nimapoi-ma imese ota iopu iho ri,

<sup>3</sup> kaupoti nou ro a-gutura ibo, "Nitiro ro ouho  
ate odio ota iopu ro na-wotoi pari turi ato, ina  
owasomai ate mabu nitiro pamo  
amado-owea-ri." '

<sup>4</sup> Bagawe ro iato gutura iedi orobo ro nou  
aboto, 'Karasaubuti owera ie! Nitiro  
orowaburai-ri pua.

<sup>5</sup> Godi umoro ie oro ro ota iopu nama-ouho-ri,  
iedi ota ro noudo oro umoro ama-iamotiti-ri  
meana ra ubauba ra, oro Godi sosoro  
ama-imidiro-ri!'

<sup>6</sup> Ota orobo ro na-giauri meana ia se gotoi, ina  
ota iopu nou ro na-giauri giropu se giauri  
na-gorowotoi kiho aboto, ina nou kimaragoidiro  
to, 'Mo ro nama-ouho-ri, mo kimaragoidiro mea  
se ama-iamo-ri eputa ato.'

Taie, nou ro ota iopu na-godohai-ro iato gouho, sapuwo uramu gomia ina nou ro aise gouho.

<sup>7</sup> Neitiro ota iopu kiho na-giporeai-rido, iato neitiro umoro nato goi-rido neitiro porose se na-gotoi-rido, iato neitiro ro awawo puara na-gidabuti-rido ina iato giwaruwoidiro-rido, taie aise giroiti-rido.

<sup>8</sup> Adimo sapuwo to Iawe Godi koroho diamo na-girorowai-rido pari ato, iato neitiro aise goropirua-rido ota mabu to.

<sup>9</sup> Iawe Godi ro iato gorumai, 'Urubia dubu, oro boira?'

<sup>10</sup> Urubia dubu ro ibo 'Mo nou e, oro ta-nemororowai sairo diamo mo tere ri nou ri noropirowa-die oro aboudo, mabu mo porose se ie.'

<sup>11</sup> 'Umoro bida sosoro to oi porose se? Mo ro ta-nemowapotai oro, nedi ota iopu ro oro ro ouho ate. Mo sabi oro ro ta-wesebea.'

<sup>12</sup> 'Odio orobo ro oro ro na-gowomi mo abato, nou ro odohai-die ota iopu, mo nou ro nomia-die ina mo ro nato nouho.'

<sup>13</sup> Ina Iawe Godi ro ibo orobo aboto, 'Oro ro otou ri osioidiro?'

Orobo ro ibo, 'Mo bagawe ro nasaubuti, mo ro ouho ri.'

<sup>14</sup> Ina Iawe Godi ro a-gutura bagawe aboto, 'Oro ro gosioidiro nedi tanaro ro. Oro mo ro ubauba anama-iwai-ri ibo oro sirio sairo ra tu ra to koroho namabu patu neio ro amadimo-otuti-ri, oro nakara se niro to ama-iromudodiroititi-ri, eputa ama-oworohuti-ri



goto momoso maumo ato, nedi momoso ro nou ama-ihotiti-ri.

<sup>15</sup> Oro urubia orobo mutu amadi-irohoiotiti-ri. Oro aramio urubia orobo aramio mutu neio amadimi-irorohoiotiti-ri. Urubia mere ro oro ama-adotiti-ri eputa ato, ina oro ro ama-iagege-ri obonupu ato. Nou se ie.'

<sup>16</sup> Ina Godi ro orobo aboto iato gutura ibo, 'Oro niro mutu komidiro ato, oro temeteme ama-iauri-ri, ibose kirotuti ato, auna ia temeteme ama-iwaibia-ri. Oro ubi ie uramu oro ro kiauri, kaupoti oro uramu ro ama-adohotiti-ri. Nou se ie.'

<sup>17</sup> Godi uramu aboto iato gerewesegerai nou ro ibo nou aboto, 'Oro a-nomia auna woko nou ama-isioidirotiti-ri temeteme mutu mibo mutu, goto ubauba ta-nowai mabu oro orobo owera girorowai ina iato gosioidiro. Mo ro edio sabi ro na-nemedeia ota iopu sapuwo to oro ro imaragoidiro pua. Oro ohona ama-iosoratiti-ri kahanekahane sebesebe mutu.

<sup>18</sup> Amia pari namabu ubauba se amadimi-isuwoduti-ri oro ro kiho aboto, ina sugamuso kumabo ununu ota neio amadimi-isuwoduti-ri,

<sup>19</sup> oro keremiro neito ama-owaboi-ri bagea ohona kiho. Oro goto to ama-orowameai-ri mo ro boido nosioidiro. Nou se ie.'

<sup>20</sup> Urubia dubu nou masiro Adam. Adam ro orobo masiro a-gomia Ibi, ibo owamo Keremiro, nou imese urubia mamu e.

<sup>21</sup> Iawe Godi ro uramu ra orobo ra turumau sosoro takamai nou giwori-ma.

<sup>22</sup> Neitiro nou ro na-giauri-ma nou ia sosoro ie, nou ro ibo, 'Neitiro umoro ta-woi-do meana

ra ubauba ra sapuwo to. Neitiro modobo pua iedi keremiro ota iopu ro ina kouho aboto, mabu neitiro umoro ta-woi-do ubauba ra meana ra. Nedi ota iopu ro neitiro ro namado-ouho-ri, neitiro orowaburai-ri pua.'

<sup>23</sup> Taie, nou ro ibo uramu ato, 'Oro ro ama-isioidiro-ri awawo woko idaibo namabu kibouti, ina ohona kiosora.'

Ina neitiro ro Godi sabi ower a-gesebea-rido ota iopu neitiro ro na-gouho-rido, ina Godi ro noudo giwagare-ma iedi mea duriomoro ro neido. Neitiro imese gou-rido Ideni rudo.

<sup>24</sup> Ina lawe Godi ro saiki boido idiawado-die pupuwo ia urio iato giwotobowa, neitiro nouto giwasiai-ma, ito korowameai modobo pua. Iato nou ro a-gedea giri era sosoro irewaretiti sapusapuwo, keremiro ota gabo kowasiai aboto.

## 4

### *Keina ro Eiboro gesuai*

<sup>1</sup> Uramu ra orobo ra Ideni pari rudo na-garagare-rido, a-wimidiro-do womu tato orobo niro ti-gowea, taie na-goroto dubu mere ie. Ina Ibi ro masiro a-giduti Keina. Nou ro ibo, 'Iawe korowarebai ato mo ro dubu mere ta-noroto, nou masiro Keina.'

<sup>2</sup> Ina ibo gomidiro-rido, ata mere ti-gowea-rido, nou masiro Eiboro. Neitiro edio tau ro nato auna ta-goi-rido. Eiboro nou sipisipi kimowotoi dubu e, Keina nou pari kisioidiro dubu e.

<sup>3</sup> Saro rudo Keina ro amia pari ohona na-giwou lawe aboto iaiwai ri,

<sup>4</sup> Eiboro ibose ti-gowou keba koroto sipisipi dao gebari kasawi mutu Iawe aboto iaiwai ri, iato neitiro Iawe aise gemowabu-rido. Iawe auna se a-gimaragoidiro Eiboro aboto nou sipisipi dao mutu,

<sup>5</sup> Keina iedi pari ohona ro nou mutu Godi auna se imaragoidiro pua. Saro rudo Keina nou sosoro woidomari ubauba ta-goi-rimo, punugo ta-garauduti serawo ri.

<sup>6</sup> Iawe ro a-gutura Keina aboto, 'Oro etou serawo ri ra, etou ri irarowo ubauba idomari to.

<sup>7</sup> Oro ro meana kosioidiro ato, oro mo do ie, kaupoti oro ubauba kimaragoidiro na-iamo eputa ato, oro ro kemowabeouti modobo ie, ibo kutura, "Marasio!" '

<sup>8</sup> Keina ro iato gutura neama aboto, 'Dou-ro neitiro iodori-ma rie gawagogo to.' Iato neitiro imese giodori-ma gawagogo to. Taie, Keina na-gapimaidiro neama Eiboro aboto nou ro aise gopia.

<sup>9</sup> Iato Iawe ro ibo, 'Keina, oro neama boira?'

Keina ro iato gutura, 'O, mo umoro pua, mo woko pua nou kiauri.'

<sup>10</sup> Iawe ro a-gutura, 'Oro ro etou ri opia? Goto ato oro neama karima tiamo. Karima ro aro-die mo aboto, "Mo naramu ro nesuai."

<sup>11-12</sup> Goto oro neama karima ro ta-worobai, nou rie odio goto ro pari namabu mea se isuwoduti-ri pua oro ro kibouti ato. Oro koroho kawa ama-irohotiti-ri ata moro to kou, ina ata moro to kou.'

<sup>13</sup> Keina ro a-gutura, 'Iawe, nedi tanaro ro imese koko ia ie mo aboto.

<sup>14</sup> Mo pari kisioidiro woko aboudo oro ro a-nowatateai-die, ina ibose mo oro aboudo a-nowatateai-die. Mo koroho kawa anama-irohotiti-ri, ata moro to ina ata moro to. Mo etu ro koweia ra, nou ro mo kopia ie.'

<sup>15</sup> Iawe ro ibo Keina aboto, 'Ibo pua! Oro etu ro kopia ra, 7 tau to wisa mo ro kowameai ie nou aboto.'

Iato Iawe ro isabuna sosoro aise gemedea Keina durupi ato, urubia umoro sapuwo to ibo nou modobo pua kopia.

<sup>16</sup> Keina Iawe aboudo a-garatateai ata moro to, masiro Kororosuwu duriomoro.

Nou a-wimidiro saiki boido idiaawado-die.

<sup>17</sup> Nou ro dubu mere garasomai nou masiro a-giduti Inoki to. Ina iato nou ro auna sabowa gosioidiro, nou ro sabowa masiro a-giduti keba mere masiro to Inoki.

<sup>18</sup> Neibi ibo wimidirotiti-bimo ina Inoki ro mere nato garasomai masiro Iradi. Iradi auna na-go'i nou ro a-garasomai Mehudere. Mehudere auna na-go'i nou ro a-garasomai Metusere. Metusere na-wimidiro auna na-go'i, nou ro a-garasomai Rameke. Keina merebusere aramio mutu neio ibo wirowomidiro iedi duriomoro ro iato.

<sup>19-20</sup> Rameke ro netewa teibo orobo teibo giedea-ma, Ada ra Sira ra. Nou ro keba orobo ato netewa teibo dubu mere teibo girasomai-ma. Keba mere masiro Iabara, nou keba dubu e parai moto keremari, ibose keba dubu e sipisipi burumukau mutu kimowotoi ie.

<sup>21</sup> Neama masiro Iubara, nou keba mere ie ugeuge kisioidiro, iato kiourio ie.

<sup>22</sup> Ina Rameke ro saro orobo ato mere ra besere ra girasomai-ma. Mere masiro Tubara-Keina, nou koko namabu wisioirotiti idaibo kabi, giri, emowa, turuko. Besere masiro Nama.

<sup>23</sup> Neibi na-wimidiro-bimo Rameke ro a-gutura ibo, 'Ada, Sira, mo owera dirowidiro-rido! Mo ro ta-nopia orio mere, mo keba se nou ro naudurai-die.

<sup>24</sup> Keina wisa auna ie, idaibo 7 tau to kowame ie. Mo arua urubia ro kopia ato mo wisa auna ia ie, idaibo 77 tau to kowame ie. Nou se ie.'

<sup>25</sup> Adam ra orobo ra na-wimidiro-do, Keina ro Eiboro na-gesuai, ina Adam ro iato garasomai ata dubu mere Eiboro bobo gemodomorea. Ibi ro nedi mere ro masiro a-gomia Seti. Ina Ibi ro iato gutura ibo, 'Godi ro ta-nomia-ro ata mere Eiboro bobo ato, Keina ro na-gesuai.'

<sup>26</sup> Ina Seti auna na-go'i nou ro a-garasomai dubu mere masiro Inosi. Inosi na-gomidiro, Iawe masiro kemowabu urubia ro nedi tau ro neido gatamuai-rimo.

## 5

### *Adam aboudo wororuwo Noa to*

<sup>1-2</sup> Godi ro urubia na-gisioidiro dubu ra orobo ra nou ia sosoro gisioidiro-ma, ina nou ro korosa iato gimia-ma. Nou ro urubia to giapoi-ma.

Masiro sirio nou e, Adam aboudo idaibo sosoro gororuwo-ro Noa aboto.

<sup>3</sup> Adam Godi ro na-gosioidiro nou ta-gomidiro 130 kisimisi to, ina iato gowea nou ia sosoro ata dubu mere, masiro Seti.

<sup>4</sup> Ina iato na-gomidiro, nou ro arua merebusere nato girasomai,

<sup>5</sup> nou ido garaburai 930 kisimisi ato.

<sup>6</sup> Seti ta-gomidiro 105 kisimisi to, ina dubu mere iato gowea, masiro Inosi.

<sup>7</sup> Ina nou na-gomidiro, nou ro nato girasomai arua merebusere,

<sup>8</sup> nou ido garaburai 912 kisimisi ato.

<sup>9</sup> Inosi ta-gomidiro 90 kisimisi to, ina nou ro a-garasomai dubu mere, masiro Kenan.

<sup>10</sup> Ina nou na-gomidiro, nou ro nato girasomai arua merebusere,

<sup>11</sup> nou ido garaburai 905 kisimisi ato.

<sup>12</sup> Kenan ta-gomidiro 70 kisimisi to, ina nou ro a-garasomai dubu mere, masiro Mahararere.

<sup>13</sup> Ina nou na-gomidiro, nou ro nato girasomai arua merebusere,

<sup>14</sup> nou ido garaburai 910 kisimisi ato.

<sup>15</sup> Mahararere ta-gomidiro 65 kisimisi to, ina nou ro a-garasomai dubu mere, masiro Iaredi.

<sup>16</sup> Ina nou na-gomidiro, nou ro nato girasomai arua merebusere,

<sup>17</sup> nou ido garaburai, 895 kisimisi ato.

<sup>18</sup> Iaredi ta-gomidiro 162 kisimisi to, ina nou ro a-garasomai dubu mere, masiro Inoki.

<sup>19</sup> Ina nou na-gomidiro, nou ro nato girasomai arua merebusere,

<sup>20</sup> nou ido garaburai, 962 kisimisi ato.

<sup>21</sup> Inoki ta-gomidiro 65 kisimisi to, ina iato a-garasomai dubu mere, masiro Metusara.

<sup>22</sup> Inoki Godi mutu idabutititi. Ina iato na-gomidiro, nou ro iato girasomai arua merebusere,

<sup>23</sup> nou a-wimidirotiti 365 kisimisi to.

<sup>24</sup> Inoki Godi mutu idabutititi, iato Godi ro keremiro se gowatateai, nou araburai pua.

<sup>25</sup> Metusara ta-gomidiro 187 kisimisi to, ina iato girasomai dubu mere, masiro Rameke.

<sup>26</sup> Ina iato na-gomidiro, nou ro nato girasomai arua merebusere,

<sup>27</sup> nou ido garaburai, 969 kisimisi ato.

<sup>28-29</sup> Rameke na-gomidiro nou umoro ta-iamotiti Godi ro beda sosoro gedea mibo nedi sopu ro nato. Nou umoro mutu gomidiro mibo woko na-gisioidiro, idaibo ohona kiosora, nou ro dubu mere nato garasomai, 182 kisimisi ato, ina nou ro masiro a-giduti Noa to. Noa masiro Hiburu oweru to owamo ibo 'Sipere komidiro mibo tanaro patu aboudo'. Rameke ro na-gowea Noa bamuai, nou ro a-gutura ibo, 'Nedi dubu mere ro nou ro nimo beda mibo woko maumo ato na-norowomidiro, mabu nedi sopu goto gebari ro Godi ro ubauba ta-gowai, ina nimo toutou nedi mere ro nou ro anama-iwaititi-ri.'

<sup>30</sup> Ina iato na-gomidiro, nou ro nato girasomai arua merebusere,

<sup>31</sup> nou ido garaburai, 777 kisimisi ato.

<sup>32</sup> Noa ta-gomidiro 500 kisimisi to, ina iato girasomai-ibi netewa didi dubu mere peteibi, neibi masiro Sem, Iapeti, ina Ham.

## 6

*Urubia auna ia ubauba to irowomidirotiti*

<sup>1</sup> Edi tau ro nato urubia dubu patu sirio aise goi-rimo duriomoro gabogabo ato. Meamea busere nou wirotuti-mo nedi urubia ro neio ro.

<sup>2</sup> Awawo masiro urio neio ro busere meamea na-iaurititi-mo, neio ro aise iaremotiti-mo upi na ri.

<sup>3</sup> Iawe ro ibo, 'Mo kamade tato ie urubia aboto, mo edi keremiro ro neio mutu sirio tau to aise owamo-ri pua, ina noudo ie neio ro pamo samo to amadimi-iauri-ri. Neio 120 kisimisi irobo-ri pua.'

<sup>4</sup> Taie, neio na-irowomidirotiti, iedi busere ro neio ro bamuai na-girotuti-rimo, awawo urubia gebarigebari to gararapoi-rimo, mabu neio abeamio awawo masiro urio ie. Taie, iedi tau ro nato edi dubu gebarigebari ro neio ro arua ubauba tanaro ta-wisioidirotiti-mo.

<sup>5</sup> Iawe na-irarowotiti-ro urubia neio auna ia ubauba to irowomidirotiti, ina neio ubauba kimaragoidiro mutu irowomidirotiti. Neio edi tanaro ro nou ro na-giauri, imese auna ia ubauba ie.

<sup>6-7</sup> Nou iato a-geremohoio urubia nou ro beda sosoro to gisioidiro, ina noudo ie nou ro ibo gutura, 'Imese namabu sirio na-nisioidiro mo ro imese anama-ipisiamuti-ri, idaibo urubia, tumu namabu, koromudidiro namabu, ibose pawa ohu ato na-worowadaudiro.'

### *Noa totomu e*

<sup>8-10</sup> Ata dubu masiro Noa mea tuputupu dubu e Iawe sosoro gabo ato. Nou nakara se mea dubu e, nou Godi mutu idabutititi.

Ina Noa ro girasomai-ibi netewa didi mere peteibi, neihi masiro Sem, Iapeti, Ham.

<sup>11</sup> Godi sosoro gabo ato imese sirio urubia ubauba tanaro isioidirotiti-mo idaibo karado, karaberemo, urubia kiopiauti.



<sup>12</sup> Ina Godi ro ta-giauri-ro iedi ubauba tanaro sirio ro nedi duriomoro ro nato.

<sup>13</sup> Ina Godi ro Noa aboto nou ri gutura ibo, 'Imese urubia na-orowomidiro nedi duriomoro ro nato, neio ro auna ia ubauba tanaro isioidirotiti-dumo, ibo pua mea mino to korowomidiro. Mo ro urubia imese anama-ipisiamuti-ri nedi duriomoro ro nato.

<sup>14</sup> Noa, oro ro auna negere ota bokose pe ba-dididi meamea koko ota rido, oro simara keremiro sapuwo to. Ibi gugu sirio goro ato ba-diasiouti, ibose goro rido gomo rido bosou to ba-diadiriti.

<sup>15</sup> Mo ubi ie edi ota bokose pe ro, oro ro idaibo sosoro auna negere kididi. Wamea rudo wapo to idaibo tuturu modobo ba-dodoburio 133 mita, ina boroboro sapuwo rido ata sapuwo to modobo ba-dodoburio 22 mita, ina sopu rido ohu to modobo ba-dodoburio 13 mita.

<sup>16</sup> Iedi ota bokose pe ro ohu rido ba-datimai, ina katimai maumo ato sawa rido nupu rido pari sapusapuwo rido 44 sentamita pito ba-miaidiro. Sopo moto, turi moto, ohu moto ba-disioidiro. Ibose magere gomo ato ba-dosioidiro.

<sup>17</sup> Mo ro auna ia abata obo anamadi-emeiriai-ri. Imese keremiro namabu patu amadimo-orowaburai-ri nedi duriomoro ro nato, kaupoti mo ro hodo anama-asaubiai-ri oro aboudo.

<sup>18</sup> Oro mo ro imese nemowapotai oro mere peteibi, oro orobo, oro eteamio, nio ro amadimo-odoro-ri nedi ota bokose pe goro ro neito.

<sup>19-20</sup> Oro ro ibose ama-iwodouti-ri orobo ra dubu ra imese beda mutu erere keremiro

namabu ra, idaibo erere pawa, koromudidiro nakomu, neio keremiro sapuwo to.

<sup>21</sup> Beda mutu erere ohona ra nibi ro kiho sapuwo to ba-diwoiriamuti-ro, ibose imese keremiro namabu neio ro kiho ohona ba-diwoiriamuti-ro.'

<sup>22</sup> Godi ro beda oweri garo-ro Noa aboto, nou ro iedi woko ro kisioidiro to aise gitamuai.

## 7

### *Urubia obo ro giwioro*

<sup>1</sup> Iawe ro ibo Noa aboto, 'Oro mo ro na-niauri, oro kaupoti mea dubu nou se ie nedi duriomoro ro nato. Oro mere peteibi upi mutu, oro orobo, oro ia ba-dodoro-bimo ota bokose pe goro to.

<sup>2</sup> Oro ro kiho koroho namabu 7 upi 7 dubu ba-diwodouti, ibose oro ro kiho tato koroho namabu kaupoti orobo kaupoti dubu ba-diwodouti.

<sup>3</sup> Ina beda mutu erere pawa ra ohu ato na-orowadaudiro-dumo, 7 orobo 7 dubu ba-diwodouti, neio keremiro sapuwo to.

<sup>4</sup> 7 saiki namadimo-oroporeai-ri mo ro auna ia daroho anamadi-emeiriai-ri, iedi daroho ro 40 saiki 40 duwo neito ama-iarotiti-ri. Beda mutu namabu sirio ra mo ro na-nisioidiro nedi duriomoro ro nato, mo ro anama-ipisiamuti-ri.'

<sup>5</sup> Taie, Iawe ro beda oweri garo, Noa ro aise gisioidiro.

<sup>6</sup> 600 kisimisi na-gorobai Noa auna ia abata ro nato gowea.

<sup>7</sup> Noa, nou orobo, mere peteibi, upi mutu, neibi ota bokose pe goro to aise godoro-birimo, neibi abata ro kiopia-ibi rie.

<sup>8</sup> Imese koroho namabu, idaibo kiho namabu, kiho tato namabu, beda mutu pawa ra, koromudidiro namabu goto ato na-oroho-dumo,

<sup>9</sup> neio orobo ra dubu ra netewa netewa se goroho-rimo Noa aboto, taie nou ro ota bokose pe goro to aise giwodouti.

<sup>10</sup> 7 saiki na-goroporeai-rimo, ina ata sogomi na-gohau-ro,

<sup>11</sup> 17 saiki ato edi kisimisi ro nato Noa 600 kisimisi ro nato na-gorobai, auna abata obo sopu rudo gioro-ro, ibose auna daroho toboro rudo gororuwo-ro.

<sup>12</sup> Daroho a-wiarotiti duwo saiki womu tato 40 saiki ti-goroporeai-rimo.

<sup>13</sup> Daroho ido amadi-ou-ri, kebase Noa, nou orobo, mere peteibi Sem lapeti Ham, neibi upi mutu ta-godoro-birimo ota bokose pe goro to.

<sup>14-16</sup> Nou ro ibose ta-giwodouti serawo namabu, serawo tato namabu, tu ra sairo ra to na-woroho-dumo, na-wererepedu-dumo, niro to goto ato na-woromudidiro-dumo. Ibose tamu ra mutu namabu idaibo pawa upi ra dubu ra nou ro ta-giwodouti. Noa ro imese namabu kiwodouti to na-giporeai, taie nou saro rido Iawe ro magere aise gemopai.

<sup>17-20</sup> 40 saiki obo neito wiorotiti-ro, imese ibo wiorotiti-ro ota bokose pe na-gowoubua, iato nou aise gowadaudiro. Obo ibo wiorotiti imese imese ota mau ti-gimopai, ibo wioro-ro podo ti-gimopai, womu tato podo kiokio 7 mita obo maumo ato giamo.

<sup>21-23</sup> Taie, urubia sirio, beda mutu namabu sirio ra sairo to na-woroho-dumo,

na-werepedu-dumo, na-woromudidiro-dumo  
pawa ohu ato na-worowadaudio-dumo, obo ro  
aise giopiauti. Ata nakomu ata ro owea pua  
keremiro nedi sopu duriomoro ro nato, mabu  
Godi nou tau se ta-giedea kimaragoidiro nedi  
sopu duriomoro nou ro ubauba kowai aboto.  
Noa nou se ie kaupoti dubu nou beda urubia  
mutu godoro ota bokose pe goro to, neio ro se  
giwia-rimo keremiro.

<sup>24</sup> Ina ibo pua obo samo to komiodoi, aise  
wimidirotiti womu tato 150 saiki  
na-goroporeai-rimo.

## 8

### *Obo gomiodoi*

<sup>1</sup> Godi ro woki imati-ibi pua beda urubia ra  
Noa mutu ota bokose pe goro ato  
na-gomidiro-bimo, neibi nou ro aise  
gimaragoidiro-ibi, mabu beda mutu tumu  
namabu ra, serawo namabu, serawo tato  
namabu nou ro ta-giwodouti, neio Noa mutu  
gorowomidiro ota bokose pe goro ato. Godi nou  
na-gimaragoidiro, iato nou ro auna ia gawia iato  
gemeiriai-ro, edi gawia ro na-gihudurai-ro, obo  
nou ro aise gowiodoi.

<sup>2</sup> Beda mutu obo sosu ro wiroruwoidiroititi-mo  
goto goro rudo, imese aise goroputi-rimo,  
iroruwo pua. Iedi tau ro nato ata daroho bubu  
tato ie, toboro mea se gowamo.

<sup>3</sup> 150 saiki na-goroporeai-rimo, duriomoro obo  
ro a-gomioduti, ibo womiodoititi imese,

<sup>4</sup> womu tato 17 saiki ro na-gorobai, 7 sogomi  
ato, taie ota bokose pe aise garakoko sopu ato.

Ata duriomoro masiro Ararata nou nato aise gorotomai.

<sup>5</sup> Obo aise womiodoititi imese imese, womu tato keba saiki 10 sogomi ato na-gorobai Noa ro nato giwia podo na-giwaroho-ro.

<sup>6-7</sup> Taie Noa 40 saiki ibo wibodorotiti womu tato ti-goroporeai-rimo, nou ro garegare pawa gebari iato gemeiriai pito goro rudo. Iedi garagare pawa gebari ro beda korowameai ra, imese moro to godau.

<sup>8-9</sup> Ina ibo wimidiro, dumu pawa iato gemeiriai. Nou ro na-gemeiriai edi pawa ro komi moro egea se giosora, aise gorowameai-ro, obo auna se gomidiro, taie Noa ro aise gorobai.

<sup>10</sup> Ina amia saiki ibo gibodoro ti-goroporeai-rimo, ina natara na dumu iato gemeiriai,

<sup>11</sup> iedi dumu ro saiki tuturu ta-gorohowado-ro, adimo ia nato gorowameai-ro ota puara se gosumudiro-ro. Noa umoro nato goi ibo obo ta-omiodoi.

<sup>12</sup> Ina ibo ina natara na dumu iato gemeiriai, iedi dumu ro imese moro to godau, beda korowameai ra.

<sup>13</sup> Omona ia saiki ato Noa ro keba sogomi na-gatamuai, nou iedi tau ro nato 601 kisimisi nato gorobai, nou iato na-giraroweauti pito rido, obo imese ta-gomiodoi duriomoro rido.

<sup>14</sup> Taie, nou ibo wimidirotiti ata sogomi ti-gosuwoidiro-ro, ina 27 saiki ato obo imese potoro ia ie, ta-goroporeai, sopu ato ata obo ata omidiro pua.

<sup>15</sup> Taie, Godi ro ibo nou aboto,

16 'Noa, ba-diwsuruwo-ro oro orobo, mere peteibi, eteamio peteibi,

17 oro iedi namabu ro na-giwodouti idaibo pawa, goto ato koromudidiro namabu, tumu namabu sirio, neio mutu ba-dosuruwo-ro ota bokose pe goro rido. Obo ta-gomiodoi, oro ro ba-ditioduti, neio atu sosoro ba-mararasomai-mo duriomoro ato.'

18 Taie iato Noa a-gosuruwo-ro nou orobo mere peteibi upi mutu.

19 Nou ro beda mutu keremiro nakomu giwodouti, idaibo sairo to na-woroho-dumo, goto ato koromudidiro namabu, pawa mutu, imese keremiro nakomu neio erere se gosuwoduti-rimo ota bokose pe goro rudo.

20 Ina Noa ro Iawe woki emati pua, nou ro nadi aise gitomuti, meamea nakomu nou na-gieributi idaibo pawa, nadi ohu ato nou gimatowo.

21 Iedi nibo mea ro aise gowioro ohu to, Iawe nou ro kamade aise gowai, nibo mea na-gemaseai. Nou nakara se iato geremowagomea ibo, 'Mo umoro ie neio domere na-gorowomidiro, neio kimaragoidiro ubauba se iamotiti. Kaupoti mo ro idaibo tanaro ina osioidiro-ri pua, duriomoro gebari mo ro opisiamuti-ri pua.

22 Duriomoro ibose to ama-owamotiti-ri, orio pakea kiebuti kibouti ina iato kiho ie. Iato saiki ra duwo ra korosa ra kukamo ra ama-iamotiti-ri, ina ibose gawia ra surama ra neitiro amade-eremohodowautiti-ri.'

## 9

*Godi ro umoro oweri garo Noa aboto*

<sup>1</sup> Taie, Godi ro ibo Noa aboto 'Oro, oro orobo, mere peteibi, neibi upi mutu, mo ro korosa niwai-ibi. Nibi merebusere sirio se ba-dirasomo-bimo, neio ro irowomidirotitiwai ri duriomoro gebari ato.

<sup>2</sup> Nedi duriomoro ro nato beda mutu namabu sirio ro oroho-dumo, pawa, nakere, imese koromudidiro nakomu mutu, neio tere ri nibi aboudo amadimo-orowadaudiro-ri. Neio mo ro a-niapoi nibi aboto, nibi ro ba-diauri-bimo iedi namabu sirio ro na-woroho-dumo duriomoro ato,

<sup>3</sup> nibi ro modobo ie kiho. Kibase mo ro ta-nimapoi kiho sapuwo to sopu rudo na-wisuwoduti-dumo ota iopu puara mutu, ibose abora mo ro a-niapoi karima ohona, ba-diho-mo!

<sup>4</sup> Mo ro a-nimowapotai-ibi nibi karima ohona karima mutu iho mamō, sabi ie, mabu keremiro karima aboudo orobu-die.

<sup>5</sup> Ibose ata mere ro na-opia, urubia mere keremiro na-emowagare, mo ro ibose wisa kowameai ie. Ina urubia dubu beda nakomu ro kopia ra, nou keremiro na-emowagare, iedi nakomu ro urubia ro keremiro ba-memowagare-mo.

<sup>6</sup> Mo nakara se a-nerematiouti urubia dubu kosioidiro, ina beda dubu ro kopia ra urubia dubu, wisa na nou kopia ie.

<sup>7</sup> Modobo ie nibi ro sirio merebusere kirasomo, neio ro sirio ba-moi-mo nedi sopu

duriomoro ro nato, ina neio aboudo sipu  
ba-morobodorouti.'

*Godi ro hodo gasaubiai-ro Noa aboudo*

<sup>8</sup> Ina Godi ro Noa mere Peteibi Mutu  
keremowotouti oweri ibo gimowapotai-bi,

<sup>9</sup> 'Mo abora nedi oweri ro nama-aro-ri imese  
morobise oweri ie, aise  
amadimo-ororosioi-di-ro-ri. Nibi edi merebusere  
ro, aramio, nasaio, neio aboto,

<sup>10</sup> ibose beda mutu namabu sirio ra mo ro  
na-nisioi-di-ro, nedi duriomoro ro nato  
na-woroho-dumo, imese beda mutu nakomu ra  
na-gosuwoduti-rimo ota bokose pe goro rudo,  
nedi oweri ro neio aboto ou.

<sup>11</sup> Nedi oweri ro mo ro na-naro morobise  
oweri ie, mo ro nedi duriomoro ro nato beda  
mutu namabu sirio ro iamo, ibose imese  
keremiro nakomu sirio na-woroho-dumo, mo ro  
neio aboto ido idaibo tanaro osioi-di-ro-ri pua,  
duriomoro gebari mo ro obo to ina opisiamuti-ri  
pua.'

<sup>12</sup> Ina Godi ro iato gutura, 'Mo ro isabuna  
anama-imede-a-ri oro urubia mutu, ibose imese  
keremiro nakomu na-woroho-dumo, nimo imese  
sirio tau umoro kiwaititi sapuwo to ie.

<sup>13</sup> Mo ro darai toboro ohu ato isabuna na  
anama-owotowa-ri, orio urubia umoro nou ro  
ama-iwaititi-ri, nou ri nama-owotowa-ri toboro  
ato neio ro kiauri sapuwo to.

<sup>14</sup> Taboro bubu kere ro na-watimuti ina iato  
na-emowateai, darai iato aise korowotowa ie  
taboro ohu ato.

<sup>15-16</sup> Darai nio ro kowe-a ato mo ibose mo  
umoro koi ie nakara se ibo, mo beda umoro  
oweri nara nibi aboto. Ina darai mo ro kowe-a



ato, mo umoro koi ie ibo mo imese  
neremowotouti beda mutu keremiro nakomu  
sirio ra na-woroho-dumo nedi duriomoro ro  
nato, ido obo ro iopia-ri pua.

<sup>17</sup> Nedi darai ro isabuna na nowotowa, nio ie  
mo ie nimo umoro kiwai aboto, beda mutu  
nakomu sirio ra na-iamo, mo ro ido ubauba  
iwai-ri pua.'

*Noa mere Peteibi Mutu e*

<sup>18</sup> Noa simara mere Peteibi Mutu  
na-gosuruwo-birimo ota bokose pe goro rudo,  
neibi masiro Sem Iapeti Ham. Ham ro dubu  
mere garasomai, nou masiro Keineni.

<sup>19</sup> Noa edi mere Peteibi ro neibi aboudo  
gorobodorouti imese sirio urubia duriomoro  
gabogabo ato na-worowomidiro.

<sup>20</sup> Noa nou pari woko kisioidiro dubu e. Nou  
ro ta-gibouti ota gamoda sosoro pari ato, nou  
masiro gereipi.

<sup>21</sup> Taie, ata tau nou ro iedi gereipi iopu ro  
nuku to iato gimapipiti. Iedi obo ro saro rido  
pupuwo na-gimidai, nou ro na-gidio, iato  
kawakawa ro aise gorobai. Nou obotama aise  
gipuruti, taie porose se norou parai moto goro  
ato imese gutuwa.

<sup>22</sup> Ham ro na-gowea abera porose se korobu  
moro ato, nou aise gorowameai-ro naramu teibo  
imowapotai-ma ri. Nou ro ibo 'Nitiro  
ma-dou-rido, Idau owea ri.'

<sup>23</sup> Neitiro na-gou-rido abera porose se korobu  
moro to, nou sosoro emowea pua. Iato abera  
obotama atimai na huru to gemowou-rido,  
na-gatimai-rido, taie iato gorowameai-rido.

<sup>24</sup> Noa kidio norou aboudo na-geribua-ro, nou umoro na-goi ibo saro mere ro otou tanaro gosioidiro, taie,

<sup>25</sup> nou ro Ham ubauba iato gowai ibo, 'Oro mere Keineni sopu to ama-ororuwo-ri, nou Sem ra Iapeti ra neitiro woko ama-imesioidirotiti-mari, merebusere aramio mutu.'

<sup>26</sup> Noa ina iato gutura ibo, 'Godi Sem ro na-emowabutiti nou masiro Iawe, nou urubia ro ba-memowabutiti-mo! Keineni nou Sem sowake ba-mirohotiti.

<sup>27</sup> Ina Iapeti ata goto Godi ro ba-momia. Iapeti Sem mutu ba-mimidiro-do, kamade mutu. Ina Ham mere ie Keineni neitiro sowake ba-mirohotiti.'

<sup>28</sup> Noa 600 kisimisi ato abata ro nato gowea, ina abata saro gabo ato 350 kisimisi to ta-gomidiro.

<sup>29</sup> Taie, Noa 950 kisimisi na-gorobai, nou iato aise garaburai.

## 10

*Noa mere Peteibi Neibi Aramio Merebusere nou e*

<sup>1</sup> Noa ro edi mere Peteibi ro na-girasomai-ibi Sem ie Iapeti ie Ham ie, neibi ro abata saro gabo ato dubu mere sirio girasomo-birimo.

*Iapeti Aramio Merebusere*

<sup>2</sup> Ina Iapeti ro na-girasomo dubu mere sirio, neio masiro nou e, Goma, Magoga, Madai, Iabeni, Tubara, Meseki, saro mere Tirasi.

<sup>3</sup> Iapeti keba mere Goma, nou ro girasomai-ibi dubu mere peteibi, neibi masiro Asakenasi, Ripa, ina Togama.

<sup>4</sup> Ina Iabeni ro girasomai-bi 4 dubu mere peteibi, neibi masiro nou e, Erisa, Tarasisi, Kitimi, saro mere Rodanimi.

<sup>5</sup> Neio Mediterenien oromo bara ato irowomidirotiti. Erere gu simara owerato na-iremowautiti-mo, erere goto kere to ibo gororoburutai-rimo, sipu neio ro auna nato gowai-rimo.

### *Ham aramio merebusere*

<sup>6</sup> Ina nou Ham dubu mere neibi masiro ie Kusa, Misiraim, Putu, Keineni.

<sup>7</sup> Ina ibose Kusa dubu mere neibi masiro ie Seba, Habira, Sabata, Rama, Sabateka. Ina Rama netewa teibo mere teibo ie, Seba ra Dedani ra.

<sup>8</sup> Kusa ata mere masiro Nimorodi, nou auna boso eputa dubu e,

<sup>9</sup> ibose nedi sopo duriomoro ro nato auna ometa koroho dubu e Iawe sosoro gabo ato. Ina noudo ie, urubia ro ibo karo, 'Urubia dubu Iawe sosoro gabo ato nou auna ometa koroho dubu e, Nimorodi beda sosoro irohotiti.'

<sup>10</sup> Ina Nimorodi ro awawo sabowa iaurititi Babironia duriomoro ato, sabowa masiro neio ie, Babironi, Ereki, Akada, ata Karene.

<sup>11</sup> Ina Nimorodi Babironia duriomoro na-gemeserai, taie nou imese gou ata duriomoro to, masiro Asiria. Nou ro iato awawo sabowa gisioidiro, sabowa masiro neio ie Niniba, Rehobotiri, Karaha mutu.

<sup>12</sup> Ina nou ro auna negere sabowa, Reseni, iato gosioioidiro, Niniba ra Karaha ra turituri ato.

<sup>13</sup> Isipi, nou ata masiro Misiraim, nou nasaio ibo ie, Ruda urubia, Anam urubia, Rehaba urubia, Naputu urubia,

<sup>14</sup> Paturusi urubia, Kasuru urubia, ina Kiriti urubia. Pirisitia urubia neio Kasuru urubia aboudo orobu-die.

<sup>15</sup> Keineni ro netewa teibo dubu mere teibo girasomai-ma, keba mere Sidoni, saro mere Hiti.

<sup>16</sup> Ina nou nasaio ie Iebusi urubia, Amore urubia, Girigase urubia,

<sup>17</sup> Hiwi urubia, Aki urubia, Sini urubia,

<sup>18</sup> Awadi urubia, Demari urubia, Hamati urubia. Keineni urubia gu gabogabo aise gororoburutai-rimo

<sup>19</sup> womu tato Keineni duriomoro gebari ti-girobai-rimo. Neio ro nedi duriomoro gebari ro nou gorobai-rimo, Iodeni oromo bara rido womu tato koriri duriomoro ti-gorobai-rimo. Sidoni sabowa koriri duriomoro ato ata sapuwo ato na-owamo, womu tato Gasa sabowa, Gera sabowa mutu, imese neio ro ta-gorobai-rimo. Ina Iodeni oromo bara iedi duriomoro ro Keineni urubia ro imese ta-gorobai-rimo. Iato nedi sabowa ro neio ro giamo, Sodom, Gomora, Adima, Seboimi, Rasa mutu. Ina iedi duriomoro gebari ro koriri ra Iodeni oromo ra turituri ato na-gowamo, Keineni urubia ro aise gorobai-rimo.

<sup>20</sup> Nedi urubia ro imese Ham urubia ie. Neio erere gu, erere owera, duriomoro gabogabo gorowomidiro.

*Sem aramio merebusere*

<sup>21</sup> Sem Iapeti naramu e, nou nasa Eberu, Hiburu urubia abera ie.

<sup>22</sup> Sem ro dubu mere girasomai, nu neio masiro ie Erama, Asura, Apakisadi, Rudi, ina Arama.

<sup>23</sup> Arama ro dubu mere girasomai Usa, Huri, Getere, Meseki.

<sup>24</sup> Apakisadi ro Sera garasomai, ina Sera ro garasomai Eberu.

<sup>25</sup> Eberu ro girasomai-ma Perege Iokatani mutu. Perege na-gomidiro, urubia iato duriomoro gabogabo aise gorohodowa-rimo. Ina noudo ie nou abera ro masiro a-gapoi Perege, maumo owamo ibo Korohodowa.

<sup>26</sup> Iokatani sirio dubu mere girasomai nu neio masiro ie, Aromodati, Serepe, Hasamaweti, Dera,

<sup>27</sup> Hadorama, Usara, Dikara,

<sup>28</sup> Obara, Abimaeri, Seba,

<sup>29</sup> Opiri, Habira ina Dobabi. Neio imese Iokatani dubu mere ie,

<sup>30</sup> neio ta-gorowomidiro podo duriomoro ato saiki boido idiawado-die Mesa ra Sepa ra turituri ato.

<sup>31</sup> Nedi urubia ro imese Sem urubia ie. Neio erere gu, erere owera, duriomoro gabogabo gorowomidiro.

<sup>32</sup> Nedi sipu ro Noa edi mere peteibi ro neibi aboudo orobu-die, ina nato gororoburutai-rimo imese duriomoro gabogabo to.

## 11

*Imese urubia owera a-gimewesegerai*

<sup>1</sup> Keba se imese urubia na-irowomidiro  
nedi duriomoro ro nato, kaupoti owera to  
iarotiti-mo.

<sup>2</sup> Neio ro saiki korioduti moro  
na-gemeserai-rimo, durio goto nato gowea-rimo  
Babironia duriomoro ato, taie iato aise  
gorowomidiro.

<sup>3-4</sup> Neio ubi tato ie kororoburitai duriomoro  
gabogabo to, neio ubi ie atu moro ato aise  
korowomidiro. Neio iato geremowapotai-rimo  
auna sabowa osioidiro ri, ibose moto ididi ri ohu  
to owioro ri toboro owasomai ri, mabu neio  
keremowabu auna ie. Goto iato gidabuti-rimo  
kaupoti moro to, ina era to nato gito-rimo, bosou  
to na-giadiriti-rimo, koko neito giwaititi-rimo.

<sup>5</sup> Neio Iawe ro na-giwiia kaupoti ubi mutu  
na-gisioidiro-rimo, ibose kaupoti owera to  
na-garo-rimo,

<sup>6</sup> nou nato gimaragoidiro ibo, 'Neio ubauba  
tanaro kisioidiro aboto imese gatamuai-dumo.  
Ina ido beda ubi ro nama-iamo-ri neio abato,  
neio gabo amadimi-iauri-ri kisioidiro aboto, sabi  
imaragoidiro-ri pua.

<sup>7</sup> Neibi miroruwo-ibiro owera imewesegerai  
ri.'

<sup>8</sup> Taie neio ro auna sabowa kididi to oporeai  
pua. Iawe ro ioudo giburutai-ro, mabu neio  
owera na-geremowidiro-rimo, erere se  
garo-rimo.

<sup>9</sup> Sabowa masiro Babironi owera nato  
gimewesegerai Iawe ro, nou masiro maumo  
owamo ibo 'Daradara', mabu urubia iato  
daradara imese goi-rimo, erere owera  
eremewidiro pua. Taie urubia ioudo

giburutai-ro muso duriomoro gabogabo  
goroho-rimo oweru erere mutu.

*Sem aboudo womu tato Abaram totomu e*

<sup>10</sup> Netewa teibo kisimisi na-goroporeai-rido  
abata saro gabo ato, Sem ro 100 kisimisi  
na-giobai, nou ro nato gasomai dubu mere  
masiro Apakisadi.

<sup>11</sup> Nou ro arua merebusere ido gasomai. Nou  
600 kisimisi na-giobai, nou iato aise garaburai.

<sup>12</sup> Apakisadi 35 kisimisi na-giobai, nou ro  
nato gasomai dubu mere nou masiro Seraha.

<sup>13</sup> Nou ro arua merebusere ido gasomai.  
Apakisadi 438 kisimisi na-giobai, nou iato aise  
garaburai.

<sup>14</sup> Seraha 35 kisimisi na-giobai, nou ro nato  
gasomai dubu mere nou masiro Eberu.

<sup>15</sup> Nou ro arua merebusere ido gasomai.  
Seraha 438 kisimisi na-giobai, nou iato aise  
garaburai.

<sup>16</sup> Eberu 34 kisimisi na-giobai, nou ro nato  
gasomai dubu mere nou masiro Perege.

<sup>17</sup> Nou ro arua merebusere ido gasomai.  
Eberu 464 kisimisi na-giobai, nou iato aise  
garaburai.

<sup>18</sup> Perege 30 kisimisi na-giobai, nou ro nato  
gasomai dubu mere nou masiro Reu.

<sup>19</sup> Nou ro arua merebusere ido gasomai.  
Perege 239 kisimisi na-giobai, nou iato aise  
garaburai.

<sup>20</sup> Reu 32 kisimisi na-giobai, nou ro nato  
gasomai dubu mere nou masiro Seruge.

<sup>21</sup> Nou ro arua merebusere ido girasomai. Reu 239 kisimisi na-girobai, nou iato aise garaburai.

<sup>22</sup> Seruge 30 kisimisi na-girobai, nou ro nato garasomai dubu mere nou masiro Nahoro.

<sup>23</sup> Nou ro arua merebusere ido girasomai. Seruge 230 kisimisi na-girobai, nou iato aise garaburai.

<sup>24</sup> Nahoro 29 kisimisi na-girobai, nou ro nato garasomai dubu mere nou masiro Tera.

<sup>25</sup> Nou ro arua merebusere ido girasomai. Nahoro 148 kisimisi na-girobai, nou iato aise garaburai.

<sup>26</sup> Tera nou 70 kisimisi na-girobai, netewa didi dubu mere Peteibi nou ro neibi girasomai-ibi, Abaram, Nahoro ina Haran.

*Tera aramio merebusere neio totomu e*

<sup>27</sup> Tera totomu nou e. Tera ro girasomai-ibi nedi dubu mere Peteibi ro Abaram, Nahoro, saro mere Haran. Ina Haran nou saro mere ie, Roti nou ro garasomai.

<sup>28</sup> Ina Tera na-gomidiro, nou mere Haran aise garaburai, simara koroto sabowa ato, nou masiro Uri, Babironia duriomoro ato na-owamo.

<sup>29</sup> Abaram ra Nahoro ra upi iato aise giaremo-rido, Abaram ro gedea Sarai, Nahoro ro gedea Mirika. Mirika, Isika mutu Haran besere teibo ie.

<sup>30</sup> Sarai mere tato imidirotiti, nou teri orobo ie.

<sup>31</sup> Tera nou urubia mutu Uri sabowa ato gomidiro-birimo, Babironia duriomoro ato na-owamo. Ina ioudo aise gaimai-birimo Keineni duriomoro to, kaupoti neibi ipi ato aise gorodiobo-birimo auna sabowa Haran ato. Ina



Tera, nou mere Abaram, aramu Roti, ina eterera Sarai, neibi iato aise gomidiro-birimo.

<sup>32</sup> Tera 205 kisimisi na-gorobai, Haran sabowa ato nou iato aise garaburai.

## 12

### *Abaram Godi ro gohodowa*

<sup>1</sup> Abaram 75 kisimisi na-girobai Haran sabowa ato na-gomidiro, Iawe ro nato gemowapotai ibo, 'Nedi duriomoro ba-demeserai oro gu urubia mutu, ito ba-dou ata duriomoro to, oro mo ro anama-emowawea-ri iedi duriomoro ro.

<sup>2</sup> Oro nasaio ro amadimi-irasomo-ri, auna sipu neio ro amadimi-iwia-ri. Oro korosa anama-omia-ri, ina oro auna anama-owai-ri. Korosa oro aboudo amadi-osuruwo-ri arua urubia aboto.

<sup>3</sup> Oro korosa beda urubia ro namadimo-omio-ri, neio ibose korosa mo ro anama-imio-ri. Kaupoti beda urubia ra oro owera to ubauba namadimo-owaititi-ri, neio ibose owera to mo ro ubauba anama-iwaititi-ri. Ina imese erere patu urubia nedi duriomoro gebari ro nato na-orowomidiro, neio korosa oro aboudo amadimi-iauri-ri. Taie.'

<sup>4-5</sup> Abaram Haran sabowa nou ri gemeserai, mabu nou ro Iawe owera ta-girorowai. Nou orobo Sarai, nou aramu Roti, neibi imese sirio namabu, woko urubia mutu, aise gou-birimo Keineni duriomoro to.

<sup>6</sup> Neibi na-gorowateai-birimo Keineni duriomoro to, Abaram iato moro gabogabo aise goroho. Nou ro nato gowea auna ota na-gotoi

Sekem sabowa ato, iedi ota ro More ota ie. Iedi tau ro nato Keineni urubia iato gorowomidiro.

<sup>7</sup> Iawe nato aise gorowawea Abaram aboto, nou ro ibo, 'Nedi duriomoro ro oro nasaio nou anama-imapoi-ri, neio nato ama-irowomidiro-titi-ri.' Ina iato Abaram nadi gitomuti pikoni nari Iawe nou ro iato gemowabu. Iedi pikoni ro Abaram kimaragoidiro nou ro omiotiti Iawe iedi tau ro nato gorowapotai nou aboto.

<sup>8</sup> Ina ioudo gou-ro podo duriomoro to Ai ra Betere ra turituri ato, parai moto iato gotomai. Nou ro Iawe woki emati pua, nadi ina iato gitomuti Iawe emowabu ri.

<sup>9</sup> Ina Abaram duriomoro gabogabo iato goroho, nou ro nato emoutiti-ro goto se duriomoro, nou masiro owamo Negebi.

*Abaram karasaubuti owera garo Isipi eputa dubu aboto*

<sup>10</sup> Iedi tau ro nato nedi duriomoro ro nato ohona tato ie, Abaram nou ri gou Isipi duriomoro to.

<sup>11</sup> Ina ipi gabo ato nou ro Sarai iato gemowapotai, 'Oro sagaru orobo ie.

<sup>12</sup> Isipi urubia ro namadimo-owea-ri, neio amadimi-imaragoidiro-ri ibo oro mo orobo ie, ina mo neio ro anamadimo-opia-ri, oro ama-omidiro-ri.

<sup>13</sup> Ba-dimowapotai ibo oro mo medera ie, ina tanaro mea se nato amadimo-ororosioidiro-ri mo aboto.'

<sup>14-15</sup> Neitiro na-gorowateai-rido Isipi to, Isipi duriomoro urubia ro na-gowea-rimo, eputa

dubu saro edi urubia ro na-gemeauri-rimo, neio ro ibose Sarai nato gowea-rimo. Neio ro ibo eputa dubu aboto 'Sagaru ia ie edi orobo ro!'

Taie, neio ro Sarai iato gorobai-rimo iato gowou-rimo duriomoro eputa dubu auna moto gebari to.

<sup>16</sup> Eputa dubu ro Abaram iato gomia imese sirio sipisipi, burumakau, doniki, kemoro, sarupo nari edi urubia ro na-giobai upi dubu, imese aise giaiwai Abaram aboto.

<sup>17-18</sup> Iawe ro awawo temeteme iato giaiwai eputa dubu aboto, ibose nou moto ato beda urubia ro gorowomidiro imese temeteme ro aise giobai. Eputa dubu umoro ta-goi, 'Mo ro Abaram orobo nowasiri, noudo ie nimo temeteme ro kirobai.' Eputa dubu urubia etio ro emeauri-dumo Abaram iato gowou-rimo eputa dubu aboto. Nou ro ibo

<sup>19</sup> 'Mo oro ro etou ri nasaubuti ibo nou oro medera ie? Mo ro nou ri norobai orobo nari. Oro orobo nou e. Daragare neido!'

<sup>20</sup> Nou ro iato gimowapotai nou saro edi urubia ro na-emeauri-dumo 'Dowagare-mo Abaram neido Isipi duriomoro rido!' Ina noudo ie Abaram, orobo, imese namabu sirio mutu aise garagare-rido Isipi duriomoro rido.

## 13

### *Abaram ra Roti ra a-gorohodowa-rido*

<sup>1-2</sup> Ina Abaram Isipi duriomoro na-gemeserai nou orobo, Roti nou aramu, neibi namabu sirio aise giwou-birimo idaibo sipisipi, burumakau,

nanigosi, siriba mani, gorodi mani, neibi imese gou-birimo Negebi duriomoro to.

<sup>3</sup> Ina Negebi rido nou duriomoro gabogabo goroho, nato gou-ro Ai ra Betere ra turituri, parai moto keba se iato ta-gididi,

<sup>4</sup> ina imese gou Iawe emowabu ri beda nadi gitomuti keba se, nou ro Iawe iato gemowabu.

<sup>5</sup> Nedi tau ro nato Roti Abaram mutu goroho, ina Roti nou simara orobo, merebusere, woko urubia, ina kiwoubua namabu sirio mutu e.

<sup>6</sup> Neitiro na-gomidi-ro-rido kaupoti moro ato, sugamoso modobo pua mabu neitiro burumakau, nanigosi, sipisipi imese sirio ia ie.

<sup>7</sup> Ina iato Abaram kiwoubua namabu kimowotoi urubia, Roti kiwoubua namabu kimowotoi urubia, neio iato geremaro-rimo. (Iedi duriomoro ro nato Keineni urubia Perese urubia ibose ti-gorowomidi-ro.)

<sup>8</sup> Ina noudo ie Abaram ro kemowapotai Roti ibo, 'Neitiro kaupoti gu dubu teibo ie. Modobo pua neitiro kiwoubua namabu kimowotoi urubia keremaruti.

<sup>9</sup> Neitiro anamado-orohodowa-ri, oro saiki kidiawado moro to nama-ou-ri mo isana saiki korioduti moro to anama-ou-ri. Oro pere sapuwo to nama-ou-ri, mo isana tumodi sapuwo to anama-ou-ri.'

<sup>10</sup> Roti na-giraroweauti nou ro nato gowea Iodeni gawagogo ato obo na-gohau-ro womu tato Soa sabowa. Iedi duriomoro ro nato Ideni pari mea sosoro ie. Meamea goto oromo bara ato Isipi duriomoro ato atu sosoro ie. Nedi tau ro nato Iawe ro wisa ubauba to owameai pua

Sodom ra Gomoro ra to, nedi sabowa teibo ro nou ro saro rido gipisiamuti-ma.

<sup>11</sup> Roti ubi ta-goï nakara se komidiro aboto iedi duriomoro ro nato. Neitiro idaibo sosoro gorohodowa-rido.

<sup>12</sup> Abaram imese gomidiro Keineni duriomoro ato, isana Roti auna sabowa teibo turituri ato gomidiro, Sodom gomo ato.

<sup>13</sup> Urubia iedi sabowa ro nato na-gorowomidiro, neio imese auna ia ubauba tanaro isioidirotiti-mo lawe sosoro gabo ato.

<sup>14</sup> Roti ro Abaram na-gemeserai, lawe ro Abaram nato gemowapotai ibo, 'Ma-diraroweauti sapusapuwo, saiki boido idiawado-die, saiki boito orioduti, gawia boido ihuduti-die, surama boido ihuditi-die.

<sup>15</sup> Imese oro duriomoro ie, oro nasaio mutu mo ro nou nemapoi.

<sup>16</sup> Ina nasaio ro iato auna sipu amadimi-irasomo-ri, momoso kainakaina beda sosoro ra na-iamo goto ato. Urubia ro kiasoro modobo pua. Neio iato ba-mirohotiti-mo imese sirio tau.

<sup>17</sup> Ba-derebua! Kiraroweauti kiraroweauti ba-doroho, nedi duriomoro ro oro mo ro nou nemapoi.'

<sup>18</sup> Abaram nou ri goroho, nou ro iato giwia awawo ota na-gorowotoi Mamere goto ato, auna sabowa Heboroni ato. Ina nou ro parai moto ito aise gowosiomai. Taie, iato Abaram ro nadi ina aise gitomuti lawe emowabu ri.

*Roti Abaram ro gapopo-ro*

<sup>1-5</sup> Roti Sodom sabowa gomo ato gomidiro, iedi tau ro nato Kedoraome auna eputa dubu e, Erama duriomoro ato. Ina nou ro iaurititi nedi eputa urubia ro Bera, Sodom sabowa eputa dubu e, Birisa Gomora sabowa eputa dubu e, Sinabi Adama sabowa eputa dubu e, Semebe Deboimi sabowa eputa dubu e, Bera sabowa, nou ata masiro Soa nou eputa dubu mutu e. Neio nou ro giauri 12 kisimisi to, ina 13 kisimisi na-gorobai neio ro nato gemeseruti-rimo, mabu nou ro auna se isaubutiti. 14 kisimisi na-gorobai Kedoraome nato gimaragoidiro, 'Iedi urubia ro mo aboudo ta-geremeseruti-dumo.'

Taie, nou ro nato gidabuai Babironia eputa dubu Aramapere, Arioko eputa dubu Erasa sabowa ato, Tidara eputa dubu Goimi sabowa ato. Neio iato garadabuti-rimo boso aimara urubia mutu, imese gou-rimo boso aboto. Neio ro Repa urubia imese ta-giopiauti-rimo Aseteroti Kanaimi sabowa ato. Ina boso ioudo gou-rimo ata sabowa to Ham, ina iato urubia ta-giopiauti-rimo, ibose Susi urubia Ham sabowa ato ta-giopiauti-rimo. Ina ibose Emi urubia ta-giopiauti-rimo neio ro Sabe Kiriataimi sabowa ato.

<sup>6</sup> Ina Hori urubia ta-giopiauti-rimo neio ro Idomu podo duriomoro ato, womu tato Eraparani sabowa ti-gorobai-rimo, goto se duriomoro abato na-gowamo.

<sup>7</sup> Ina ioudo gorowameai-rimo Kadesi sabowa to, ata masiro Eni Misipata. Ina neio ro amia Amareke urubia ibose to ta-giopiauti-rimo, ina

neio ro ibose ta-giopiauti-rimo Amore urubia,  
Hadadoni Tamara sabowa ato na-gorowomidiro.

<sup>8</sup> Kedoraome ro sirio sabowa urubia kiopiauti  
to na-giporeai, ina saro to boso iato gowou amia  
sabowa to, idaibo Sodom Gomora Adama  
Deboimi Bera, neio Sidimi gawagogo ato iato  
gororowea-rimo.

<sup>9</sup> Kedoraome eputa dubu peteibi mutu boso  
aimara ata sapuwo rido goi-rimo, amia 5 eputa  
urubia simara boso aimara urubia mutu ata  
sapuwo rido goi-rimo. Taie, nato  
gororopiauti-rimo.

<sup>10</sup> Sodom ra Gomora ra eputa dubu teibo boso  
aboudo na-gorowadau-rido, neitiro ro owea pua  
pusuru bobo na-gowamo, neito aise giretei-ma.  
Na-giretei-ma, taie pusuru ro aise gimopai-ma.  
Ina Adama Deboimi Bera eputa urubia imese  
gorowadau, podo gemidiai-rimo. Taie, podo ro  
iato aise giwasiai.

<sup>11</sup> Sodom ra Gomora ra rido imese sirio  
namabu Kedoraome ro piro to aise giwadau-ro.

<sup>12</sup> Ibose Roti, Abaram aramu e nou ro sarupo  
na gaubai, nou imese namabu sirio mutu aise  
gemowadau-ro.

<sup>13</sup> Ata dubu Sodom rido na-godau-ro nou ro  
gemowapotai Abaram ibo, 'Oro aramu Roti  
ta-owadau-mo, ibose nou namabu sirio  
ta-emowadau-mo, ata namabu ata emeserai  
pua!'

Abaram nou Hiburu gu dubu e. Iedi tau ro  
nato nou a-gomidiro awawo ota abato, Amore  
gu dubu Mamere, nou goto ato. Mamere nou

neama teibo masiro Ane ra Esekoro ra Abaram mutu neibi ibo oroworohutiti-bimo.

<sup>14</sup> Abaram ro na-girorowai iedi owera ro, nou woko urubia iato gidabuti, boso koroho etio ro garatamudiro-rimo. Taie, neio imese gibodoro-rimo saro rido, womu tato Dani sabowa to ti-gorowateai-rimo.

<sup>15</sup> Iedi duwo ro nato Abaram ro simara woko urubia iato gihoduti, ina boso imese gereredeae. Boso na-gereredeae, Kedoraome ro emedio pua, nou Abaram aboudo aise godau. Abaram ro saro rido imese gobodoro, na-gobodoro Damasikasi korohodorai, imese aise gobodoro womu tato Hoba sabowa, Damasikasi sapuwo ato.

<sup>16</sup> Taie, Abaram ro imese giapopo-ro mamio, amia urubia, namabu sirio Kedoraome ro piro to na-giwadau. Ibose nou ro ta-gapopo-ro Roti, nou namabu sirio mutu.

<sup>17</sup> Abaram ioudo na-gorowameai-ro, Sodom eputa dubu imese gou nou aboto eremowauti ri Sabe gawagogo ato. Iedi gawagogo ro ata masiro Eputa Dubu gawagogo.

<sup>18</sup> Ina Merikisedeke ro iato gowea Abaram, nou Sarema eputa dubu e, nou turi dubu e Morobise Godi ohu ato na-omidiro-die nou sapuwo to. Nou ro iato giwou beredi waini Abaram aboto,

<sup>19</sup> ina owera to korosa iato gaiwai ibo, 'Morobise Godi ohu ato na-omidiro-die nou ro gisioidiro-ma toboro ra duriomoro ra, nou ro nakara se oro korosa ba-mowai.

<sup>20</sup> Oro Morobise Godi ohu ato na-omidiro-die nou ro gowarebai boso ato nasa rubi na-giopiauti, noudo ie nou ba-demowabu!'



Taie, Abaram 10 kere gabogabo to namabu sirio iato gihoduti, nou beda namabu giwou-ro boso aboudo, ina kaupoti kere nou ro Merikisedeke gomia.

<sup>21</sup> Sodom eputa dubu ro iato gutura Abaram aboto, 'Mo simara urubia se demowameai-ro Kedoraome ro na-giwadau, namabu marasio, oro do ie!'

<sup>22</sup> Ina iato Abaram ro ibo, 'Morobise Godi ohu ato na-omidiro-die nou sosoro gabo ato, mo a-neremowotouti

<sup>23-24</sup> ibo oro mo ro ata namabu ata owomidai-ri pua, idaibo tamaka hodo kainai, pausumi beda namabu ra na-niwameai-ro mo ro orobai-ri pua. Kaupoti oro ohona sapuwo nimo ro ta-niho-rimo, mo boso urubia mutu. Saro rido oro modobo pua keremowauti ibo, "Abaram mo ro auna ta-nowai namabu to." Mamere neama teibo mutu Ane ra Esekoro ra neibi se ba-dimapepai-ibi namabu, mabu mo neibi ro nowarebai-birimo boso ato.'

## 15

*Iawe ro hodo nato gasaubiai-ro Abaram aboudo*

<sup>1</sup> Abaram hiwo sosoro na-gorobu Iawe owera nato garo-ro nou aboto. Nou ro ibo, 'Oro tere na ie, oro moro anama-owasiouti-ri imese ubauba aboudo, idaibo boso aboudo, beda sosoro tanaro ra oro ro nama-isioidiro-ri, mo keba se anama-oroho-ri oro owasiouti na ie. Oro meana auna se ama-iauri-ri mo aboudo.'

<sup>2-3</sup> Abaram ro masawe mutu iato gutura ibo, 'Iawe, oro mo eputa dubu e, oro umoro pua ra ibo mo mere tato ie? Mo nama-araburai-ri, mo

edi namabu sirio ro mo woko mere Eriesa,  
Damasikasi sabowa dubu, nou ro  
ama-irahidimai-ri.'

<sup>4</sup> Iawe ro ibo, 'Abaram, oro edi woko mere ro  
ibo pua nou ro kirahidimai oro edi namabu sirio  
ro, oro ia simara mere nou ro ama-irahidimai-ri.'

<sup>5</sup> Taie Abaram parai moto rido Iawe ro iato  
gowosuruwo-ro. Nou ro ibo, 'Toboro  
ma-demawota ma-diwia beda mutu kiboni ro  
orowotoi-die, oro ro modobo ra kioputi? Oro edi  
aramio merebusere ro, kiboni sosoro sipu ibo  
ama-irowomidiro-ri nedi sopo ro nato.'

<sup>6</sup> Nou ro beda owera garo Abaram ro aise  
gimibiria. Ina noudo ie, Abaram Iawe ro mea  
tuputupu dubu to gapoi, mabu nou ro Iawe edi  
owera ro aise gimibiria.

<sup>7</sup> Nou ro ina iato gutura Abaram aboto ibo,  
'Mo Iawe ie, nedi goto ro oro anama-omia-ri, oro  
mo ro nou ri nowou-ro Uri sabowa rido,  
Babironia duriomoro ato na-owamo.'

<sup>8</sup> Taie, Abaram ro ibo 'Iawe, oro mo eputa  
dubu e, mo umoro beda sosoro to anama-oi-ri  
ibo nedi goto ro mo goto to ama-ararapoi-ri?'

<sup>9</sup> Iawe ro ibo Abaram aboto, 'Netewa didi  
kisimisi namabu Peteibi neibi diwoubi-ro mo  
aboto, idaibo orobo burumakau, orobo nanigosi,  
dubu sipisipi, dumu pawa teibo mutu.'

<sup>10</sup> Abaram ro imese giwou-ro iedi namabu  
sirio ro. Nou ro turi ato giapepe, burumakau  
na-gapepea sapusapuwo giedea-ma. Nanigosi  
na-gapepea, kere teibo sapusapuwo giedea-ma.  
Sipisipi na-gapepea sapusapuwo giedea-ma.  
Taie, neio imese giamo. Dumu teibo

ta-giwou-marou nou ro iapepea-ma pua, imese giamo-ma momuo se.

<sup>11</sup> Taie iato giriai ro edi dao ro na-giwia-rimo, neio aise giroruwo-ro dao iho ri, kaupoti Abaram ro aise gimabodoidiro.

<sup>12</sup> Saiki mea se oriodoi pua, Abaram norou nato gutuwa, pamo sosoro gorobu, sisibo ro nato aise gahidimai norou maumo ato.

<sup>13</sup> Taie, Iawe ro nato garo-ro Abaram aboto ibo 'Oro umoro ba-miamo ibo oro merebusere, aramio, neio edi merebusere ro apira urubia sosoro ama-irowomidiro-ri ata duriomoro ato. Neio goto abeamio ro ubauba se amadimi-iworohuti-ri, mibo woko amadimi-isioidiro-ri, ina amadimi-iado-ri, womu tato 400 kisimisi namadimo-oroporeai-ri. Iedi duriomoro urubia ro oro aramio merebusere ubauba se amadimi-iworohuti-ri.

<sup>14</sup> Mo Iawe ie, ubauba wisa anama-aiwai-ri neio aboto. Duriomoro urubia ro namadimo-owea-ri nedi ubauba wisa ro, oro aramio merebusere, sirio namabu mutu amadimo-osuruwo-ri.

<sup>15</sup> Abaram, oro oromano ia ro nama-orobai-ri, oro mea miro mutu nato ama-araburai-ri.

<sup>16</sup> Oro nasaio neio samo to orowameai-ri pua nedi duriomoro ro neito, mabu Amore urubia nedi duriomoro nato na-worowomidiro, neio ro ubauba tanaro egea mere se tisioidiro-dumo. Neio Godi ro womu ta-gimedea ubauba wisa kimidai aboto simara ubauba tanaro sapuwo to. Iedi mako ro neio ro namadime-emasaudai-ri, taie neio nato anama-iwagare-ri nedi duriomoro ro neido.'

<sup>17</sup> Saiki na-goriodoi, duwo ta-gereredea. Ina netewa teibo namabu teibo ro gereredea-rido. Ata anaripi ie gahuta ro gioro, ata turupina ie pina mutu, neitiro aise godoro-rido dao turituri to. Nedi tanaro ro Godi ro nou hodo kasaubiai tanaro koko neito gowai.

<sup>18</sup> Nedi saiki ro nato lawe ro hodo nato gasaubiai-ro Abaram aboudo. Nou ro ibo, 'Sapuwo womu Isipi duriomoro, ina sapuwo womu Iupereitisi oromo, iedi goto gebari ro turi ato na-owamo oro aramio merebusere nou nimapoi. Nedi goto ro abora sirio urubia goto ie,

<sup>19</sup> idaibo Ken urubia, Kenisi urubia, Kadimoni urubia,

<sup>20</sup> Hiti urubia, Perese urubia, Reha urubia,

<sup>21</sup> Amore urubia, Keineni urubia, Girigasi urubia, Iebusi urubia, neio goto ie. Taie.'

## 16

### *Isimere nato goroto Haga ro*

<sup>1</sup> Abaram 10 kisimisi to na-gomidiro Keineni duriomoro ato, neitiro merebusere tato imidirotiti-do, sarupo besere Haga ta-gaubai Isipi duriomoro rido Sarai ro, nou mutu imidirotiti-bimo.

<sup>2</sup> Ina ata tau ato Sarai ro iato gutura Abaram aboto, 'Mo lawe ro ta-nodiobo mere kirotuti aboudo. Oro mo wisa tato woko besere mutu ba-dirobuti-ma, mo sapuwo to mere nou ro anama-emowahau-ri.'

Sarai ro beda owera garo Abaram aboto, nou ro aise gomidai.

<sup>3-4</sup> Taie Abaram Haga mutu iato irobotiti-ma womu tato Haga niro ti-gowea. Taie, Haga

umoro na-goi nou niro ie, nou auna se geremowabu, woko masawemasawe isioidirotiti.

<sup>5</sup> Taie, iato Sarai ro ibo, 'Abaram, oro abato owamo ubauba. Iawe ro na-niauri-madie neitiro etu ubauba ra oro ra mo ra, mabu oro ro Haga ubauba ta-gowai.'

<sup>6</sup> Ina Abaram ro ibo 'Oro wisa tato woko besere ie. Simara se ba-doworohuti!'

Sarai ro ubauba se nou ri oworohutiti, kado, kemaruti, mabu nou keremowabu tanaro isioidirotiti Sarai aboto. Ina Haga nou mabu rido godau tumu to.

<sup>7</sup> Iedi tumu to na-godau, goto se gowamo, obo sosu se gosuruo-ro, Suru gabo bara ato, Kadesi ra Beredi ra turituri ato.

Taie, Iawe sowake urio ro Haga nato gowea,

<sup>8</sup> iato gemodowa, 'Haga, oro Sarai wisa tato woko besere ie. Oro boido ra, ina boito ama-ou-ri?'

'Mo a-nodau-die eputa orobo aboudo.'

<sup>9</sup> 'Dorowameai eputa orobo aboto, nou woko ba-demesioidiro!

<sup>10</sup> Oro aramio nasaio mo ro anama-omio-ri, urubia ro modobo pua kioputi aboto.

<sup>11</sup> Oro mere ama-oroto-ri masiro Isimere, ibo owamo "Godi ro idobi ta-gemororowai".

<sup>12</sup> Iedi mere ro urubia tato moro ato ama-irohotiti-ri, urubia nou ro ama-iadotiti-ri, ina nou urubia ro amadima-adotiti-ri, nou simara karima borubi mutu ama-iradotiti-ri.'

<sup>13</sup> Haga a-gimaragoidiro ibo 'Mo ro Godi se a-nowea ra? Mo nou ro ti-niauri-die.' Ina noudo ie Haga ro masiro to gapoi ibo 'Oro Godi ie, mo oro ro ti-niauri-die.'

<sup>14</sup> Ina noudo ie urubia ro iedi obo bobo ro nedi masiro ro neito kasoro 'Keremiro Dubu Na-womidiro Mo Nou ro Niauri-die.'

<sup>15-16</sup> Taie, Abaram 86 kisimisi na-girobai, nou sapuwo to Haga ro dubu mere nato goroto, Abaram ro masiro a-giduti Isimere to.

## 17

### *Isabuna dubu simara takamai kasiai kuriai*

<sup>1</sup> Abaram 99 kisimisi ro na-gorobai, Iawe nato gorowawea-ro nou aboto. Iawe ro ibo, 'Mo nakara se nou e pupuwo ia Godi. Mo owera se ba-dirowidiro, ibose mea tuputupu tanaro se ba-disioidirotiti,

<sup>2</sup> ina oro aramio merebusere sirio anama-omiotiti-ri. Mo ro edi hodo ro oro aboudo na-nebuai, koko a-nowai.'

<sup>3</sup> Godi Abaram ro na-gowea, nou sopu to aise garaburuti, sosoro woidomari aise giborea goto to. Godi ro ibo nou aboto,

<sup>4</sup> 'Abora nedi tau ro nato mo ro hodo a-nebuai oro aboudo, oro aramio merebusere anama-omio-ri, sipu ia anama-emowaititi-ri.

<sup>5-6</sup> Oro Abaram pua, abora oro orio masiro a-nomia, Aberaham, mabu sirio duriomoro urubia nama-irowomidiro-ri, oro mo ro neio keba abera to a-napoi, sirio duriomoro urubia oro aboudo sipu amadimo-orobodorouti-ri. Oro aramio merebusere imese sirio amadimo-oi-ri, amia eputa urubia to amadima-arasoro-ri.

<sup>7</sup> Mo ro nedi hodo ro na-nebuai-ro oro aboudo, mo ro koko a-nowaititi, womu tato womu tato imese ama-owamotiti-ri. Mo oro do ie, ibose oro aramio merebusere mo neio do ie.

<sup>8</sup> Nedi Keineni duriomoro ro oro nato na-womidiro abora apira dubu sosoro omidiro, abora oro do ie, oro aramio merebusere neio do ie, neio ro irowomidirotitiwai ri Keineni duriomoro ato, ina ido mo neio do ie.'

<sup>9</sup> Godi ro ina ibo Aberaham aboto, 'Nedi kemasaubiai oweru ro mo ro abora na-naro oro aboto, koko se nou se ba-dorobidirotiti. Oro dubu aramio sirio mutu koko se nou ba-mirobidirotiti-mo nedi kemasaubiai oweru ro.

<sup>10</sup> Abora nedi tau ro nato mo edi kemasaubiai oweru ro neito dirowidiro-ro. Oro dubu simara takamai ato isabuna nama-owamo-ri, oro mo do ie, oro hodo imese nemasaubiai mo ro. Imese sirio dubu oro moto ato na-orowomidiro oro ia mutu, nio imese sirio se dubu simara takamai ba-miwasio-mo ba-miworiouti-mo.

<sup>11</sup> Oro dubu aramio ido nama-irowomidiro-ri neio ibose ba-miwasio-mo ba-miworiouti-mo.

<sup>12</sup> Ibose oro moto urubia abato mere kainai mamu ro koroto ato, 8 saiki ro na-worobai, edi mere kainai ro dubu simara takamai aise gi-emasiai-ri iato gi-emuriai-ri. Imese sirio dubu mere kainakaina oro moto ato na-orowomidiro oro ro ibo ba-diawatiti. Oro wisa tato woko dubu mere oro ro mani to na-gahodorai-ro, nou ibose ba-dowati dubu simara takamai kasiai kuriai.

<sup>13</sup> Etio ra durupi ato na-iamo isabuna, neio aboudo mo hodo ta-nebuai-ro. Iedi hodo ro kebuai imese tau ama-owamotiti-ri.

<sup>14</sup> Etio ra dubu simara takamai kiasio tato kioriouti tato, io neio aboudo hodo mo ro isaubo pua, mo gu urubia pua, mabu mo hodo neio ro gasiouti-rimo.'

*Godi ro gemowapotai Sera mere ama-oroto-ri*

<sup>15</sup> Godi ro iato gutura ina Aberaham aboto  
'Oro orobo Sarai to asoro ate, Sera to ba-dasoro.

<sup>16</sup> Nou korosa mo ro anama-owaititi-ri, ina mo ro nitiro dubu mere anama-imia-mari. Sera keba mamu to amadima-asoro-ri sirio duriomoro urubia ro, neio amia eputa urubia to amadima-ararasoro-ri.'

<sup>17</sup> Aberaham ro na-girorowai iedi oweru ro, nou woidomari aise giwaposowa sopu to, iato nou gaga girorouti. Nou ro ibo gimaragoidiro, 'Mo aupise 100 kisimisi ro korobai, mo orobo ibose, 90 kisimisi ie. Nou idaibo tau ato modobo pua mere koroto aboto.'

<sup>18</sup> Taie Godi nou ro iato gemodowa ibo, 'Ina beda sosoro ra Isimere? Isimere ro modobo ie mo namabu sirio nou ro kirahidimai.'

<sup>19</sup> Ina nou Godi ro iato gemowameai, 'Sera ro ama-oroto-ri dubu mere oro sapuwo to, Aisaki to ba-diduti, ina mo ro hodo anama-asaubiai-ri nou aboudo, ibose nou aramio merebusere mutu, ata ro asiai-ri pua, sirio tau ama-owamotiti-ri.

<sup>20</sup> Ina Isimere korosa anama-owaititi-ri, nou mo ro aramio merebusere sirio anama-omiotiti-ri. Nou aboudo 12 gu eputa urubia to amadima-ararasoro-ri. Oro oweru Isimere sapuwo to mo ro tau kirorowai ie,

<sup>21</sup> kaupoti Aisaki nou e hodo nou aboudo anama-ebuai-ri. Abora nou pua nedi kisimisi ro, maumo ato na-owamo-die oro sapuwo to mere Sera ro ama-oroto-ri.'

<sup>22</sup> Taie, Godi oweru karo na-goporeai, nou ro Aberaham aise gemeserai.

<sup>23</sup> Iedi atu saiki ro nato Aberaham ro iedi oweru ro na-girorowai, Godi ro beda oweru garo-ro nou ro aise gisioidiro. Nou mere



Isimere, nou ia daro nou moto ato beda kiaubo dubu ro gorowomidiro, amia kiaubo urubia ro na-girotuti-rumo dubu mere, neio imese Aberaham ro dubu simara takamai kiasio, taie aise giworiouti.

<sup>24</sup> Aberaham 99 kisimisi na-gorobai,

<sup>25</sup> ibose nou mere Isimere 13 kisimisi na-gorobai,

<sup>26</sup> neitiro aboto atu saiki ato aise gororosiodiro nedi tanaro ro, dubu simara takamai kasiai kuriai.

<sup>27</sup> Ina ibose Aberaham moto urubia abato beda dubu sirio ro gorowomidiro, ina neio maumo ato dubu mere wisa tato woko mamio ro na-girotuti-rumo, ibose dubu sirio mani to Aberaham ro na-giahodorai-ro, neio aboto nedi tanaro ro nou ro gororosiodiro, dubu simara takamai kiwasio kiworiouti.

## 18

*Godi ro Aberaham ina gemowapotai Sera mere ama-oroto-ri*

<sup>1</sup> Aberaham ro dubu simara takamai kiasio na-giporeai, nou aise gomidiro Mamere ato. Mamere ato awawo ota neio ro irowotoititi.

Taie, ata saiki lawe nato gorowawea sowake urio teibo mutu, paea dubu peteibi sosoro gou-birimo Aberaham aboto. Aberaham saiki turi ato parai moto magere damo ato gomidiro.

<sup>2</sup> Urubia dubu peteibi nou ro nato giwiai-ibi na-gou-birimo, nou aise gerebidiro iato gimarario-ibi, taie nou kauhio teibo to girimusubua, sosoro woidomari aise

giwaposowa goto ato, mabu nou ubi ie kowawea ibo 'Nibi awawo ie, mo kainai ie'.

<sup>3</sup> Ina iato Aberaham ro aise gimagege-ibi, 'Mo nibi buro ro orohodorai-ri pua, saiki auna ie!

<sup>4-5</sup> Domi-birimo ota duwoduwo ato, sebesebe nato deremasebidiro-birimo, ido to amabimo-ou-ri, keba se obo mimiapo-ibiro sairo iwiouti na, iato ohona kainai amabimi-iho-ri.'

Neibi ro Aberaham oweru ubi to gomidai-birimo,

<sup>6</sup> iato Aberaham aise garatea Sera emowapotai-ri sirio beredi isioidiro-ri.

<sup>7</sup> Nou imese gou mea burumakau dawade nou imeribai-biri, taie imese gowou-ro woko dubu aboto emopia ri, apira urubia iho na. Aberaham woko dubu ro edi ohona ro mea mino to gisioidiro neibi iho na.

<sup>8</sup> Taie, Aberaham ro iato gimowou-bi burumakau dao, burumakau nono isi, ata ohona mutu. Iedi dubu peteibi ro Aberaham ro aupise gimotoi-ibi, neibi kiwarebai-ibi sapuwo to.

<sup>9</sup> Iato neibi ata ro Aberaham nato gemodowa, 'Sera boira?'

Aberaham ro ibo, 'Tomidiro-die, parai moto ato.'

<sup>10</sup> Iawe ro ibo, 'Kaupoti kisimisi saro gabo ato mo anamadi-owameai-ri, iedi tau ro nato Sera nou dubu mere ama-oroto-ri.'

Ina Sera ro piro se gimotoi-ibi parai moto magere damo ato, oweru gare neido gimedeai-ibi na-geremowauti-birimo.

<sup>11-12</sup> Iedi oweru ro Sera ro na-girorowai nou gaga iato giroroutiai, ina iato gimaragoidiro, 'Keba se domere ta-nomidiro. Mo abora modobo

pua mere niro mutu koroho, ina mere koroto aboto. Mo abere ie. Mo uramu Aberaham oromano ie.' Sera mea se imibiria pua iedi dubu peteibi ro beda owera garo-birimo. Nou umoro ta-goi ibo nou sogomi ro ta-gasesere.

<sup>13</sup> Iawe ro ibo Aberaham aboto 'Mabu boira Sera gaga na-iroroutiai?

<sup>14</sup> Morobise ie mo aboudo imese tanaro sirio koko pua. Ido mo anamadi-orowameai-ri kaupoti kisimisi saro gabo ato.'

<sup>15</sup> Taie, Sera tere ro aise gorobai, nou a-gerematimai ibo, 'Mo gaga iroroutiai pua.'

Iawe ro ibo, 'Oro gaga ta-iroroutiai!'

<sup>16</sup> Taie, neibi imese gaimai-birimo Sodom to, Aberaham mutu. Nou ibo gimaragoidiro egea mere se nama-iwaboi-ibiri ipi ato nama-imeserai-ibi.

### *Aberaham a-gararatoro Sodom sabowa sapuwo to*

<sup>17</sup> Iawe iato geremowagomea nakara se, 'Aberaham aboudo mo ro iwopirua-ri pua edi tanaro ro mo ro nama-isioidiro-ri Sodom sapuwo to.

<sup>18</sup> Nou edi aramio merebusere ro pupuwo amadimo-oi-ri, neio ro auna sipu amadimi-iwia-ri. Mo ro korosa anama-aiwai-ri Aberaham aboto, ina ioudo ama-orobodorouti-ri imese erere owera urubia aboto.

<sup>19</sup> Aberaham mo ro narapoi, nou simara merebusere aramio mea se kiwaboi aboto. Nou ro neio ama-itamudiro-ri mo ubi tanaro kisioidiro aboto, mea tuputupu tanaro kisioidiro aboto, ibose tanaro modobomodobo ato kisioidiro. Ina mo ro beda owera nemasaubiai

Aberaham aboudo nedi tanaro ro nou sapuwo to anama-isioidiro-ri.'

<sup>20</sup> Ina lawe ro iato gutura, 'Mo ro sirio ubauba owera kirowidiro ie Sodom ra Gomora ra sapuwo to, urubia iato na-orowomidiro imese ubauba ia ie. Ubauba tanaro auna se isioidirotiti-dumo,

<sup>21</sup> mo nakara se anama-odori-ri neio iwia ri, ubauba morobise to a-isioidiro-dumo ra?'

<sup>22</sup> Sowake urio teibo paea dubu teibo sosoro gaimai-rido Sodom sabowa to, Aberaham neitiro ro aise gemeserai-rido kotoi moro ato lawe sosoro gabo ato.

<sup>23</sup> Aberaham owera mutu iato gerewesegerai 'Oro ro gabo a-gosioidiro ra Sodom urubia kipisiamuti aboto, ubauba urubia meamea urubia mutu atu se?

<sup>24</sup> Ina oro ro iato nama-iwia-ri 50 meamea urubia, Sodom sabowa ama-opisiamuti-ri ra, iedi 50 meamea urubia neio mutu?

<sup>25</sup> Morobise ie, iedi 50 meamea urubia ro neio sapuwo to Sodom sabowa oro ro ama-arasogoro-ri, opisiamuti-ri pua. Oro auna eputa dubu nou se ie, imese duriomoro sirio oro ro iaurititi. Oro ro modobo ie urubia mea se kihoduti.'

<sup>26</sup> Ina lawe ro ibo, 'Mo ro nama-iwia-ri 50 meamea urubia Sodom sabowa ato, neio sapuwo to mo ro edi sabowa gebari ro ubauba owai-ri pua.'

<sup>27</sup> Aberaham ro lawe ina iato gemodowa, 'Mo oro ro nedi goto ro noudo nosioidiro, mo dorogora se dubu e,

28 kaupoti mo ubi ie oro aboto kararatoro. 50 kowasomai tato, 45 meamea urubia kawakawa nama-orowomidiro-ri, oro ro edi sabowa ro ama-opisiamuti-ri ra?’

Ina Iawe ro ibo, ‘45 mo ro nama-iwia-ri, mo ro iedi sabowa ro opisiamuti-ri pua.’

29 Ina Aberaham ro ibo, ‘40 meamea urubia nama-iwia-ri, iedi sabowa ro oro ro ama-opisiamuti-ri ra?’

Iawe ro ibo, ‘40 meamea urubia mo ro nama-iwia-ri, iedi sabowa ro mo ro opisiamuti-ri pua.’

30 Ina Aberaham ro omuomu se garowado Iawe aboto ibo, ‘Modobo pua oro serawo koi, mo tere ie. Ina 30 meamea urubia oro ro nama-iwia-ri Sodom sabowa ato, oro ro iedi sabowa ro ama-opisiamuti-ri ra?’

Ina Iawe ro ibo, ‘30 meamea urubia mo ro nama-iwia-ri Sodom sabowa ato, iedi sabowa ro mo ro opisiamuti-ri pua.’

31 ‘Mo dorogora se dubu e, kaupoti mo ubi ie ina oro aboto kararatoro. 20 meamea urubia nama-iwia-ri, oro ro Sodom sabowa ama-opisiamuti-ri ra?’

Iawe ro iato gemowameai ibo, ‘20 meamea urubia mo ro nama-iwia-ri Sodom sabowa ato, iedi sabowa ro mo ro opisiamuti-ri pua.’

32 Aberaham ro ina iato gutura ibo, ‘Mo ro iana oweri nama-aro-ri, mo tere ie oro serawo koi. 10 meamea urubia oro ro nama-iwia-ri iato, iedi sabowa ro oro ro ama-opisiamuti-ri ra?’

Ina Iawe ro ibo, ‘Mo ro 10 meamea urubia iato nama-iwia-ri, mo ro iedi sabowa ro opisiamuti-ri pua.’

<sup>33</sup> Iato Iawe owerā karo na-goporeai, nou ro Aberaham imese gemeserai, taie Aberaham aise gorowameai-ro simara parai moto to.

## 19

### *Godi ro Sodom ra Gomora ra gipisiamuti-ma*

<sup>1</sup> Iedi sowake urio teibo ro paea dubu teibo to keba se Aberaham abato na-gomidiro-rido, neitiro ioudo gireribua-rido Sodom sabowa iauri ri, ina adimo duwoduwo ato gorowateai-rido ito. Neitiro Roti ro iato giwia-ma goto didiri ato, urubia beda moro ato iradabutiti-dumo. Roti ro na-giwia-ma, nou imese gou neitiro aboto, nou sopo to aise garaburuti, sosoro woidomari goto to aise giwaposowa.

<sup>2</sup> Roti ro aise giramairiai-ma, nou ro ibo, 'Nitiro auna dubu teibo ie, dou-rido mo moto to, sairo iato amadi-iwiouti-ri, ina duwo kaupoti ama-irobu-mari, kowaroho duwoduwo neido amada-aimai-ri.'

Neitiro ro ibo, 'Marasio, neitiro nato anama-irobu-mari goto didiri ato.'

<sup>3</sup> Roti ro inaina aise gimaidodorowado-ma, neitiro koko se egea se giamo-ma. Taie, neitiro saro to iato gireribua-rido, atu se imese gou-birimo Roti mutu nou moto to. Iato Roti ro ohona na-gimesioidiro-ma, beredi isiti tato gimitai-ma, taie neitiro ro aise giho-rido.

<sup>4</sup> Norou aboto aupise ie kou, imese Sodom dubu, orio domere, nogenoge, nato gou-rimo Roti aboto. Roti moto dubu sirio ro ta-gemowaperai-rimo,

<sup>5</sup> neio ro ibo 'Oro ro iedi apira dubu teibo ro na-iwodoro-ma, nimo ubi ie neitiro kiworohuti-ma poro rido. Diwosuruwo-marol'

<sup>6</sup> Roti iato gosuruo-ro, magere huru rido aise gopai.

<sup>7</sup> Taie, nou ro ibo 'Nio mo namuturubi ie. Idaibo ubauba tanaro kisioidiro modobo pua neitiro aboto.

<sup>8</sup> Modobo ie neitiro mo ro mea se kiauri-ma, mo ubi tato ie ata ubauba kowea neitiro abato. Mo besere irimo teibo tomidiro-do, neitiro umoro pua amia dubu mutu koroho, neitiro irimo teibo ie, nio ubi ato mo ro anamadi-iwosuruwo-mari, simara se ba-diworohuti-mamo.'

<sup>9</sup> Neio ro ibo 'Oro apira dubu e, sabowa dubu pua! Oro gebari pere ra, a?! Oro daragare! Nimo gabo dimatateai-ro! Auna ubauba apira dubu teibo ro amado-owea-ri nimo aboudo, ina ibose auna ia ubauba oro ro ama-owea-ri nimo aboudo!'

Neio serawo mutu Roti aboto iato gorowioro-rimo, magere na-gohoiouti-rimo esebea ri gemiri-rimo.

<sup>10</sup> Sowake urio teibo ro magere iato godobura-rido, Roti tu rido aise gopodia-rido imese gowodoro-rido, taie magere iato aise gopai-rido.

<sup>11</sup> Iedi dubu sirio ro, orio domere nogenoge neio idomari pogo aise gimowai-rido sowake urio teibo ro, bana se gorowararioidiro-rimo, neio ro modobo pua magere kowea aboto, egea se gowaseidiro-rimo.

12-13 Taie, sowake urio teibo ro ibo, 'Nedi sabowa ro anamado-opisiamuti-ri. Mabu nedi sabowa ro nato ubauba se etio iworohuti-dumo neio edi iamo ro lawe ro timewidiro-die. Oro aboudo na-orowomidiro urubia, merebusere, emapeamio, modobo ie oro ro kimowapotaidiro neio hio to neido aragare ri. Tuturu to owamo-ri pua Sodom ubauba anamado-owai-ri, lawe ro nou ri nimeiriai-madie.'

14 Roti imese gosuruwoidiro-ro hio to emapura teibo imowapotai-mari, besere teibo gabo iedi dubu teibo aboto gimowou-ma. Nou ro ibo 'Samo to daragare-do sabowa rido, lawe ro aupise ama-opisiamuti-ri!'

Kaupoti neitiro ibo gimaragoidiro-rido korowirowera ie.

15 Saiki banibani na-giwotouti-ro, sowake urio teibo ro Roti iato gowoubua-rido, 'Samo to deribua! Dosuruwo neido! Oro orobo, besere teibo mutu dosuruwo-bimo! Modobo pua oro ubauba ro kowea Sodom kopisiamuti ato.'

16 Roti a-gorodiobuti, koko se gowamo moto kemeserai aboto. Sowake urio ro Roti tu rido korobai orobo mutu, ina ata sowake urio ro besere teibo kiobai-ma, neibi imese gosuruwo-birimo, iato gorowadau-birimo neibi simara keremiro sapuwo to. Roti, nou orobo, besere teibo mutu, lawe edi nirimagare ro nou gimowaweai-ibiro.

17 Sowake urio ata ro ibo, 'Podo ro ba-miwasiai-ibi, nibi modobo pua durio goto ato karaperai, nedi moro ro imese anama-opisiamuti-ri. Nibi huru to imetere ate. Hio to se ba-dou-bimo podo to!'



<sup>18</sup> Roti ro ibo, 'Auna dubu, oro auna nirimagare ta-owawea-ro mo aboto.

<sup>19</sup> Mo keremiro oro ro nemowameai-die ubauba aboudo. Mo modobo pua nitiro ro na-nemaduduro-do hio to kou podo kemidiai aboto. Mo ipi ato ubauba ro anama-owea-ri.

<sup>20</sup> Sabowa kainai aupise towamo-die, mo modobo ie iato karaperai.'

<sup>21</sup> Taie, sowake urio ro ibo 'Io, iato ba-daraperai iedi sabowa kainai ro ubauba owai-ri pua.

<sup>22</sup> Oro ito dirario samo to. Iedi sabowa ro ito nama-orowateai-ri, taie Sodom mo ro nato anama-opisiamuti-ri.' Iedi sabowa kainai ro masiro Soa, Hiburu owera to 'Kainai ie'.

<sup>23</sup> Saiki ta-gidiai-ro, Roti bi nato gorowateai-birimo Soa sabowa to.

<sup>24</sup> Tuturu to pua Iawe ro daroho sosoro era nou gemeiriai-ro toboro ohu rudo, era mio ro giretuti-ro,

<sup>25</sup> imese namabu sirio, idaibo urubia sirio, moto, sugamoso, ota, ata namabu ata emeserai pua Sodom ra Gomora ra ato, imese ubauba aise giwai. Ibose Iodeni gawagogo ato beda namabu ro gorowotoi, pari namabu, ota sirio, urubia mutu, imese aise gipisiamuti, ataata ararasoro pua.

<sup>26</sup> Taie, Roti orobo huru to na-gimeterai, nou damena gohi to aise gararapoi.

<sup>27</sup> Taie, Aberaham Iawe mutu beda moro ato geremowauti-rido owera edi goto ro nato, ata kowaroho Aberaham nato gou ito.

<sup>28</sup> Nou podo ohu rudo ioudo na-girarowea-ro, Sodom ra Gomora ra sabowa teibo iwia-mari, gahuta se giwia na-gioro-rimo, Iodeni gawagogo sapusapuwo rido.

<sup>29</sup> Taie, Godi ro iedi sabowa teibo ro ubauba ta-giwai-ma, kaupoti nou ro ta-gimaragoidiro Aberaham beda oweru garo nou aboto. Ina noudo ie Roti beda sabowa ato gomidiro Godi ro ubauba na-gowai, taie nou ioudo aise gowagare-ro.

*Moabi urubia Amoni urubia boido  
gororomidai-rimo*

<sup>30</sup> Roti tere ie Soa sabowa ato komidiro besere teibo mutu, ina neibi nou ri gou-birimo podo duriomoro to. Neibi ro nato gowea-birimo goto goro na-gaidiro-ro, taie neito aise godoro-birimo, iato imidiro-titi-birimo.

<sup>31</sup> Ata tau ato mabira ro neama iato gemowapotai, 'Neitiro abera oromano ro orobai. Amia duriomoro ato osio busere araremo-dumo, ina nato domere pua ie neitiro kiedea-ma aboto.

<sup>32</sup> Neitiro abera tuba sosoro obo momio-rido, mo mutu kirobu-ma, ina ata duwo oro mutu iato kirobu-ma, ibo anamado-owati-ri tuba sosoro obo anamado-omio-ri. Abera ro ama-irasomai-mari bamuai teibo neitiro abato. Modobo pua neibi masiro imese karatowouti aboto.'

<sup>33</sup> Iedi duwo ro nato iedi besere teibo ro neitiro ro abera tuba sosoro obo imese gomio-rido, taie iato mabira orobo ro gereredeadea, abera mutu imese girobu-ma. Iedi tau ro nato Roti umoro oi pua ibo keba besere

na-giraposoidiro nou abato, ibose nou beda tau  
ato geribua-ro.

<sup>34</sup> Ata saiki na-gowaroho, ina mabira orobo  
iato gutura neama orobo aboto, 'Mo abora duwo  
Idau mutu ta-nirobu-ma, ina momio-rido tuba  
sosoro obo, nedi duwo ro nato oro ro ama-ou-ri,  
nou mutu ama-irobu-mari, mo beda sosoro  
norowati. Idaibo sosoro tanaro to  
namado-owati-ri neitiro abera ro mere teibo  
ama-iwia-mari neitiro ato, ina neibi edi gu ro  
aratowouti-ri pua, imese ama-outiti-ri.'

<sup>35</sup> Taie iedi duwo ro nato neitiro ro ina iato  
gomio-rido abera tuba sosoro obo, taie neama  
orobo ro gaimai, nou mutu iato girobu-ma. Ina  
Roti umoro oi pua ibo saro besere  
a-giraposoidiro nou abato, ibose beda tau ato  
geribua-ro.

<sup>36</sup> Mabira niro na-gowea, neama ibose to  
gowea, neitiro simara abera ro gimasomai-ma.

<sup>37</sup> Mabira ro dubu mere goroto, masiro  
a-giduti Moabi to. Abora Moabi urubia  
na-orowomidiro, nou aboudo gorobodorouti  
sipu.

<sup>38</sup> Neama ro dubu mere ibose ti-goroto, masiro  
a-giduti Benami. Amoni urubia na-orowomidiro  
abora, Benami aboudo gorobodorouti sipu.

## 20

*Aberaham karasaubuti owera garo Abimereki  
aboto*

<sup>1</sup> Aberaham Heboroni sabowa  
na-gemeserai-ro, nou imese gou ata duriomoro

to masiro Negebi. Nou egea mere se iato gomidiro Kadesi ra Sua ra neitiro turituri ato.

Taie ioudo gou ata duriomoro to masiro Gera. Ina Aberaham orobo mutu neitiro Gera to na-gorowateai-rido urubia ro iato giwia-marimo.

<sup>2</sup> Taie nou ro orobo sapuwo to ibo 'Nou mo medera ie.'

Taie, Gera urubia ro ower a na-girorowai-rimo ibo Aberaham nou medera mutu ou-dioudo, neio eputa dubu Abimereki ower a nou aboto na-girarebai, taie nou woko rubi ito aise gimeiriai. Neio na-gou-rimo, Sera neio ro imese gorobai-rimo iato gowou-rimo Abimereki aboto.

<sup>3</sup> Taie, nou Abimereki abato na-gomidiro, Godi ro hiwo to ibo garo-ro, 'Oro pamo dubu e, oro ro iedi tanaro ro na-osioidiro, oro pamo ama-owe a-ri. Oro ro edi orobo ro na-gorobai, uramu mutu e.'

<sup>4</sup> Taie, edi tau ro nato Sera Abimereki mutu irobu-ma pua, ina nou ro ibo Godi aboto, 'Auna dubu, mo didi dubu e. Mo oro ro ubauba owai ate. Mo etou mabu rido namadi-owai-ri ubauba,

<sup>5</sup> mabu Aberaham ro ibo garo urubia sirio aboto, "Sera mo medera ie." Ina Sera ia nakara se urubia nou ro iato gimowapotaaidiro ibo, "Aberaham mo medera ie." '

<sup>6</sup> Godi ro ower a ina Abimereki aboto hiwo to iato gutura, 'Mo umoro ta-noi ibo oro nakara se umoro oi pua oro ro otou tanaro osioidiro. Oro gabo nou mabu ato ta-nowasiai. Oro ro iedi orobo ro kowarabu rasiri ie, oro orobo, merebusere, oro sowake urubia neio imese ba-gorowaburo-dumo.

<sup>7</sup> Io, iedi orobo ro Aberaham orobo ie, ba-demowameai. Nou mo ipusu owera dubu e, nou ro ama-araratoro-ri mo aboto oro sapuwo to, ina oro araburai-ri pua.'

<sup>8</sup> Ata kowaroho ato Abimereki norou aboudo na-geribua-ro, taie ata sowake dubu iato gotiodorai, nou simara gabamani woko urubia nou aboto ou ri.

Neio na-gou-rimo, Godi ro beda owera garo-ro hiwo to nou aboto, nou ro iato gimowauti. Neio ro na-girowai-rimo, auna tere aise goi-rimo.

<sup>9</sup> Abimereki ro Aberaham aboto owera iato gemeiriai nou aboto ou ri. Nou na-gou-ro, taie Abimereki ro ibo, 'Oro ro etou karasaubuti tanaro gisioidiro nimo aboto? Mo ro etou ubauba tanaro nosioidiro oro aboto?

<sup>10</sup> Mabu boira oro ro ubauba kowodoro mo duriomoro to? Oro ro modobo pua idaibo sosoro ubauba tanaro na-gisioidiro-die mo aboto. Mabu boira oro ro na-gosioidiro?'

<sup>11</sup> Ina Aberaham ro ibo, 'Mo ibo nimaragoidiro, "Urubia ro Godi emaragoidiro pua nedi duriomoro ro nato, ina nou rie mo urubia ro kopia rie Sera sapuwo to."

<sup>12</sup> Morobise ie nou mo medera ie, mabu neitiro kaupoti abera ie, mamu teibo se erere ie.

<sup>13</sup> Mo Godi ro nemowapotai-ro ibo "Oro abera duriomoro ba-demeserai." Iedi duriomoro ro na-nemeserai, mo Sera aboto ta-naro ibo, "Neitiro beda moro to kou ra, urubia ibo ba-dimowapotaidiro, 'Nou mo medera ie.' Oro nirimagare idaibo mino to ba-dowawuti-ro mo aboto."

<sup>14</sup> Taie, Abimereki ro Aberaham orobo aise gemowameai. Orobo na-gemowameai taie, Abimereki ro iato gomia sipisipi, burumakau, wisa tato woko urubia.

<sup>15</sup> Nou ro ibo, 'Ba-diraroweauti, nou mo duriomoro ie, oro ubi moro ba-darapoi, nato ba-dimidiro.'

<sup>16</sup> Taie, Abimereki ro ibo Sera aboto, 'Mo ro auna siriba mani ta-niaiwai oro medera aboto. Mo ro nou ri nosioidiro, mabu mo ubi tato ie urubia ubauba kimaragoidiro kiworohuti oro sapuwo to. Oro ro ata ubauba tanaro ata osioidiro pua.'

<sup>17</sup> Aberaham ro kararatoro owera iato garo Godi aboto, Abimereki edi moto urubia ro, nou orobo, nou busere ibose nou sowake busere, neio sapuwo to gararatoro.

<sup>18</sup> Neio keba se mere kirotuti gabo rido Iawe ro ta-giwatateai, kaupoti nou ro ina aise godobura-ro. Nou ro idaibo temeteme ta-gaiwai Abimereki aboto, mabu nou ro beda tanaro gosioidiro Aberaham orobo sapuwo to.

## 21

### *Aisaki goroto Sera ro*

<sup>1</sup> Iawe ro Sera mea se gowarebai nou ro kebase beda owera garo nou aboto, aise gororosoidiro.

<sup>2-5</sup> Taie, Sera niro aise gowea. Godi ro beda tau gemapoi, Aberaham nou 100 kisimisi na-gorobai, iedi tau ro Sera ro nato gemowahau Aberaham mere kainai. Iedi mere bamuai ro Aberaham ro masiro a-giduti Aisaki to. Taie,

Aisaki bamuai 8 saiki to na-gorobu, Godi ro beda oweru garo Aberaham aboto, nou ro aise gobodoro. Aberaham ro Aisaki dubu simara takamai nato gowasiai iato guriai.

<sup>6</sup> Sera ro ibo, 'Mo Godi ro kamade ta-nowai-ro nou ri nirorouti gaga. Etio ro amadimi-irowidiro-ri mo bamuai koroto oweru, neio ie mo ie nimo atu se gaga auna se anamadimi-irorouti-ri.

<sup>7</sup> Urubia ibo imaragoidiro-mo "Sera modobo pua Aberaham mere kemowahau aboto," kaupoti Aberaham oromano ro na-gorobai mo ro mere nato nemowahau.'

*Isimere mamu mutu gitiodorai-ma Aberaham ro*

<sup>8</sup> Aisaki buburubabo ro na-gorobai Aberaham ro kotopai ohona auna soriomu iato gosioidiro.

<sup>9</sup> Haga wisa tato woko besere na-gorobai-ro Isipi rido, Isimere Aberaham ro nou ato garasomai keba se. Sera ro na-gowea Isimere ro Aisaki na-gosobi,

<sup>10</sup> Sera ro ibo Aberaham aboto, 'Abora nedi wisa tato woko orobo ro mere mutu, neido diwagare-ma! Mo ubi tato ie oro ie mo ie neitiro korowaburai ato Isimere ro kirahidimai neitiro edi namabu sirio ro. Modobo ie neitiro simara ia mere Aisaki nou ro kirahidimai.'

<sup>11</sup> Aberaham ro nedi oweru ro na-girorowai, nou ubauba kimaragoidiro ro gorobai, mabu Isimere ibose nou mere ie.

<sup>12</sup> Taie, Godi ro ibo, 'Oro ubauba kimaragoidiro na ie, wisa tato woko orobo mere mutu, neitiro sapuwo to. Sera ro beda oweru aro-die, nou se dosioidiro. Mo ro beda oweru naru keba se oro aboto, Aisaki aramio

merebusere nedi duriomoro ro neio ro amadimi-irahidimai-ri. Aramio merebusere, korosa mutu, neio aboto anama-iaiwotiti-ri.

<sup>13</sup> Ibose wisa tato woko orobo nou edi mere ro, nou ro sipu ama-iwia-ri, mabu nou oro mere ie.'

<sup>14</sup> Saiki na-geredumudiro-ro Aberaham ro neitiro obo kimate-ma, ohona kimia-ma, taie imese gitiodorai-ma urubia tato moro to, iato irohotiti-do duriomoro masiro Besiba.

<sup>15</sup> Neitiro obo na-goroporeai, Haga ro mere aise gowomi ota mabu ato, Isimere iato idobi aise gemai. Haga ro ibo gimaragoidiro, 'Mo mere ama-araburai-ri, mo ro kiauri modobo pua.'

<sup>16</sup> Nou egea mere se na-gosiomai taie imese gomi, iato nou mere idobi gememai.

<sup>17</sup> Godi ro ta-gemororowai-ro mere idobi na-giroto, ina Godi sowake urio ro Adiri sabowa rido Haga ioudo gorumai-ro, 'Oro etou ro ari? Tere na ie, oro Godi ro temewidiro-die mere idobi na-iroto.

<sup>18</sup> Dowoubua, tu to dorobai-ro, sipu nou aboudo amadimi-isuruwo-ri.'

<sup>19</sup> Taie, Godi ro nou iato gemapoi obo bobo beda moro ato gomidiro. Taie nou imese gou obo iapo ri, mere obo iato godio.

<sup>20</sup> Isimere na-ororomaititi, nou Godi ro ta-iaurititi-ro. Nou urubia tato moro ato irohotiti, masiro Parani, nou auna umoro ie moporo to kipedu.

<sup>21</sup> Taie, Haga ro Isimere orobo Isipi duriomoro rido gemerebai-ro, nou ro nou gedea.

*Abimereki ra Aberaham ra Hodo  
Geremasaubiai-rido*



<sup>22</sup> Abimereki, Gera duriomoro eputa dubu e, ata tau ato nou simara boso eputa dubu Pikoro mutu neitiro atu se iato gou-rido Aberaham aboto. Neitiro ro ibo, 'Imese beda mutu tanaro sirio ra oro ro na-isioidiroititi, oro Godi ro owarebidirotiti-die.

<sup>23</sup> Abora Godi sosoro gabo ato oro ro hodo neitiro aboudo ba-demasaubiai-ro, ibo oro ro ama-isioidiro-ri meamea tanaro mo aboto, ibose mo merebusere aramio aboto. Oro ro modobo ie nirimagare tanaro kiwawuti mo aboto, ibose mo duriomoro urubia aboto, oro apira dubu sosoro na-imidirotiti neio abato. Oro mo ro keba se beda sosoro nirimagare nemati, mo oro ro wisa na idaibo sosoro nirimagare ba-demowapotai-ro.'

<sup>24</sup> Aberaham ro ibo 'Mo ro hodo abora a-nebuai nitiro aboudo.'

<sup>25</sup> Ina Abimereki mibo owera iato gomia Aberaham ro, obo bobo sapuwo to, 'Oro edi sowake urubia ro neio ro nowasiai-dumo obo kiaputi moro rido.'

<sup>26</sup> Abimereki ro ibo gemowameai, 'Mo umoro oi pua, mo oro ro keba se emowapotai pua.'

<sup>27</sup> Abimereki amia sipisipi burumakau iato gomia Aberaham ro, ina neitiro hodo imese geremasaubiai-rido, sapuwo Abimereki aboudo ie, sapuwo Aberaham aboudo ie.

<sup>28</sup> Aberaham ro 7 upi sipisipi kainakaina nou gihodowa Abimereki sosoro gabo ato.

<sup>29</sup> Abimereki ro ibo, 'Mo etou ri nemowou-die nedi 7 sipisipi ro?'

<sup>30</sup> Aberaham ro ibo, 'Dimidai buro nedi sipisipi kainakaina ro, oro urubia mutu umoro

nato amadimo-oi-ri ibo morobise ie nedi obo bobo ro mo ro noboba.'

<sup>31</sup> Iedi moro ro masiro Hiburu oweru to neito asoro-dumo Besiba, maumo owamo ibo, 'Hodo Kasaubiai Obo Bobo ie', mabu neitiro hodo to nato geremasaubiai-rido, Besiba ato.

<sup>32</sup> Taie, Abimereki imese gorowameai simara duriomoro to, nou simara boso eputa dubu mutu.

<sup>33</sup> Aberaham ro ota iato garo, ota masiro tamarisiki. Nedi ota ro Besiba ato gotoi, iato Iawe na-imidirotiti imese imese sirio tau, nou aboto Aberaham ro aise gararatoro.

<sup>34</sup> Taie, Aberaham tuturu tau to iato imidirotiti, nou apira dubu e Pirisitia urubia duriomoro ato, iedi duriomoro ro Abimereki ro na-iaurititi.

## 22

### *Godi ro Aberaham a-gowaibia*

<sup>1</sup> Aberaham nou apira dubu sosoro imidirotiti Pirisitia duriomoro ato, iedi tau ro nato Godi ro Aberaham kimibiria tanaro nato gemowaibia. Godi ro iato gutura nou aboto ibo, 'Aberaham!'

Aberaham ro iato gemowameai, 'Mo nou e.'

<sup>2</sup> Ina Godi ro iato gutura, 'Oro ia simara mere, natonato na-ematititi abora ba-dowou muso duriomoro to, podo na-orowotoi-die, duriomoro masiro Moraia. Oro ro iato ba-dopia, momuo se ba-dematowo-ro, mo ba-demowameai-ro beda podo nama-emapoi-ri mo ro, iato ba-dosioidiro!'

<sup>3</sup> Aberaham norou aboudo na-geribua-ro nou era iato giabuse, nou sowake dubu teibo kirobai-ma Aisaki mutu, nou doniki korobai,

namabu patu neibi ro na-geremododiai-birimo, doniki ohu ato kiaremuti, taie neibi imese gaimai-birimo.

<sup>4</sup> Taie, ata saiki neibi atu se gou-birimo, ina ata saiki na-gatamuai-birimo neido na-gou-birimo taie ipi ato imese gorodiobo-birimo. Iedi saiki ro nato beda duriomoro gemapoi Godi ro, nou ro muso rido neido gowea.

<sup>5</sup> Iedi sowake dubu teibo ro nou ro iato aise gidio-bo-ma, 'Nitiro nato domidiro-do, doniki diauri-do, neitiro ito anamado-ou-ri Godi emowabu rie, tinamadido-orowameai-ri neito.'

<sup>6</sup> Aisaki era patu aise gemamitiai Aberaham ro, taie neitiro imese gaimai-rido, neitiro na-gou-rido, Aberaham giri sipi ato ibose ti-gotoi, era upugo ata tu to gorobidiro. Neitiro na-gou-rido, ipi ato

<sup>7</sup> Aisaki ro ibo 'Idau, neitiro era patu, era upugo, nou mutu e, ina neitiro sipisipi boira? Beda sipisipi namado-opia-ri neitiro ro, nadi ato edea na, Godi aboto kaiwai sapuwo to? Neitiro sipisipi tato ie!'

<sup>8</sup> Aberaham ro ibo 'Godi ro anamadi-imia-mari neitiro sipisipi, kematowo sapuwo to.'

<sup>9</sup> Neitiro neido kou, podo to korowateai, taie, Aberaham nadi kitomuti, era nadi maumo ato kaduruti, taie Aisaki nou ro na-gowea kotoi, Aisaki nou ro kohiai, iato gatahiti. Nou ro na-gatahiti imese hodo to taie, aise gowou beda nadi gitomuti nato imese gowotodai, iato girisipi kemaubai,

<sup>10</sup> taie giri susura to ubi ie omua ri,

<sup>11</sup> ina Godi sowake urio ro ibo, 'Ei, Aberaham, omua ate!

<sup>12</sup> Dodiobo edi tanaro ro! Mo umoro ta-noi Godi oro ro temaragoidiroiti, oro mere emowairiai pua nou aboudo.'

<sup>13</sup> Aberaham na-giraroweauti, nou ro dubu sipisipi iato gowea, soso daimo ato na-gotoi, gaini karawia to ta-garagodeauti. Taie, Aisaki nou ro kowagare ioudo, nadi rido hodo na-gemapoduti taie, nou ro Aisaki aise gowotobowa, nou bobo ato Aberaham kiraumo sipisipi korobai, iato gopia nou ro, taie, nadi ato kede, era kowateai imese gematowea Godi aboto.

<sup>14</sup> Aberaham edi tanaro ro na-gosioihiro, taie iedi sopu ro masiro a-giduti, 'Iawe ro Iato Gaiwai', ibose abora urubia aro-dumo ibo, 'Iawe ro edi podo ro nato ama-imio-ri'.

<sup>15</sup> Iedi tanaro ro na-goroporeai, Godi sowake urio ina oweri iato gutura

<sup>16</sup> ibo, Iawe ibo aro-die nou aboto, 'Aberaham, oro simara mere oro ro orobai pua, oro ro emowairiai pua, oro ro aise aidodorai-die.

<sup>17</sup> Ina noudo ie mo ia simara masiro nasoro mo edi hodo kasaubiai oweri ro koko kowai aboto, ibo oro edi aramio merebusere ro nasaio neio imese sirio amadimo-oi-ri. Koriri iopu beda sosoro iamo, ibose kiboni na-orowotoi toboro ato, sipu idaibo sosoro amadimo-osuruwo-ri oro aboudo, mabu mo beda oweri nara oro mere sapuwo to, oro ro aise gosioihiro. Oro edi aramio merebusere ro nasaio boso aimara amadimo-oroho-ri erere durimoro to, neio ro

amadimi-iwasiti-ri, iato aise  
amadimi-irahidimo-ri.

<sup>18</sup> Imese urubia sirio mo aboto  
amadimo-orowaro-ri ibo, “Aberaham urubia  
aboto korosa beda sosoro iaiwotiti, ina idaibo  
korosa ba-diaiwo-ro nimo aboto.” Neio idaibo  
sosoro amadimo-orowarotiti-ri, mabu oro ro mo  
edi owera ro aise gosioidiro.’

<sup>19</sup> Taie iato neitiro ioudo na-gorowameai-rido  
sowake dubu teibo aboto beda moro ato  
gimeserai-marido, kimowapotai-ma taie, neibi  
imese gorowameai-birimo Besiba to, iato  
imidirotiti-bimo.

### *Nahoro urubia*

<sup>20</sup> Taie ata tau ata dubu ro iato giwasoro  
Aberaham aboto Nahoro dubu mere sirio  
sapuwo to. ‘Oro neama Nahoro nou merebusere  
sirio ie abora, Mirika ato girasomai.

<sup>21</sup> Keba mere Usi, ina nou saro ato na-gai-ro  
masiro Busi, ina nou abato Kemuere ie. (Nou  
abera Arama.)

<sup>22</sup> Ina arua dubu mere neio masiro Kesedi,  
Haso, Piridasi, Idarapi, Betuere.

<sup>23</sup> Betuere Rebeka abera ie. Oro edi neama ro  
Nahoro nou ro girasomai Mirika ato, ina 8 dubu  
mere nou ro girotuti.

<sup>24</sup> Ibose Nahoro ro sarupo besere ta-gedea,  
nou masiro Reuma. Ina iedi sarupo besere ro  
Nahoro ro nou ato girasomai-ibi dubu mere  
peteibi, neibi masiro Teba Gahama Tahasi ina  
Maka.’

## 23

*Sera pamo gowea*

<sup>1</sup> Sera nou nato garaburai Heboroni sabowa  
ato Keineni duriomoro ato owamo. Nou 127  
kisimisi to wimidirotiti.

<sup>2</sup> Aberaham ro Sera pamo karaburai  
na-gowea, nou auna idobi nou giroto.

<sup>3</sup> Idobi na-gemerete taie nou ro pamo aise  
gemeserai, nou imese gou Hiti urubia aboto,  
mabu neio duriomoro abeamio ie. Nou ro ibo,

<sup>4</sup> 'Mo apira dubu ro nomidiro nio mutu, mo  
demapoi-rimo goto kere mo ro anama-omidai-ri  
mani to, mo orobo bobo emoba moro ie.'

<sup>5</sup> Neio ro ibo,

<sup>6</sup> 'Oro auna dubu e, modobo ie nimo ubi ie oro  
ro nato kemoba oro orobo. Abora nimo oro  
nasoro-dumo keba dubu to, nimo oro ro niauri  
ina nimo kamade ie oro orobo nato kemoba.  
Nimo ata ro orowairiai-ri pua, oro mea ia goto  
kere ama-omidai-ri oro orobo edea moro.'

<sup>7</sup> Taie Aberaham iato aise giroborea neio  
sosoro gabo ato, nou ro ibo gowawea, 'Neibi  
awawo ie, nou kaina ie.' Nou ina mea se  
na-gotobowa

<sup>8</sup> taie owera nato garo, 'Nio ubi ie mo orobo  
nato kemoba aboto tauo Soha edio mere ro  
Eporoni nou mutu keremowauti

<sup>9</sup> modobo ie nou ro amadi-apoi-ri bobo  
na-waidiro nou edi pari goto ato owamo. Mo  
modobo ie nou ro nou kemapoi nou mea wisa to  
anama-owomidai-ri. Mo idaibo tanaro  
anama-osioidiro-ri nio sosoro gabo ato.'

<sup>10</sup> Eporoni nou Hiti urubia aboto  
ta-garadabuai neio mutu gomidiro nato  
geremowauti-rimo goto kere sapuwo to.

<sup>11</sup> Nou ro ibo Aberaham ato, 'Marasio mani to kowomidai oro ro. Oro auna dubu e. Mo ro anama-emapoi-ri goto kere momuo se bobo mutu. Urubia ro ta-wirorowai-mo oro moro nou nemapoi nato ba-demoba oro orobo.'

<sup>12</sup> Taie ina Aberaham neio aboto aise giroborea. Nou ina mea se na-gotobowa

<sup>13</sup> nou ro ibo Eporoni aboto, 'Mo ubi ie oro goto kere bobo mutu wisa momuo se komia, aise ba-domidai, ina mo pamo urubia iato nama-iaremo-ri.'

<sup>14</sup> Eporoni ro iato gemowameai nou ibo

<sup>15</sup> 'Goto wisa ibo ie 400 siriba mani nouto se dowomidai-ro. Auna sunamabu pua, mo oro mutu eremowauti-ri pua. Iedi sopu ro oro ro ba-darahidimai, oro orobo iato ba-dibiria.'

<sup>16</sup> Taie Aberaham ubi aise goi nedi owera ro na-garo-ro. Nou siriba mani na-gioputi meana se, taie Eporoni nato gomia 400 siriba mani Aberaham ro, Hiti urubia sosoro gabo ato.

<sup>17</sup> Eporoni edi pari ro na-gowamo Makapera ato Mamere gomo ato,

<sup>18</sup> Aberaham ro gomidai, goto kere, bobo na-gaidiro, ota sirio na-gorowotoi imese nou ro aise girahidimai. Hiti urubia soirio beda moro ato garadabuti-rimo, neio ro ta-girowai-rimo beda goto gomidai Eporoni aboudo Aberaham ro.

<sup>19</sup> Taie Sera iato Makapera bobo goro to nato gibiria, Mamere sabowa gomo ato. Mamere sabowa Keineni duriomoro ato owamo, ata masiro Heboroni.

<sup>20</sup> Aberaham ro ta-gomidai edio goto kere ro nou pamo urubia ito ibiti moro ie. Taie.

## 24

### *Aisaki orobo gemerebai Aberaham ro*

<sup>1</sup> Aberaham Hiti urubia aboudo goto komidai, nou orobo bobo to kedea na-goroporeai, odio tau ro nato Aberaham nou oromano ro ta-gorobai. Nou ro beda tanaro ra na-isioidirotiti Iawe ro womio-ro odio korosa ro.

<sup>2</sup> Nou ro keba sowake koroho dubu aboto iato gutura ibo, 'Oro tu ba-dowaumia-ro mo oroisia maumo to

<sup>3</sup> morobise oweri daro-ro Iawe sosoro gabo ato toboro ra duriomoro ra edio urio ro nou ro gisioidiro-ma. Oro ro mo mere orobo Keineni duriomoro urubia abato emosora ate,

<sup>4</sup> oro dou mo beda duriomoro ato noroto, mo ia simara urubia neio aboudo ba-demerebai-ro Aisaki orobo. Nou nimo simara tanaro ie.'

<sup>5</sup> Sowake dubu ro ibo 'Boido mutu umoro ra besere ia korowairiai mo mutu kou tato neito, modobo ra Aisaki mo mutu korowameai oro koroto duriomoro to?'

<sup>6</sup> 'E e, oro ro owou ate!

<sup>7</sup> Iawe, Adiri Abera, nou ro mo ta-nowagare-ro mo simara urubia duriomoro rido. Iawe Godi ro mo duriomoro gebari isabuna ta-nemedea. Iawe ro ibo ta-gutura "Mo ro nedi duriomoro ro anama-iwai-ri oro aramio merebusere aboto." Iawe ro sowake urio ama-emeiriai-ri keba moro to, oro nou ro ama-owarebai-ri Aisaki mea besere kemerebai aboto.

<sup>8</sup> Nou korowairi ato ba-demeserai, kaupoti Aisaki oro ro owou ate!'

<sup>9</sup> Taie, Aberaham sowake dubu nou tu iato gowaumia nou oroisia maumo to, morobise oweri iato garo nou sosoro gabo ato.



<sup>10</sup> Nou Aberaham aboudo na-gasiriai namabu patu nou ro na-gimododiai ina ibose meamea namabu patu Aisaki orobo emotohiti na nou ro kemoro ohu ato aise giedea, arua sowake urubia mutu <sup>10</sup> kemoro neibi ro na-girobai-birimo namabu ohu ato aise giaremo-birimo, neibi nato gaimai-birimo.

Neibi neido na-gou-birimo oromo teibo turituri ato Arama urubia beda moro ato na-gorowomidiro, ata sopu ta-ararasoro iato Nahoro sabowa gebari.

<sup>11</sup> Taie adimo ato mamio neio aise kou e obo bobo to, obo ioudo iaputi ri. Taie obo bobo neibi ro ta-gowea-birimo, <sup>10</sup> kemoro aise giwotodai-birimo.

<sup>12</sup> Neibi ro neio imese na-giwotodai-birimo goto ato, taie keba sowake koroho dubu iato a-gararatoro Iawe aboto, 'Iawe oro mo eputa dubu ro emowabutiti, ibose oro ubi tanaro tisioidirotiti nou ro, nou mere orobo mo ro bida besere emerebai-ri ra, oro nakara se umoro ie. Oro nirimagare dowawea-ro mo eputa dubu aboto.

<sup>13</sup> Mo nato ti-notoi obo bobo ato, busere tiadori-die obo iaputi ri.

<sup>14</sup> Mo obo etu ro nomia-die mo ro nama-utura-ri ibo, "Mo obo domia-ro," mo nou ro namadi-omia-ri obo, daro nou saro to namadi-utura-ri ibo, "Oro kemoro ibose mo ro obo anama-imio-ri," io, nouse ie iedio besere ro oro sowake dubu nou masiro Aisaki nou ro nou ama-edea-ri. Mo umoro anama-ai-ri oro nirimagare owawea-die mo eputa dubu aboto.'

<sup>15</sup> Sowake dubu nou kararatoro oroporeai pua

iato Rebeka ro ohau-die auna sabowa rudo. Nou Betuere besere ie, Betuere nou Nahoro mere ie Mirika ro goroto, Nahoro Aberaham neama ie.

<sup>16</sup> Rebeka na-gohau-ro ioudo bena to nou ro tarepuru nou gowohau-ro, ina Rebeka nou sagaru ia ie, uramu ro kedea tau ta-gorobai iedi tau ro nato, nou irimo besere ie. Taie nou kodori obo na-giaputi-ro iato na-gorowameai-ro,

<sup>17</sup> iato sowake dubu ro Rebeka aise gemarario, nou ro ibo, 'Mo egea mere obo ma-domia-ro.'

<sup>18</sup> Ina Rebeka ro ibo, 'O, io buro, oro obo anama-omia-ri.'

Taie obo tarepuru nou ro na-gedea goto to taie nou ro obo iato gomia.

<sup>19</sup> Nou obo kodio na-goroporeai taie Rebeka ro ibo, 'Oro kemoro na-irodu-die obo mo ro anama-imio-ri womu tato neio obo ro kiamidimai.'

<sup>20</sup> Taie nou ro iato gatamuai obo kimaseduti edina ro gomidiro obo tarepuru ato. Taie nou ina ina gorowame hio ito obo bobo to, obo nou ro ioudo gimoworoho-ro, nou ro kupia sirio to iato gimaseduti. Taie iedio kemoro patu ro neio kou obo imese gidio-rimo, obo kidio ro imese ti-giamidimai.

<sup>21</sup> Sowake dubu kimaragoidiro ro gopia nou ro edio tanaro na-giauri. Nou ro ibo, 'Mo lawe ro morobise a-nowaboi-die ra nedi besere ro nou se ra nou?'

<sup>22</sup> Kemoro neio obo kidio na-giporeai-rimo, nou gorodi to na-gosioidiro-rimo auna mani namabu e punugo karao nou ro kememidai taie nou gomia Rebeka. Ibose nou ro idaro netewa teibo tutahe teibo ibose auna mani namabu

teibo ie gorodi to gisioidiro-marimo, nou  
giaiwai-ma Rebeka aboto.

<sup>23</sup> Taie, nou ro ibo Rebeka ato, 'Oro abera etu  
ra? Neibi nato kirobu-bi modobo ra oro abera  
moto ato?'

<sup>24</sup> Ina Rebeka ro ibo, 'Mo abera Betuere  
Nahoro ie, Mirika nou mamu e.

<sup>25</sup> Modobo ie nibi kirobu-bi mo abera moto ato  
nedi duwo ro nato, ina ibose kemoro kirobu  
moro towamo ina sugamoso sirio ie neio ihona.'

<sup>26</sup> Sowake koroho dubu nou iato aise  
giraposowa nou Iawe iato gemowabu

<sup>27</sup> ibo, 'Mo ro oro nemowabu. Iawe oro mo  
eputa dubu ro emowabutiti, oro morobise  
tanaro daro meamea tanaro isioidirotiti mo  
eputa dubu aboto. Mo mea se ta-nowaboi-ro oro  
ro mo eputa dubu urubia aboto.'

<sup>28</sup> Taie, Rebeka imese girario, edi tanaro  
na-gororosioiido nou ro iato gorowauti nou  
simara mamu urubia aboto.

<sup>29-30</sup> Taie, nou medera masiro Rebeni nou ro  
na-girorowai iedi owera ro, Rebeka nou ro  
na-gowea tutahe ra punugo karao ra mutu  
na-gotoi, nou imese girario ata dubu iato gowea  
kemoro gimotoi obo bobo abato.

<sup>31</sup> Taie Rebeni ro ibo, 'Oro korosa ta-womia  
Iawe ro, ba-didiai-birimo moto to, nibi kirobu-bi  
moro ta-nimesioiido-ibi, kemoro kirobu moro  
modobo ie, sugamoso sirio ie neio nou  
amadimi-iho-ri.'

<sup>32</sup> Ina iato Aberaham sowake koroho dubu  
nou ri godoro neibi moto to iato Rebeni ro nou  
kemoro gimini ohu rido nou ro iato  
giamodoro-ro beda mutu namabu patu ro giamo  
kemoro ato kiamodoro nou ro goto ato

giaremuti. Taie Rebeni ro kemoro sugamuso na-gimio neio imese giho-rimo. Rebeni karatea obo nou ro kowosuwoihiro imese gimedeai-ibi sairo iwiouti na taie sairo na-giwiouti-birimo iato Rebeni ohona aboto girario ohona kimemidai-ibi taie iato gimiai-ibi.

<sup>33</sup> Nou ro ibo, 'Diho-birimo ohona nou e.'

Ina odio sowake koroho dubu ro nou ro ibo, 'Mo auna oweri ti-norobidiro nou nama-aro-ri keba se, ohona ido nama-iho-ri.'

Rebeni iato gemowameai, 'Dimowauti-ibiro!'

<sup>34</sup> Taie nou oweri iato gatamuai karo, nou ro ibo 'Aberaham mo eputa dubu e.

<sup>35</sup> Iawe ro korosa giaiwo nou aboto, nou rie nou auna namabu sirio kiworohuti. Nou abato toroho-dumo burumakau sipisipi kemoro hosi daro nou abato sirio namabu tiamo gorodi mani, siriba mani, sarupo urubia upi dubu, imese Iawe ro womiotiti ina nou mere dese to gemoroto oroborabere ro.

<sup>36</sup> Sera nou abere ia ie nedi tau ro nato ina mere nato gemoroto. Mo eputa dubu nou ro imese namabu sirio iedi mere ro nou aboto giaiwai.

<sup>37</sup> Mo simara eputa dubu aboto morobise oweri tanaro. Nou ro ibo "Keineni urubia abato mo mere orobo ioudo emerebai ate,

<sup>38</sup> mo ia simara gu urubia aboudo ioudo ba-demerebai-ro!"

<sup>39</sup> Ina mo ro iato nemowameai mo eputa dubu, "Nou nama-orowairiai-ri kou tato mo mutu, iato bida sosoro nama-owati-ri?"

<sup>40</sup> Mo eputa dubu ibo, "Mo sirio tau Iawe ubi tanaro ti-nisioidirotiti, nou ro sowake urio

ama-emeiriai-ri keba moro to oro nou ro  
ama-emasouti-ri. Oro ro mo mere orobo mo  
simara gu urubia mo abera urubia aboudo  
ioudo amadi-emerebai-ri.

<sup>41</sup> Mo gu urubia ro iedi besere ro kotiodorai  
tato, oro ba-demeserai.”

<sup>42</sup> Taie mo ro Keineni duriomoro  
na-nemeserai iato nou-die nedi duriomoro neito  
abora. Taie ina obo bobo ato mo kararatoro  
na-nosiodiro iato mo ro ibo nararatoro, “Iawe,  
oro mo eputa dubu ro emowabutititi, mo oro ro  
demowapotai-ro mo eputa dubu mere beda  
besere emerebai ri ra?

<sup>43</sup> Mo nato notoi obo bobo abato. Mo ro nato  
nama-emotoi-ri ata orio besere ata amadi-ou-ri  
obo iaputi ri mo ro ibo nama-utura-ri nou aboto  
‘Mo oro tarepuru rudo egea mere obo  
ma-domia-ro anama-odio-ri.’

<sup>44</sup> Ina iato etu ro utura-die ibo, ‘Obo nou e,  
dodio, ina ibose mo ro oro kemoro obo  
anama-imio-ri, amadimi-idio-ri,’ mo umoro nato  
nama-ai-ri ibo io, nou se ie, Iawe oro ro mo  
eputa dubu mere edi besere ro nou  
gemohodowa edea nari.”

<sup>45</sup> Mo kararatoro oweru oroporeai pua iedi tau  
ro nato Rebeka ro ohau-die auna sabowa rudo  
obo iaputi-ri, nou obo na-iaputi ina mo ro iato  
nemowapotai, “Mo obo ma-domia-ro.”

<sup>46</sup> Taie Rebeka ro ibo “Obo nou e, dodio. Oro  
kemoro ibose obo anama-imio-ri.” Taie, nou ro  
obo tarepuru iato edea goto to, mo obo iato nedi,  
taie nou kemoro obo iato imio ina ina aise  
orowame nou obo bobo to ioudo na-iworoho-die  
tarepuru to iato gimawiriti taie kemoro nou  
idio-dumo.

<sup>47</sup> Ina besere ia iato nemodowa, “Oro abera etu ra?” “Mo abera masiro Betuere Nahoro, Mirika nou mamu e.”

Taie mo neido na-nirario nou namabu kememidai kemoro ohu rudo idaibo tutahe teibo iato nowoiti, karao punugo ato iato nemamitiai.

<sup>48</sup> Iato mo na-niroborea eso owerai naiwai Iawe aboto mabu mo nou ro nemasouti-die mea gabo mo ro korobai aboto, mo eputa dubu neama nou aramu besere nou mere ro kedea.

<sup>49</sup> Abora nedi tau ro nato mo demowapotai-birimo nibi ro, mea nirimagare tanaro nibi ro amabimi-isioidiro-ri ra mo eputa dubu aboto? Ina kisioidiro tato nibi ro demowapotai-birimo ina mo umoro ie mo beda tanaro nama-osioidiro-ri.’

<sup>50</sup> Rebeni Betuere mutu neitiro ibo, ‘Nedi tanaro ro na-wororosioidiro nou morobise Iawe aboudo ie. Neitiro ro iwesegerai-ri pua nedi tanaro ro, imese aise mowamo idaibo sosoro.

<sup>51</sup> Rebeka ba-dorobai ba-dowou oro eputa dubu mere ro ba-medea, mabu Iawe ubi ie.’

<sup>52</sup> Taie Aberaham sowake dubu ro na-girorowai iedi owerai ro nou aise giraposowa goto ato Iawe imese gemowabu.

<sup>53</sup> Taie ioudo na-geribua-ro Rebeka nou ro iato gomia obotama daro gare ato kiaremo nakomu, tu ato kiaremo nakomu gorodi ra siriba ra rudo gisioidiro-rimo iedio nakomu ro. Taie, nou ro ibose to gimio-ma awawo mani namabu patu nou medera ra mamu ra aboto.

<sup>54</sup> Taie, iedio duwo ro nato Aberaham keba koroho sowake dubu nou simara dubu patu mutu neibi kiho kidio nou ro gereredeai, aise girobu-bi iedi duwo ro nato.

Taie ata saiki na-gowaroho sowake dubu ro iato gutura ibo, 'Abora mo demeiriai-birimo Rebeka mutu mo eputa dubu aboto.'

<sup>55</sup> Rebeka medera ra mamu ra neitiro ro iato gemowameai-rido ibo, 'Io, Rebeka amia saiki neibi mutu ama-omidiro-ri nou ido tama-ou-ri.'

<sup>56</sup> Ina sowake dubu ro ibo, 'Mo nodiobuti-bimo. Mo kou gabo neito Iawe ro nemasouti-ro, demeiriai-birimo mo Rebeka mutu mo eputa dubu aboto abora.'

<sup>57</sup> Neitiro iato gutura-rido, 'Tau Rebeka anamado-orumai-ri ina anamade-emodowa-ri nou ubi beda sosoro hata ie.'

<sup>58</sup> Taie neitiro ro iato korumai iato gemodowa-rido, 'Oro ubi ra nedi dubu ro nou mutu kou abora?'

Ina nou ro ibo, 'Io, mo ubi ie kou.'

<sup>59</sup> Taie nou sowake orobo nou na-iaurititi nou mutu iato gitiodorai-mabirimo ou ri Aberaham sowake dubu mutu.

<sup>60</sup> Tau keba se neio ro mea owera komia ibo, 'Nimo medera, oro merebusere aramio sirio amadimo-oi-ri, neio ro amadimi-iwasiti-ri boso rubi namabu duriomoro mutu.'

<sup>61</sup> Taie, Rebeka kemoro gimini ohu to korora, nou sowake orobo ibose ata kemoro gimini ohu to korora, arua sowake busere neibi mutu atu se imese gou-birimo. Aberaham sowake dubu nou simara dubu patu mutu, ina Rebeka nou amia busere mutu, neio ito gou-rimo Keineni duriomoro to.

<sup>62</sup> Iedi tau ro nato Aisaki ta-gemeserai obo bobo bato gomidiro iodi duriomoro, nedi obo bobo masiro 'Keremiro dubu na-womidiro mo

nou ro niauri-die'. Nou iato gomidiro Negebi duriomoro ato.

<sup>63</sup> Nou iato goroho mea kimaragoidiro iwia ri. Taie iato nou neido na-girarowea muso ato nou ro a-giwia kemoro dawarea na-gou-rimo neito.

<sup>64</sup> Taie Rebeka ibose ioudo na-girarowea-ro nou ro ata dubu se gowea Aisaki se gowea nou ro. Taie nou kemoro gimini ohu rudo na-gerepeduai-ro,

<sup>65</sup> nou ro iato emodowa sowake koroho dubu, 'Io beda dubu ra io?'

Sowake dubu ro ibo, 'Aio mo eputa dubu e io.' Taie Rebeka woidomari aise gorowasiai obotama to. (Neio ta-isioidiroititi-mo idaibo tanaro keredea saiki ato.)

<sup>66</sup> Aisaki aboto na-gorowateai-rimo neio, iato keba sowake koroho dubu owera Aisaki aboto iato gorowauti beda tanaro ro gororosoidiro iato beda tanaro giauri nou ro imese gorowauti.

<sup>67</sup> Taie Aisaki imese gou-ro Rebeka nou ro korobai taie imese gowou Sera parai moto goro to iato nou ro aise gedea. Aisaki nou auna ubi ie auna nirimagare ie Rebeka aboto. Aisaki mamu Sera ta-garaburai keba se nou rie Aisaki mibo mutu komidiro. Iato Rebeka nou ro na-gedea edio mibo ro Rebeka ro gemowateai.

## 25

### *Aberaham pamo gowea*

<sup>1</sup> Aberaham nou ata orobo iato gedea nou masiro Katura.



<sup>2</sup> Ina Ketura abato nou ro ta-girasomai dubu mere sirio neio masiro Simiran, Iokosan, Medan, Midiani, Isibaki, Sua.

<sup>3</sup> Iokosan ro girasomai-ma Seba ra Dedani ra. Asuri urubia, Retusi urubia, Reumi urubia neio mabu Dedani aboudo orobu-die.

<sup>4</sup> Midiani dubu mere girasomai-ibi neibi masiro Epa, Epere, Hanoka, Abida, Erida. Neio imese sirio se nedi urubia ro mabu Ketura aboudo orobu-die.

<sup>5</sup> Taie Aberaham edio namabu sirio ro nedi tau ro nato giaiwai nou mere Aisaki aboto.

<sup>6</sup> Ina nou arua namabu iato gimio nou merebusere arua sowake upi ato na-girasomai taie nou ro ibo neio ato, 'Nio neido ba-dou-mo ito saiki boido idiawado-die neito iato ba-dirowomidiro!' Nou ro nou ri gitiodorai nou ubi tato ie neio Aisaki mutu atu moro ato korowomidiro.

<sup>7</sup> Taie nou ta-wimidiro-titi 175 kisimisi to,

<sup>8</sup> komidiro ro ta-gamidimai ina oromano ia ta-goi, nou iato aise garaburai.

<sup>9-10</sup> Taie nou mere teibo ro Aisaki Isimere mutu neitiro ro gibiria-rido Makapera bobo goro to Mamere gomo ato. Kibase Aberaham nedi bobo ro nou pari mutu ta-gomidai Eporon Soha aboudo. Ina nou orobo Sera nato ta-gibiria, ina edi atu goro bobo ro nato nou mere teibo ro neito gibiria-rido.

<sup>11</sup> Taie Aberaham na-garaburai, Iawe ro nou mere Aisaki korosa giaiwo taie nou iato wimidiro-titi iodio duriomoro nato obo bobo masiro 'Keremiro dubu na-womidiro mo nou ro niauri-die.'

*Isimere Aramio Merebusere*

<sup>12</sup> Isimere Aberaham ro garasomai Haga ro goroto. Haga Sera edi sowake besere nou e ina neitiro ro a-gaubai-rido Isipi rido. Haga Isimere mamu e.

<sup>13</sup> Isimere ro sirio merebusere girasomai, nou keba mere Nebaioti, ina nou arua dubu mere mutu e, neio masiro nou e Keda, Adabere, Mibisama,

<sup>14</sup> Misima, Duma, Masa,

<sup>15</sup> Hadada, Tema, Ieturi, Napisi, Kedema.

<sup>16</sup> Neio Isimere dubu mere sirio ie, ina gu gabogabo neio aboudo irobu-die, ina iato neio aise gororoburutai-rimo erere moro to.

<sup>17</sup> Taie Isimere iato wimidiroiti 137 kisimisi ti-giporeai. Nou oromano ro na-gorobai iato nou aise garaburai.

<sup>18</sup> Nou aramio merebusere imese sirio ia ie neio iato wirowomidiroiti duriomoro teibo turituri, edi duriomoro teibo ro iasoro-madumo Habira ra Sura ra. Isipi sapuwo ato ie, Asiria sapuwo ato ie. Taie Isimere edi aramio merebusere ro neio ro Isimere niramio edi aramio merebusere ro sirio tau to wisobititi-mo iato wiado-mo.

*Aisaki mere teibo*

<sup>19</sup> Aisaki Aberaham mere ie.

<sup>20</sup> Aisaki 40 kisimisi ro na-gorobai Rebeka nato gede. Rebeka Mesopotamia duriomoro orobo ie, ioudo gou-ro, nou abera masiro Betuere, nou medera masiro Rebeni, neitiro Arama dubu teibo ie.

<sup>21</sup> Rebeka nou teri orobo ro wimidiro, Aisaki nou ri wararatoro lawe aboto Rebeka teri gabo rido owatateai-ri. lawe ro na-gemorowai-ro

Aisaki kararatoro owera, taie Rebeka niro iato aise gowea.

<sup>22</sup> Nou niro mutu na-wimidiro mere teibo aise wirorohoio-do niro goro ato.

Taie Rebeka ro nato gemodowa Iawe ibo, 'Mo abato idaibo tanaro etou ri ororosioidiro-dumo?'

<sup>23</sup> Iawe ro a-gemowameai-ro ibo, 'Io, edemuai teibo tomidiro-do oro niro goro ato. Sipu teibo neitiro aboudo amadimo-osuruwo-ri, neama iedi sipu ro nama-iwia-ri neio pupuwo mutu, naramu edi sipu ro neio ro amadime-emesioidirotiti-ri woko.'

<sup>24</sup> Taie, Rebeka mere temeteme ro na-gemeriai-ro, nou ro edemuai teibo giroto-ma.

<sup>25-26</sup> Keba mere takamai karima karima ie musuga musuga. Ata mere naramu obo nupu rido girarebidiro. Keba mere masiro Iso nouto giduti, Hiburu urubia asoro-dumo 'musuga musuga'. Ina saro mere Iakobo to giduti, Hiburu urubia asoro-dumo 'karasaubuti dubu'. Aisaki 60 kisimisi ro ta-gorobai Rebeka ro nato giroto-ma iedi mere teibo ro.

<sup>27</sup> Iedi mere teibo ro neitiro auna osio teibo ro na-giobai-ma, Iso tumu ato wirotiti nou ase koroho dubu e, nou auna ubi ie tumu ato koroho. Ina Iakobo ibose nou muro dubu e parai moto ato imidirotiti sipisipi nanigosi neio iaurititi.

<sup>28</sup> Aisaki ubi mere ie Iso, mabu nou ro bida karima ohona kowateai ra tumu ato Aisaki ro nou gi-ouho-ri edio dao ro. Ibose Rebeka ubi mere ie Iakobo.

<sup>29</sup> Ata tau karima bini supo Iakobo ro na-gitai, iato Iso ro orowatea-die tumu rudo na-gohau-ro. Nou auna ia sogoi ro gowahau-ro.

<sup>30</sup> Taie nou ro ibo Iakobo ato, 'Oro karima supo na-witai mo tauo domia-ro mo sogoi ia ro ta-norobai.' Iso nou ata masiro Idomu, Hiburu urubia asoro-dumo 'Karima titi'.

<sup>31</sup> Ina Iakobo ro ibo, 'Oro ido nama-omia-ri, mo oro ro demapoi-ro keba mere to kararasoro!'

<sup>32</sup> Iso ro ibo, 'Mo sogoi ri nama-araburai-ri, keba mere edi namabu sirio ro kirahidimai ra mo neio ro owarebai-ri pua!'

<sup>33</sup> Iakobo ro ibo, 'Demapoi-ro mo keba mere to kararasoro!'

Ina Iso ro aise gemapoi. Idaibo mino to geremahodorai-rido Iakobo keba mere to gararapoi, Iso wisa karima bini supo gomia.

<sup>34</sup> Iso ro iato giho. Nou kiho obo kodio taie nou ro imese gemeserai neama dubu. Iso mea se imaragoidiro pua nou keba mere ie, namabu kirahidimai aboto, ina nou neama aboto aise giapoi.

## 26

### *Aisaki karasaubuti oweru karo*

<sup>1</sup> Aisaki na-wimidirotiti ohona tato tau nato gererede, keba se Aberaham mutu tau ato idaibo sosoro tanaro ta-gowamo ohona tato. Ina edio tau ro nato Aisaki iedi duriomoro ato na-gomidiro ohona tato ie nou ri gemeserai, nou imese gou ata auna sabowa to, masiro Gera, Pisisitia urubia eputa dubu nou masiro Abimereki iato gomidiro, nou aboto gou.

<sup>2</sup> Taie edi tau ro nato lawe nato gorowapotai Aisaki aboto taie nou ro iato gemowapotai ata oweru nou ro a-gutura ibo, 'Oro ito ou ate Isipi

to, oro duriomoro anama-emapoi-ri mo ro ido nato ba-domidiro,

<sup>3</sup> abora domidiro egea mere se nedi duriomoro nato. Mo oro mutu anamado-omidiro-ri, nato oro mo ro korosa anama-omio-ri. Oro ia aramio merebusere mutu anama-omio-ri nedi duriomoro sirio ro mo edi hodo ro na-nemasaubiai oro abera Aberaham aboudo mo ro asiai-ri pua.

<sup>4</sup> Oro aramio merebusere sirio se anama-omio-ri, urubia ro modobo pua kioputi aboto idaibo kiboni sirio na-orowotoi toboro ato. Neio ro ama-irowomidiro-ri nedi duriomoro sirio ro na-iamo sapuwosapuwo. Mo ro korosa anama-imia-ri oro aramio merebusere aboto, odio korosa ro ioudo amadimo-orobodorai-ri imese sirio urubia aboto.

<sup>5</sup> Imese sirio tanaro patu mo ro anama-isioidiro-ri mabu oro odi abera ro mo beda owera karo ra nou ro aise kisioidiro ie. Oro abera dubu nou ro mo edi sabi patu ro mea mino to ta-ibodorotiti, ibose mo edi kitamudiro tanaro patu ro nou ro ta-ibodorotiti mea mino to.'

<sup>6</sup> Taie, Aisaki iato aise wimidiro Gera sabowa ato.

<sup>7</sup> Rebeka imese sagaru ia ie. Gera domere ro nou ri gemodoruti-rimo neio ro ibo Aisaki ato, 'Iedi orobo ro oro orobo ra?'

Ina Aisaki ro iato gimowameai neio ibo, 'Nou mo medera ie.' Nou tere ro gorobai iedi tau ro nato nou ro morobise owera aro pua mabu nou a-gimaragoidiro ibo, 'Mo neio ro kopia ie ina orobo kowasiri rie.'

<sup>8</sup> Aisaki iato wimidiro-ri ina ata tau ato Pisisitia urubia eputa dubu nou masiro

Abimereki na-girarowea moto goro rudo nou ro nato gowea Aisaki Rebeka ta-gatopea-ro.

<sup>9</sup> Taie Abimereki urubia kimowapotai Aisaki emou ri, taie neio ro nou iato gowou-rimo Abimereki aboto. Aisaki na-gou-ro nou ro ibo, 'Io oro orobo ie, ina nimo oro ro etou ri nisaubuti ibo oro medera ie?'

Aisaki ro ibo, 'Mabu mo nio ro kopia ie ina mo Rebeka nio ro kowasiri ie.'

<sup>10</sup> Taie Abimereki ro ibo, 'Oro ro ata tanaro gosioidiro-die nimo aboto auna ia karasaubuti gowapotai-die. Ata sabowa dubu nou mutu kirobu-ma rasiri ie, nimo auna ubauba ro a-niwia-ro.'

<sup>11</sup> Iato Abimereki ro urubia umoro owera iato gimia ibo, 'Mo ro sabi nedeia. Nodio orobo ra dubu ra ro modobo pua ata ro kiwasomai-ma. Etu ro iwasomai-ma neitiro, ibose mo ro wisa iedi dubu ro nou aboto anama-iwai-ri pamo!'

<sup>12</sup> Iedi duriomoro nato Aisaki aise gomidiro ina nou ro pari iato gosioidiro, nedi pari ro nato nou ro sirio pari namabu gibouti. Taie neio awawo na-goi-rimo nou ro iato giasio-ro sirio ia se imese gidabuti. Iedi korosa ro pari namabu sirio sapuwo to Iawe aboudo ie.

<sup>13</sup> Nou imese sirio namabu patu nou abato ta-giamo. Nou namabu sirio dubu to gararapoi nou ro imese sirio namabu patu na-gidabuti taie nou masiro auna neito aise gowai.

<sup>14</sup> Taie nou abato irohotiti-dumo sirio kiaubo urubia nou woko neio ro emowatiti-mo ibose nou sipisipi sirio burumakau sirio nanigosi sirio se goroho-rimo nou abato.

Taie ata tau Pirisitia urubia ro masawe gowea-rimo Aisaki, mabu nou namabu sirio dubu e.

<sup>15</sup> Aisaki amia obo bobo mutu, edi obo bobo ro nou abera Aberaham edi sowake urubia ro neio ro gemobuti-rimo. Obo bobo Pirisitia urubia ro serawo ri komapi to, womu tato imese ti-girotomuti-rimo.

<sup>16</sup> Taie Abimereki ro ibo Aisaki ato, 'Oro abora nimo aboudo daragare! Nimo oro ro nitarumowado.'

<sup>17</sup> Taie Aisaki ro na-girorowai edi owera ro nou aise gemeserai edio duriomoro ro. Neido na-gou, ipi ato Gera podo gawagogo ato nou parai moto iato gitomuti, ipikere iato gomidiro.

<sup>18</sup> Keba tau ato Aberaham iedi tau ato na-gomidiro, nou ro sirio obo bobo ta-giobuti ina nou iato na-garaburai obo bobo na-gimeserai-ro, Pirisitia urubia ro aise giatumuti-rimo. Iedi tau ro nato Aisaki iato wimidiro-titi iedi duriomoro ro ina iato edio obo bobo sirio ro nou sowake urubia ro ina iato giobuti-rimo mea mino to na-gisioidiro-rimo taie Aberaham ro beda masiro to giasoro Aisaki ro ina neito geremari atu masiro to.

<sup>19</sup> Ata obo bobo Aisaki sowake urubia ro na-goboba-rimo podo gawagogo ato iedi moro ro nato mea obo sosu nou ro gosuruo-ro.

<sup>20</sup> Taie iedi tau ro nato Aisaki edi sowake urubia ro neio nato geremaro-rimo Gera sabowa sipisipi kimowotoi urubia mutu. Gera urubia ro ibo, 'Nodio obo bobo ro nimo obo bobo ie, nio obo neido giaputi-mo!' ina nou do ie Aisaki edio obo bobo ro nou ro masiro a-giduti 'Keremaro'.

21 Neio iato ata obo bobo goboba-rimo ina atu sosoro urubia aise gou-rimo serawo mutu neio owerato iato gorowati-rimo, Aisaki ro a-giduti iedi obo bobo ro 'Owerato korowati'.

22 Taie Aisaki ro iedi duriomoro aise gemeserai nou sowake urubia mutu, imese gou-rimo ata moro to, ata obo bobo ina iato goboba-rimo. Iedi tau ro nato nou ata ubauba owea pua urubia aboudo iedi obo bobo nou ro masiro a-giduti 'Moro Bobo Modobo ie'. Aisaki ro ibo, 'Iawe Godi ro mo moro bobo modobo ato ta-nomia-ro. Abora nedi sopu ro nato mo modobo ato nama-omidi-ro-ri.'

23 Taie iedi duriomoro na-gemeserai Besiba to imese gou.

24 Ata duwo Iawe nato gorowawe nou aboto ibo, 'Mo nou e Godi, oro abera Aberaham nou ro nemowabutiti, mo ubi tanaro nou ro ta-wisioidirotiti. Oro tere na ie! Oro korosa anama-owai-ri, ina aramio merebusere sirio se anama-omio-ri. Mo ro nou ri nama-isioidiro-ri mabu Aberaham mo sowake dubu to ta-garasoro.'

25 Taie iodi tau ro nato Aisaki nadi iato gitomuti era kaduruti maumo ato taie, Iawe iato gemowabu. Iedi duriomoro nato nou parai moto kitomuti, nato imese gomidi-ro. Ina sowake urubia ro obo bobo ata iato goboba-rimo.

26 Abimereki Gera eputa dubu imese gou-ro Aisaki aboto. Iedi tau ro nato Aisaki a-gomidi-ro Besiba moro ato. Abimereki ro ta-gadabuai-ro nou owerato mea se kemesioidi-ro dubu masiro Ahusata, ibose ta-gadabuai-ro nou boso eputa



dubu masiro Pikoro, taie neibi imese gou-birimo Aisaki aboto.

<sup>27</sup> Aisaki ro na-giwiiai-ibi neibi nou ro iato gimodowa-ibi, 'Nibi etou mabu ato ou-diebimo mo aboto? Nibi keba ubauba ta-gosioidiro-birimo mo aboto. Mo nibi ro Gera duriomoro rudo ta-nowagare-birimo.'

<sup>28-29</sup> Ina neibi ro iato gemowameai-birimo nou, 'Neibi umoro ta-noi-birimo ibo Iawe oro mutu e. Neibi ro keba se ata ubauba osioidiro pua oro aboto. Oro nimo ro ubauba se emeiriai pua ioudo mea mino to nemeiriai-rumo Gera duriomoro rudo. Abora neibi a-neremowotouti-birimo oro aboudo nimo ro ubauba tanaro osioidiro-ri pua oro aboto, ina ibose oro ba-deremowotouti nimo aboudo ubauba tanaro oro ro osioidiro ate nimo aboto. Oro Iawe ro korosa ta-giaiwo.'

<sup>30</sup> Taie Aisaki ro auna ohona iato gimitai-ibi, neio atu se Aisaki mutu komititi imese giho-rimo.

<sup>31</sup> Ata kowaroho ato neio ina iato geremowotouti-rimo. Aisaki ro iato giwaboi-ibi ipi ato gimeserai-ibi, taie nou imese gorowameai-ro.

<sup>32</sup> Iedi atu saiki ro nato Aisaki iedi sowake dubu ro nou ro gou-ro, nou ro ibo, 'Obo bobo nimo ro ta-nemoba-mo tomidiro-die mea obo sosu ro osuruwo-die.'

<sup>33</sup> Taie Aisaki iedi oweru ro na-girowai nou ro iedi obo bobo ro masiro aise gomia 'Siba' to, Hiburu oweru to ibo owamo 'Geremowotouti' nou ri sabowa nato na-omidiro masiro tararasoro 'Besiba'.

<sup>34</sup> Iso nou 40 kisimisi na-gorobai nou ro Hiti urubia besere teibo giedea-ma. Keba orobo masiro Iuditi Beri, ina saro orobo Basemati Eroni.

<sup>35</sup> Neitiro ro imese tanaro na-isioidirotiti-do Rebeka ra Aisaki ra neitiro auna masawe ro iwatiti-ma, kamade tato daro giropu mibo mutu wimidiro-do.

## 27

### *Iakobo ro a-gematigiai Aisaki*

<sup>1</sup> Aisaki nou nogere ia ro ta-gorobai ito mena se irarowo pua, idomari teibo ta-goriodoi-rido. Iedi tau ro nato nou ro sowake dubu nato gemeiriai Iso ou-ri Aisaki aboto. Taie Iso imese gou-ro Aisaki aboto, nou ro ibo, 'Mona mo mere.'

Iso ro ibo nou abera negere aboto, 'Mo nou e.'

<sup>2</sup> Taie Aisaki ro iato gemowapotai nou owera. Nou ro ibo, 'Mere mo umoro pua mo kimudumia tau, nedi owera ro dirowidiro-ro!

<sup>3</sup> Oro tumu to ba-damedei tumu na ba-diosora, iona gari giri kakisa madabu ba-dimidai.

<sup>4</sup> Taie ioudo namadi-owameai-ri otou nakomu owateai-die oro ro ba-demosioidiro mea topo ohona mo ro nou nama-ouho-ri. Iedi tau ro nato mo ido nama-araburai-ri, keba se korosa anama-iwai-ri oro aboto.'

<sup>5</sup> Taie Iso iedi owera na-girowai nou iona gari kimidai giri kakisa madabu imese gedei tumu na iosora ri.

Aisaki iedi owera na-garo Iso aboto edi tau ro nato Rebeka piro se gotoi, nou ro ioudo girowidiro edi owera ro.

<sup>6</sup> Taie nou ioudo na-gou-ro Iakobo aboto nato gutura, nou ro ibo, 'Idau ibo aro,

<sup>7</sup> "Iso oro ba-dedei tumu to tumu na ba-diosora nama-owea-ri oro ro tumu na ba-dopia ba-dowahau-ro, taie oro ro mea topo ohona nama-emesioidiro-ri, mo ro nou nama-iho-ri edi ohona ro, iato mo ido nama-araburai-ri, lawe sosoro gabo ato korosa nato aiwai rie oro aboto."

<sup>8</sup> Oro abora mo owera dirowai.

<sup>9</sup> Oro dou nanigosi dawade teibo diopia-maro nedi tau ro nato ba-diowou-maro neito. Mo ro mea topo ohona anama-emesioidiro-ri Idau ro beda ubi ohona ihotiti,

<sup>10</sup> oro ro nou ama-emowou-ri. Nou ro nama-iho-ri edi ohona ro nou nama-amidimai-ri, oro aboto korosa nato ama-iwai-ri. Nou ido araburairi tau keba se oro korosa ama-omia-ri.'

<sup>11-12</sup> Ina Iakobo ro iato gemowameai, 'Mo takamai didirididiri ie, mo musugamusuga dubu pua. Mo Apau nou musugamusuga dubu e, mo Idau ro anamadi-eibimai-ri. Nou ibo nama-utura-ri, "Oro Iso pua! Oro Iakobo ie!", mo karasaubuti ato idaibo mo nou ro ubauba anamadi-owai-ri.'

<sup>13</sup> Ina Rebeka ro ibo, 'Edi ubauba ro oro kimaragoidiro tato se. Oro Idau ro ubauba nama-owai-ri iedi ubauba ro mo ro nama-omidai-ri. Mo owera dirorowai-ro ba-dimou-ma nanigosi dawade teibo ba-diopia-maro!'

<sup>14</sup> Taie iato Iakobo mamu owera se girowai, nanigosi dawade teibo imese giosora-ma kiopia-ma taie imese giwou-maro.

Taie Rebeka ro ohona mea mino to iato gisioidiro, ibose parawa ta-gisioidiro nou ro.

<sup>15</sup> Nou iato aise garatea kiehuti naramu iedi meamea kiroidiro namabu nou ro na-gimidai-ro ioudo taie neama dubu iato gowoiti.

<sup>16</sup> Rebeka ro na-gowoiti taie ina iato nanigosi takamai teibo na-gimidai-marō iato gowoiti durupi ato tu ato wagoha womu e.

<sup>17</sup> Taie Rebeka ro ibo, 'Ohona nou e, nou ro idaibo topo ohona nou ihotiti. Oro ro ba-demowou ba-domia!'

<sup>18</sup> Iakobo Rebeka ro edi ohona ro na-gemesioidiro mea topo ohona taie nou imese gou abera aboto taie iato gutura, 'Idau!'

Ina abera dubu ro ibo, 'Mo mere, oro etu ra?'

<sup>19</sup> Iakobo ro gemowameai ibo, 'Mo oro keba mere ie, Iso. Mo oro ro beda owera to nemowapotai-die mo ro ibose ti-nosioidiro. Oro ma-domi mea se, ohona ba-diho mo ro edi ohona na-nemosora, iato mo korosa ba-domia-ro.'

<sup>20</sup> Aisaki ro ina iato gemodowa, 'Oro tumu na beda sosoro owea hio ito na-orowameai-die?'

<sup>21</sup> Iakobo ro ina iato gemowameai nou, 'Mabu mo lawe ro nowarebai-die oro edina na-wemowabutiti.'

Aisaki oromano ro ibo, 'Oro dosiomai-ro neito mo aboto, tau oro anama-owaseidiro-ri mo ro. Mo umoro nato nama-ai-ri mo keba mere Iso oro nou se ra.'

<sup>22</sup> Taie Iakobo kosiomai iato gemowaseidiro nou durupi tu mea mino to. Nou ibo, 'Kaupoti oro kodu mo ro ata sosoro nemerewidiro oro kodu Iakobo kodu sosoro ie, ina oro tu oro durupi Iso durupi sosoro ie musugamusuga.'

<sup>23</sup> Aisaki ro eibimai pua ibo nou Iakobo ie, mabu nou tu na-gemowaseidiro naramu sosoro musugamusuga ia ie imese, ina nou rie nou korosa kaiwai aboto iato gatamuai.

<sup>24</sup> Aisaki ina iato gemodowa, 'Oro mo ia mere ra Iso?'

Ina Iakobo ro iato gemowameai, 'Io mo nou se ie. Mo oro mere ie Iso.'

<sup>25</sup> Aisaki ina iato gutura, 'Mo ohona demowou-ro, mo ro nama-iho-ri iato oro korosa anama-omia-ri.'

Taie ohona edina gemosioidiro, Iakobo ro kememidai imese gemowou-ro, iedi ohona ro nou ro iato giho, ina waini gemowosiomai-ro nou ro komidai taie imese godio.

<sup>26</sup> Aisaki ro ibo, 'Mere, neito dosiomai-ro mo aboto, mo dosomeai-ro.'

<sup>27</sup> Iakobo ro kosiomai, abera ro na-gorobai taie Iakobo ro iato gosomeai. Nou ro na-gosomeai abera taie Aisaki oromano ro Iso kiroidiro namabu iato gibowoidiro.

Nou ro na-gibowoidiro taie korosa owera iato gaiwai ibo, 'Mo mere, oro durupi iwaso nibo mea se iwsuruwo-die nou idaibo tumu nibo sosoro ie, lawe ro iedi tumu ro korosa neito gaiwai.

<sup>28</sup> Ibose oro Godi ro modobo daroho ba-memerio-ro oro duriomoro to, iedi daroho sopu papamo nou ro ba-memowaititi, sopu ato mea nakomu ba-misuwodutiti-mo. Iedi sopu ro nato namadimo-osuruwo-ri kiho namabu sirio ia se ba-miamotiti, waini obo ibose modobo ato ba-miamotiti.

<sup>29</sup> Sirio duriomoro urubia oro neio ro keba dubu to ba-masoro-mo oro neio ro woko

ba-memesioidirotiti-mo neio sowake urubia ie. Idaro oro edi naramio niramio ro neio ro oro ibose eputa dubu to ba-masoro-mo. Oro ohu ato ba-dimidiro neio sopu ato ba-mirowomidirotiti oro neio ro neido ba-miaurititi-mo. Oro etio ro owai-dumo ubauba, ibose neio lawe ro ubauba ba-miwaititi. Oro meana etio ro owai-dumo, ibose neio lawe ro meana ba-miwaititi.'

<sup>30</sup> Aisaki ro korosa kaiwai na-goporeai, Iakobo abera negere aise gemeserai imese gorowameai.

Taie nedi tau nato Iso ro apimaidiro-die na-gohau-ro tumu rido.

<sup>31</sup> Ibose nou ro ohona ta-gemesioidiro mea mino to topo ohona taie abera negere nou ro imese gemowou-ro.

Taie nou ro ibo abera negere ato, 'Oro domi mea se. Ohona nou e, diho! Mo ro nemowateai-die ina mo korosa nato ba-domia-ro!'

<sup>32</sup> Aisaki ro iato gemodowa, 'Oro etu ra?'

Ina Iso ro ibo, 'Oro keba mere mo nou e, Iso mo masiro.'

<sup>33</sup> Iato Aisaki ro na-girorowai nou iato aise godaudi. Nou ro ibo, 'Ina keba se etu ro iwou-die ohona mo aboto, beda mere ra io? Nou ohona ta-niho mo ro ina korosa ta-naiwai nou aboto, mo ro modobo pua ina kowameai.'

<sup>34</sup> Taie iato Iso ro na-girowai iedi oweru ro nou auna ia iamo gutura. Taie nou ro ibo, 'Idau mo ibose abora korosa domia-ro, oro ro mo woki kemati modobo pua!'

<sup>35</sup> Aisaki ro ibo, 'O oro neama ro ou-die neito mo aboto. Mo nou ro nowai ubauba nou ro nasaubuti nou ro aratigi-die oro to. Oro edi korosa ro oro neama ro tau owasiri.'

<sup>36</sup> Taie Iso ro ibo, 'Iakobo nou ia morobise masiro ie. Nou iedi masiro ro nou e Karasaubuti Dubu. Mo keba se nou ro ta-nasaubuti oro edi namabu ro keba mere masiro to na-giapoi nou ro imese ta-gimidai. Ina abora nou e, nou ro ina nasaubuti-die, mo korosa noti nowasiri. Ata korosa ata kemeserai pua ra mo sapuwo to?'

<sup>37</sup> Taie Aisaki ro ibo, 'O natonato ie mo ro oro neama napoi oro eputa dubu to, nou ro ararasowai-ri. Nou naramio niramio nou woko amadime-emesioidirotiti-ri. Nou pupuwo keba se mo ro ta-nomia nou ohona sirio nou abato sirio se ama-iamo-ri ibose nou waini sirio se ama-iamo-ri. Mo mere, oro ata mea nakomu ata emowameserai pua.'

<sup>38</sup> Taie Iso ro ina ibo, 'Idau kaupoti ata a-wemeserai-ra oro ro mo sapuwo to?' Iato Iso ro ubauba se gimaragoidiro nou iato auna idobi imese giroto.

<sup>39</sup> Aisaki iato gutura nou aboto, 'Oro odio duriomoro amadi-emeserai-ri oro ama-ou-ri ata muso duriomoro to. Iedi muso duriomoro ro ubauba ie, oro iato ama-imidirotiti-ri, daroho iarotiti-ri pua iato, ina pari namabu mea se isuwoduti-ri pua.

<sup>40</sup> Oro giri to ama-iraberemotiti-ri urubia aboudo ohona idaibo sosoro tanaro to ama-iwadaudio-ri. Oro neama woko masawemasawe ama-emesioidirotiti-ri, oro nama-orowairiai-ri oro simara ubi tanaro ama-isioidirotiti-ri.'

<sup>41</sup> Taie iato Iso ro na-girowai Aisaki iedi owera ro, nou ro neama auna se wohoiotiti mabu korosa nou ro gimidai ina nou do ie nou nakara se geremowauti ibo, 'Mo abera negere

nama-araburari mo neama mo ro nato  
nama-esuai-ri.' Iedi ubauba kimaragoidiro nou  
gimaragoidiro.

### *Iakobo gasiriai Rebeni sabowa to*

<sup>42-43</sup> Rebeka ro umoro na-goi Iso iodio  
kimaragoidiro ro, nou ro ata sowake dubu iato  
gemeiriai Iakobo orobai ri.

Rebeka ro ibo Iakobo ato, 'Neito  
ma-dirowidiro-ro ata owera ie, aise  
ba-dosiodiro! Oro naramu ro esuai-ri  
emediawado! Ba-dou mo medera Rebeni nou  
aboto Haran sabowa ato na-omidiro!

<sup>44</sup> Iato egea mere se ba-domidiro, womu tato  
naramu serawo nama-omioduti-ri

<sup>45</sup> nou ro woki nama-emati-ri oro ro beda  
tanaro gosiodiro nou aboto, mo ro ata sowake  
dubu nato anama-emeiriai-ri oro nou ro  
amadi-orobai-ri orowameai ri neito. Modobo  
pua nitiro atu tau ato pamo koweai!'

<sup>46</sup> Taie Rebeka imese gou Aisaki aboto owera  
aro ri. Nou ro ibo Aisaki ato, 'Mo masawe  
ta-norobai iedi Hiti orobo teibo kiauri-ma aboto.  
Iakobo ro ata Hiti orobo ata kedea ato, mo  
idaibo komidiro modobo pua!'

## 28

<sup>1</sup> Aisaki ro iato gemeiriai nou sowake koroho  
dubu Iakobo aboto orobai-ri owou ri nou aboto  
owera emowauti ri. Taie Iakobo na-gorowateai  
nou aboto, Aisaki ro korosa iato gaiwai. Taie  
nou ro owera iato gemowapotai ibo, 'Oro ata  
besere ata neido Keineni duriomoro rido edea  
ate, idaibo Hiti busere.



<sup>2</sup> Oro ba-dou simara aramunegere bato omidiro Betuere, Mesopotamia duriomoro ato, oro mamu medera ie Rebeni iato tomidiro, oro ro nou besere ata ba-dedea! Nou nimo tanaro ie.

<sup>3</sup> Godi imese pupuwo ia dubu e oro nou ro korosa ba-maiwai. Sirio aramio merebusere ba-momio oro neio abera to ba-mararapoi, urubia dubu patu sirio neio aboudo amadimo-osuruwo-ri.

<sup>4</sup> Ibose iedi korosa ro Iawe ro Aberaham na-gomio iedi atu korosa ro oro aboto nou ba-miaiwo-ro. Iato iedi duriomoro ro oro aboto aise ba-miaiwai-ro ibose oro abora edi duriomoro ato na-omidiro, Godi ro iedi duriomoro ro keba se ta-gapoi Aberaham aboto.'

<sup>5</sup> Iato Aisaki ro Iakobo imese gemeiriai ito gou oromo teibo turituri to, iedi muso duriomoro ro tararasoro Mesopotamia. Nou a-gou-ro Rebeka medera Rebeni bato gomidiro. Rebeka ra Rebeni ra neitiro abera ie Betuere, nou Arama dubu e. Rebeka mere teibo ie Iso ra Iakobo ra.

<sup>6</sup> Iso umoro ta-goi Aisaki ro korosa na-gaiwai Iakobo aboto nou ro iato gemeiriai oromo teibo turituri to, duriomoro masiro Mesopotamia, nou orobo kedea aboto. Nou umoro idaibo ta-goi nou abera ro ta-gutura ibo, 'Oro ro edea ate ata besere ata Keineni duriomoro rido.'

<sup>7</sup> Iso ibose umoro ta-goi Iakobo mamu ra abera ra iedi owera ro na-garo-rido nou ro aise gisioidiro, iato gaimai nedi duriomoro ro neito Mesopotamia to.

<sup>8</sup> Idaro nou ro ibose ta-geremasibai neitiro abera ubi tato ie nou orobo teibo Keineni busere teibo ie.

<sup>9</sup> Nou ri nou ata orobo iato gedea, Keineni orobo pua, Aberaham ata mere Isimere iedi besere ro nou gedea Iso ro, iedi besere ro nou masiro Maharata, Nebaioti medera ie.

*Iawe hiwo to Iakobo aboito gorowawea*

<sup>10</sup> Iakobo Besiba imese gemeserai taie nou imese gaimai-ro Mesopotamia duriomoro to iato ata sabowa towamo masiro Harani neito gou-ro.

<sup>11</sup> Ipi ato duwo ro aise gematimuti. Nou na-giraroweauti nadi nato giwia iato giwou-ro, taie aise giaremuti gomogomo ato eputa neito gorowasiai, nou iato aise gutuwa norou.

<sup>12</sup> Iedi duwo ro iato na-gorobu nou ro a-giauri hiwo to auna negere totorowa Adiri rido ioudo gororuwo-ro womu tato goto ato ti-gotobowa. Iedi totorowa ro nato Godi sowake koroho urio arua a-giourio-rimo arua a-giroruwoidiro-ro iedi tanaro ro neio ro nou gosioidiro-rumo.

<sup>13</sup> Totorowa ohu to na-girarowea nou ro Iawe se gowea na-gotoi-ro totorowa ohu ato.

Taie nou ro ibo, 'Mo Iawe ie. Mo oro aramunegere ro ta-wisioidirotiti mo ubi tanaro, Aisaki ibose to tisioidirotiti mo ubi tanaro. Oro edi moro ato na-worobu norou iedi duriomoro ro mo ro nou nama-omia-ri oro.

<sup>14</sup> Mo ro ibose iedi duriomoro oro aramio merebusere iato ama-irowomidirotiti-ri atu se oro edio moro ato na-worobu norou. Oro aramio merebusere kioputi modobo pua imese sirio amadimo-oi-ri beda sosoro ra momoso, neio ro amadimo-orobodorai-ri moro moro, imese neio ro se ama-irowomidirotiti-ri. Taie sirio urubia patu neio aboudo korosa nato ama-orobodorai-ri.

<sup>15</sup> Mo oro mutu e. Oro beda moro to ou, oro mo ro anama-owairiwado-ri, keba to mo ro nama-orocho-ri oro mo wapo rudo kou e. Oro anamadi-owameai-ri nedi duriomoro ro neito, oro mo ro emeserai-ri pua. Mo oro aboto beda oweri nari, mo ro anama-isioidiro-ri iedi tanaro ro. Taie nou se ie.'

<sup>16-17</sup> Iakobo nedi tau nato norou aboudo aise geribidiro-ro, tere ro gorobai. Nou ro ibo, 'Morobise ie nedi moro ro nato Iawe tomidiro, mo umoro keba se oi pua. Nodi moro ro mo ro na-niauri aborabora se niauri. Nou morobise ia ie nedi moro ro nou Godi komidiro moto ie, ibose Adiri magere damo ie.'

<sup>18</sup> Taie ata kowaroho nou na-gerebua nou eputa edi nadi to na-gorowasiai nou ro komidai mea mino to iato gowotobowa taie nou ro Godi aboto aiwai ri dehoru to iato gemaseduti ohu rudo.

<sup>19</sup> Taie iedi moro ato na-gorobu, nou masiro Rusi. Iakobo ro ina dese orio masiro to giduti Betere, ibo owamo 'Godi komidiro moto ie'.

<sup>20</sup> Taie iato nou hodo a-gemakakaubiai-ro Godi aboudo, nou ro ibo, 'Godi mo mutu nama-imidirotiti-ri, mo nou ro namadi-iaurititi-ri nedi kou ro nato, mo nou ro ohona namadi-omiotiti-ri kiroidiro namabu namadi-omiotiti-ri, mo nou ro mea se nama-owaboi-ri

<sup>21</sup> ioudo namadi-owameai-ri mea se mo abera moto to, iato nou ubi tanaro anama-isioidiro-ri,

<sup>22</sup> iato iedi nadi ro mo ro mea mino to na-nowotobowa nedi duriomoro nou anama-arapoi-ri Iawe nato

namadime-emewabutiti-ri. Ina mo nou ro 10  
namabu komio ato nou mo ro kaupoti  
kemowameai ie.'

## 29

### *Iakobo a-gorowateai Rebeni sabowa to*

<sup>1</sup> Iakobo Betere rudo na-gaimai-ro nou  
a-gou-ro saiki boido idiawado-die, urubia  
torowomidiro iedi muso duriomoro iato nou  
neito gou-ro. Edi muso duriomoro ro neito  
na-gorowateai-ro

<sup>2</sup> nou ro nato gowea ata obo bobo iato  
na-gomidiro-ro mea moro ato.

Taie nou na-giraroweauti nou ro a-giwi  
netewa didi sipisipi soirio peteibi iato girobu-ro  
obo bobo gomo ato, neio kimowotoi urubia ro  
a-giwou-rimo obo imio ri. Auna nadi obo bobo  
nou ro gemopaidiro.

<sup>3</sup> Imese sirio sipisipi kimowotoi urubia atu se  
wirowarebaititi-mo nadi kowawodorowado obo  
bobo rudo taie sipisipi neio ro obo iato  
kimiaputi ie imese kimio ie, ina neio ro atu se  
nadi iato kowameai ie kowawodorowado obo  
bobo ohu to.

<sup>4</sup> Taie Iakobo ro sipisipi kimowotoi urubia iato  
na-gorowomidiro neio aboto ibo, 'Namuturubi,  
nio boido ra?'

Ina neio ro ibo, 'Nimo Harani urubia ie.'

<sup>5</sup> Taie nou ro ina iato gimodowa, 'Nio umoro  
ra ata dubu na-wimidiro nato Rebeni? Nou  
Nahoro aramu e.'

Ina neio ro ibo, 'Nimo umoro ie.'

<sup>6</sup> Taie ina Iakobo ro ibo, 'Nou bida buro ra  
modobo ato a-womidiro ra?'

Neio ro ibo, 'Nou modobo ato omidiro. Ito dirarowea daio nou besere, Rasere, sipisipi tiwou-die.'

<sup>7</sup> Taie Iakobo ro ibo neio aboto, 'Dirowidiro-rimo. Saiki turi ie, duwo pua. Abora sipisipi obo dimio-mo ba-diwameai-mo sugamoso iho moro to.'

<sup>8</sup> Ina neio ro ibo, 'A! Nimo ro idaibo tanaro kisioidiro pua, nimo aise keremoto ie womu tato arua sipisipi kimowotoi urubia korowateai ato, nedi tau ro nato nimo ro atu se obo bobo rudo nadi nato kowagare rie kowawodorowado taie sipisipi obo atu se nato kimio ie.'

<sup>9</sup> Nou ibo geremowauti iedi sipisipi kimowotoi urubia neio mutu, tuturu to pua iato Rasere ro gou-ro neito nou abera dubu iedi sipisipi neio mutu, neio nou ro imowotoititi.

<sup>10</sup> Iato Iakobo ro na-gowea Rebeni besere nou sipisipi mutu, nou imese gou iedi obo bobo ro neito taie nou ro edi nadi ro na-gemopaidiro-ro kowatateai taie nou ro Rebeni iedi sipisipi sirio ro obo iato gimio. (Rebeni Rebeka medera ie ina Rebeka Iakobo mamu e.)

<sup>11-12</sup> Iato tuturu to pua Iakobo imese gou-ro, iato gemowapotai Rasere, 'Rebeka mo mamu e. Nou neido gou oro abera urubia aboudo neitiro atu se ibo ie.' Nou ro kohiai iato gosomeai ina nou idobi iato gemerete.

Rasere ro na-girorowai iedi owera ro nou imese girario moto to, abera dubu iato gemowapotai.

<sup>13</sup> Taie Rebeni ro na-girorowai nedi owera ro nou medera mere sapuwo to, nou imese

girario-ro Iakobo owea ri. Nou ro na-gowea kotoi moro ato nato aise gohiai iato kosomeai taie neitiro atu se imese gidiai-rido moto to, iato Iakobo ro edi owera ro imese gorowauti nou beda sosoro gou-ro etou tanaro gororsioidiro-rimo.

<sup>14</sup> Rebeni ro ibo, 'Oro soro mo soro ie, oro mo mutu kaupoti karima ie.' Taie.

### *Iakobo orobo teibo giedea-ma*

Iakobo iato na-gomidiro kaupoti sogomi to

<sup>15</sup> Rebeni ro a-gutura ibo nou ato, 'Oro mo aruai boina na mere ie, modobo pua oro ro mo woko kemowati dorogora se wisa tato se. Oro etona ubi ro owamo mo ba-demowapotaiddiro-ro.'

<sup>16</sup> Rebeni ro netewa teibo besere teibo wiworohuti-ma. Keba besere Ria, saro besere Rasere.

<sup>17</sup> Ria nou idomari kirarowo ubauba ie. Rasere nou imese sagaru ia ie

<sup>18</sup> Iakobo ro na-iaurititi Rasere sagaru ia se wiwoho nou auna ubi nou aboto giamo.

Ina Iakobo nou ri gutura Rebeni aboto ibo, 'Mo ubi ie oro edi saro besere ro nou kedea aboto. Oro ubi nama-owamo-ri mo ro kedea aboto oro woko anama-emowatiti-ri 7 kisimisi to.'

<sup>19</sup> Ina Rebeni ro ibo, 'Modobo ie oro ro kedea nou. Ata dubu ata ro edea-ri pua. Oro nato ba-dimidirotiti mo abato.'

<sup>20</sup> Taie Iakobo ro Rebeni woko 7 kisimisi to wemowatititi Rasere kedea sapuwo to. Iakobo ro na-imaragoidirotiti edi kisimisi sirio ro 7 saiki sosoro ie, samo to giporeai mabu nou auna ubi ie Rasere kedea aboto.

<sup>21</sup> 7 kisimisi na-giporeai Iakobo iato gutura Rebeni aboto, 'Nodi tau ro nato mo orobo domia-ro abora mo ro anama-edea-ri. Mo ro hodo na-nasaubiai oro woko kemowati aboto 7 kisimisi ta-niporeai.'

<sup>22</sup> Taie Rebeni ro auna soriomu iato gosioidiro, urubia sirio iato garadabuti-rimo edi soriomu ro nou aboto.

<sup>23</sup> Saiki ta-gorioidoi duwo na-gereredea Rebeni ro Rasere owosuruo pua, Ria gowosuruwo-ro ioudo Iakobo moto to, taie iedi duwo ro neitiro iato aise girobu-ma atu moro ato.

<sup>24</sup> Rebeni ro ibose ta-gowosuruwo-ro nou ata sowake besere, masiro Siripa, Ria aboto iato gaiwai nou woko kemesioidiro sapuwo to.

<sup>25</sup> Ata kowaroho ato Iakobo na-gerebua, nou a-godaudiro nato Ria se gowea. Iakobo masawemasawe imese gou Rebeni aboto, nou ro ibo, 'Oro otou tanaro osioidiro-die mo aboto? Oro awawo woko ta-nemowatiti 7 kisimisi to mabu mo ubi owamotiti Rasere kedea aboto. Ina mo oro ro etou ri nasaubuti?'

<sup>26</sup> Rebeni ro ibo, 'Nimo duriomoro ato tanaro ibo iamo pua edina ro koroto ato saro rudo nou kedea ie keba se.

<sup>27</sup> Nedi tau ro nato kararemo tanaro ba-doporeai 7 saiki to ama-owamo-ri, mabira orobo mutu ba-domidiro keba se, taie iato neama orobo oro aboto nato nama-iwai-ri, ina ibose 7 kisimisi to mo woko ba-demowatiti-ro!'

<sup>28</sup> Rebeni beda owera garo Iakobo ro aise gosioidiro. Iato 7 saiki ta-giporeai kararemo tanaro ro giamo mabira orobo mutu gomidiro-rido. Taie Rebeni ro iato gaiwai nou ata besere Rasere Iakobo aboto.

<sup>29</sup> Ibose nou sowake koroho besere Biriha ibose ti-gaiwai Rasere aboto nou woko kemesioidiro sapuwo to.

<sup>30</sup> Iato Iakobo Rasere mutu imese girobu-ma iedi duwo ro nato. Nou auna ubi ie Rasere aboto, nou egea mere ubi ro iamotiti Ria aboto. Taie Iakobo imese gomidiro Rebeni woko iato emowatititi 7 kisimisi to. Taie.

*Iakobo sirio merebusere girasomai*

<sup>31</sup> Iakobo ubi auna se iamotiti pua Ria aboto, ina nou do ie Iawe ro Ria natonato gemati. Taie Iawe ro gabo nato gemosioidiro Ria nou merebusere kirotuti aboto kaupoti Rasere nou merebusere tato wimidiroititi.

<sup>32</sup> Ata tau Ria nou niro iato gowea. Taie nou keba mere iato goroto. Nou ro ibo, 'Iawe ro mo iedi mibo ro nou ro ta-gowea-die mo umoro ie ibo mo uramu ubi amadi-oi-ri mo aboto.' Ria ro nou ri giduti masiro Rubeni to, ibo owamo Hiburu owera to 'Mo iedi mibo ro nou ro ta-gowea-die'.

<sup>33</sup> Iato tuturu to pua Ria ina niro gowea, taie nou ro ata mere iato goroto. Nou ro ibo, 'Mo Iawe ro ta-nemerewidiro-ro mo giropu tato orobo ie ina mo noudo nomia-die nedi mere ro.' Ria ro nou ri giduti masiro Simioni to, ibo owamo Hiburu owera to 'Ta-nemerewidiro-ro'.

<sup>34</sup> Iato tuturu to pua Ria ina niro gowea. Taie nou ro ina ata mere iato goroto. Nou ro iato gutura, 'Abora mo umoro ie nedi tau ro nato mo uramu kimaragoidiro patu amadi-iwosiomai-ri mo aupiaupi to. Mo ro netewa didi dubu mere peteibi ta-niroto-ibi.' Nou ro nou ri giduti masiro



Riwai to, ibo owamo Hiburu owera to 'Aupiaupi to'.

<sup>35</sup> Iato tuturu to pua ina ata mere nou ro iato goroto. Nou ro ibo, 'Abora mo ro lawe anama-emowabutiti-ri.' Nou ri giduti masiro Iuda to, ibo owamo Hiburu owera to 'Kemowabuti'.

Taie nou iato mere kirotuti gabo rido aise garaubai.

## 30

<sup>1</sup> Rasere ibose ta-geremasibai simara mere kirotuti gabo rido ta-garaubai, masawemasawe imidirotiti nou mabira orobo na-iaurititi. Nou ro ibo Iakobo aboto, 'Mo teri gabo rido oro ro iedi mibo ro ba-demowagare-ro. Oro ro kosioidiro tato, mo anama-araburai-ri.'

<sup>2</sup> Iakobo nou auna serawo ro gorobai, nou ro ibo, 'Mo ro kosioidiro modobo ra idaibo sosoro tanaro? Godi ro gowagare oro mere kirotuti gabo rido.'

<sup>3</sup> Taie Rasere iato gutura Iakobo aboto, 'Mo sowake koroho orobo nou e Biriha oro nou mutu ba-dirobuti-ma. Nou ro beda merebusere irotuti io mo do ie. Taie mo merebusere ioudo nama-iwia-ri mo neio nama-iwoubua-ri.'

<sup>4</sup> Taie nou ro Biriha sowake koroho orobo iato gaiwai Iakobo aboto, ina neitiro iato irobotiti-ma,

<sup>5</sup> taie niro iato gowea. Iedi sowake koroho besere ro nou ro a-gemowahau Iakobo dubu mere.

<sup>6</sup> Taie Rasere iato gutura, 'Godi ta-garo ibo, "Mo ata ubauba tato ie". Godi ro mo iedi kararatoro owera ro ta-girowidiro, mo mere ta-nomia-die.'

Nou ri giduti masiro Dani to, ibo owamo Hiburu owera to 'Godi umoro ie mo ata ubauba tato ie'.

<sup>7</sup> Biriha ina niro iato gowea, nou ro ata mere iato goroto.

<sup>8</sup> Rasere ro ibo, 'Neitiro auna se nerematuti-do mo mabira orobo mutu, abora mo keba to imese neresia.' Nou ri giduti masiro Napatari to, ibo owamo Hiburu owera to 'Nerematuti-do'.

<sup>9</sup> Ria nou na-geremasibai nou modobo pua mere kirotuti aboto sowake koroho orobo Siripa ibose nou ro iato gaiwai Iakobo aboto. Neitiro ibo iroboti-ma,

<sup>10</sup> iato tuturu to pua Siripa niro ie, nou ro dubu mere goroto.

<sup>11</sup> Ria ro ibo, 'Imona.' Nou ro nou ri giduti masiro Gadi to, ibo owamo Hiburu owera to 'Imona'.

<sup>12</sup> Taie Siripa ata dubu mere ina iato goroto.

<sup>13</sup> Ria ro iato gutura ibo, 'Mo auna kamade ie, mo mamio sirio ro amadima-asoro-ri kamade to.' Nou ri giduti masiro Asere to, ibo owamo Hiburu owera to 'Kamade'.

<sup>14</sup> Iedi tau ro nato urubia pari namabu kidabuti tau ro gowamo. Rubeni imese gamedei tumu to iato arua petoko sosoro menedereki iopu iato giwia taie imese giwosuruwo-ro nou mamu Ria aboto. (Urubia ro a-wimaragoidirotiti-mo menedereki iopu kiho ato mamio mere gabo ato ina aise kotobowa ie.)

Taie iedi tau ro nato Rasere ro iato gutura Ria aboto, 'Modobo ra mo komia aboto oro mere edi menedereki ro?'

<sup>15</sup> Ina Ria ro ibo gemowameai, 'Mo uramu oro ro ta-nowasiri ina oro ubi ra mo mere menedereki oro ro owasiri-ri?'

Ina Rasere ro ibo, 'Mo oro ro namadi-omia-ri oro mere edi menedereki ro, oro mutu ama-irobu-mari Iakobo nedi duwo ro nato.'

<sup>16</sup> Iato adimo duwoduwo ro na-goi-ro Iakobo na-gohau-ro tumu rido ina iedi tau ro nato Ria imese gou Iakobo owea ri ina nou ro ibo Iakobo ato, 'Oro mutu anama-irobu-mari nedi duwo ro nato mabu oro sapuwo to mo mere edi menedereki ro wisa ta-naiwai Rasere aboto.'

Taie iedi duwo ro nato Ria Iakobo mutu aise girobu-ma,

<sup>17</sup> ina Godi ro nou kararatoro owera aise gemowameai-ro. Tutura to pua Ria niro na-gowea, nou ro ata dubu mere iato goroto.

<sup>18</sup> Nou ro iato gutura, 'Mo nedi mere ro Godi ro nomia-die mabu mo ro wisa ta-naiwai nou sapuwo to. Mo ro keba se ta-naiwai mo iedi sowake koroho besere ro mo uramu aboto.' Nou ri giduti masiro Isaka to, ibo owamo Hiburu owera to 'Wisa ta-naiwai'.

<sup>19</sup> Ina iato Ria niro ro owea-die, nou ata dubu mere goroto.

<sup>20</sup> Nou ro iedi mere ro na-goroto, nou ro ibo, 'Godi ro ina ta-nomia-ro mo ata mea mere, nou ro nirimagare mutu gaiwai-ro wisa tato se. Mo uramu ro masiro ohu to ama-owoubua-ri mabu mo ro 6 dubu mere ta-nirotuti nou sapuwo to.' Nou ri giduti masiro Seburuni to, ibo owamo Hiburu owera to 'Masiro ohu to kowoubua'.

<sup>21</sup> Ina besere iato goroto Ria ro, masiro a-giduti Daina.

<sup>22</sup> Taie Godi ro Rasere woki emati pua ta-gemaragoidiro-ro ibose ina nou kararatoro ower a ta-gemewidiro-ro. Nou ro gabo ta-gemodobura-ro nou merebusere kirotuti sapuwo to

<sup>23-24</sup> iato nou niro na-gowea nou ro dubu mere goroto. Taie nou ro iato gutura, 'Keba se siripo mutu nimidirotiti, abora Godi ro siripo ta-nemowatateai-ro. Mo modobo ie Iawe ro ata mere komia aboto.' Nou ri giduti masiro Iosepa to, ibo owamo Hiburu ower a to 'Ata komia ie'. Taie.

*Iakobo ro gimade-ro sirio kiwoubua namabu*

<sup>25</sup> Iosepa na-goroto Rasere ro, Iakobo iato gutura nou nogeredubu Rebeni aboto, 'Mo abora oro ro demapoi-ro, modobo ie mo simara duriomoro to korowameai.

<sup>26</sup> Mo upi merebusere oro ro diapoi-ro anama-iwou-ri, oro wisa woko ta-nemowatititi, oro ro imowairiai ate, aise demapoi-ro! Oro umoro ie, oro ta-nowarebaititi mea se.'

<sup>27</sup> Taie Rebeni ro iato gutura, 'Mo oro ro kamade na-nowaititi-ro oro modobo ie komidiro mo abato. Mo umoro ta-noi mo Iawe ro korosa ta-nomiotiti-ro mabu oro mo mutu imidirotiti.

<sup>28</sup> Mo abora demowapotai-ro oro mo ro etou wisa nama-omia-ri? Oro namadi-utura-ri mo ro anama-iwai-ri oro aboto.'

<sup>29</sup> Iakobo ro iato gutura Rebeni aboto, 'Oro umoro tiamotiti oro awawo woko ta-nemisioidirotiti mo ro.

<sup>30</sup> Abora oro sipisipi sirio ia ie nanigosi sirio ia ie. Taie oro mo ro ta-nemeaurititi, mo iedi tau ato na-norowateai-ro oro sipu tato

worohotiti-mo, abora nedi tau ro kainai mere sirio pua oro sipisipi nanigosi. Mo ro beda tanaro nisioidiro oro sapuwo to, lawe ro korosa ta-gaiwai oro aboto. Ina abora nedi tau ro nato mo simara upi merebusere sapuwo to mo etou tanaro nama-osioihiro-ri? Mo ro beda sosoro nama-iwarebai-ri neio?"

<sup>31</sup> Rebeni ro iato garatoro, 'Ina etou nama-omio-ri oro?'

Iakobo ro iato gemowameai, 'Mo ata nakomu ubi tato ie oro ro komia, nedi tanaro kaupoti ro oro ro nama-osioihiro-ri, mo anamadi-orowameai-ri oro sipisipi nanigosi anama-emeauri-ri.

<sup>32</sup> Abora mo ro sipisipi nanigosi anama-ieributi-ri garegare nanigosi imese sirio se, oro do ie, keakea sipisipi sirio se, oro do ie, dawade sipisipi kainakaina tititi se, sipu tato, mo do ie, tititi nanigosi sipu tato, mo do ie. Ibose sipisipi sipu tato dawade mo do ie kainakaina garegare se. Io mo wisa nou se ie.

<sup>33</sup> Oro namadi-orohotiti-ri mo sipisipi nanigosi nama-iraturio-ri, oro ro ata nanigosi titi tato nama-owea-ri, sipisipi garegare tato nama-owea-ri, oro umoro ba-doi mo ro a-niwopirua-ro. Oro umoro nato ama-ai-ri ibo mo morobise ra o bagea ra.'

<sup>34</sup> Taie Rebeni ubi aise goi. Nou ro iato gemowameai, 'Modobo ie ibose ba-mororsioidiro oro ubi tanaro.'

<sup>35-36</sup> Iakobo iedi sipisipi nanigosi ro na-girapoi, Rebeni ro aise giwadau nou aboudo ata muso moro to. Nou mere Peteibi ta-gimowapotai-ibi neibi ro iato imowotoi ri. Iedi sipisipi sirio

nanigosi sirio na-geremeserai-rimo Iakobo ro gimowotoi.

<sup>37</sup> Taie Iakobo ro ota atemo imese giasio-ro, iato takamai sapusapuwo se giamotuti, turi ato takamai mutu aise gimesere.

<sup>38</sup> Iedi takamai kiamutiti ota ro nou ro aise giwotoburio obo kidio moro ato. Nanigosi obo idio ri na-gou-rimo,

<sup>39</sup> ota atemo tititi sosoro gabo ato neio iato gororohi-rimo. Taie iato tititi nanigosi se girotuti-rimo. Iato neio na-girotuti-rimo nou ro imese gihodowa ata sapuwo to.

<sup>40</sup> Sipisipi obo idio ri na-gou-rimo, garegare nanigosi nou ro aise giwosioidiro neio sosoro gabo to, iato gororohi-rimo. Taie iato garegare titi mutu sipisipi nou girotuti-rimo. Iato neio na-girotuti-rimo nou ro imese gihodowa ata sapuwo to.

<sup>41</sup> Gamogamo nanigosi teibo na-gidororohiai-ri Iakobo ro tititi ota atemo kowosuwo ie neitiro sosoro gabo to.

<sup>42</sup> Ina tokatoka nanigosi teibo neitiro na-gidororohiai-ri Iakobo ro tititi ota atemo iaremo-ri pua. Gamogamo tititi mutu kirotuti ato Iakobo do ie, tokatoka tititi tato kirotuti ato, Rebeni do ie.

<sup>43</sup> Iakobo idaibo sosoro ibo goi auna. Nou abato sirio sipisipi nanigosi kemoro doniki sowake urubia upi dubu neio giworohuti.

## 31

*Iakobo a-godau Rebeni aboudo*

<sup>1</sup> Iakobo ro ta-gimororowai-ibi Rebeni iedi mere peteibi ro beda sosoro owerā to geremowauti-birimo ibo, 'Iakobo imese sirio namabu patu neibi abera iedi namabu patu ro nou ro ta-gimade-ro nou imese namabu sirio dubu to ta-garapoi.'

<sup>2</sup> Ina Iakobo ta-geremasibai Rebeni nou ata sosoro goroho, nou punugo karauduti se goroho.

<sup>3</sup> Taie Iawe ro nato emowapotai-die, 'Iakobo, oro ba-dorowameai abera duriomoro to, oro nama-orowameai-ri mo oro mutu nato nama-ou-ri.'

<sup>4</sup> Iakobo na-gou sipisipi nanigosi kimowotoi moro ato na-gomidiro, owerā ioudo gemeiriai-ro Rasere ra Ria ra ou ri nou aboto.

<sup>5</sup> Neitiro iato ou-diodo nou aboto, taie Iakobo ro iato gutura neitiro ato, 'Nitiro abera mo ro ta-nimowea-ma nou punugo karauduti na-oroho, nou ibo pua mea se kirarowo mo aboto, nou keba se modobo ato wirohotiti. Abora nou ata sosoro nowea mo ro, kaupoti Godi ubi tanaro mo abera ro ta-wemesioidirotiti, nou mo mutu nirohotiti-do.

<sup>6</sup> Nitiro umoro ie nitiro abera dubu woko ta-nemowatititi korosakorosa.

<sup>7</sup> Kaupoti mo nou ro ta-nowakopeamutititi, ibose mo wisa sapuwo to nou ro 10 tau to nasaubutititi, ata tau ata owerā kutura ie, ata tau ata owerā kutura ie, mo Godi ro ta-nowasiotiti gabo nitiro abera aboudo mo nou ro ubauba kowai sapuwo to.

<sup>8</sup> Ata tau nitiro abera ro ta-gutura ibo, "Oro kopoutikopouti nanigosi sirio anama-omio-ri oro woko na-iwatiti nou wisa ie." Iato upi

nanigosi ro imese girotuti-rimo dawade kainakaina kopoutikopouti se sirio.

Ina nitiro abera owera iato giwesegerai, “Oro tititi se nanigosi anama-omio-ri oro woko na-iwatiti nou wisa ie.” Iato upi nanigosi ro imese girotuti-rimo dawade kainakaina tititi se sirio.

<sup>9</sup> Ina Godi ro ta-giwatateai nitiro abera aboudo iedio nanigosi kainakaina sirio ro, mo aboto giaiwo-ro.

<sup>10</sup> Iedi tau ato nanigosi na-irorohi-mo, mo ro hiwo to ta-niauri dubu nanigosi sirio tititi se kopoutikopouti neio ro giohi-rimo upi nanigosi.

<sup>11</sup> Godi sowake urio ro garo-die mo aboto, “Takobo!”

Mo ro iato nemowameai, “Mo nou e.”

<sup>12</sup> Nou ro ibo, “Ma-dirarowea-ro. Oro tititi kopoutikopouti nanigosi neio ro se ororohi-dumo, Rebeni edi garegare nanigosi ro upi nanigosi neio ro iohi pua mabu mo ro ta-niaurititi Rebeni ro edio ubauba tanaro ro na-isioidirotiti oro aboto.

<sup>13</sup> Mo Godi ie, oro ro edina emowabutiti. Mo oro aboto keba se ta-norowawea Betere ato, iato oro ro ta-gemasia ata nibonibo dehoru iedi nadi na-gowotobowa nou ohu rudo, iato hodo oro ro ta-gasaubiai mo aboudo. Abora nedi duriomoro ba-demeserai-ro oro ba-dorowameai simara koroto duriomoro to.” ’

<sup>14</sup> Taie Rasere ra Ria ra neitiro na-gimowauti-ma nedi owera ro, taie neitiro ro uramu iato gemowameai-rido ibo, ‘Neitiro Idau nama-araburai-ri neitiro nou ro ata nakomu ata imowameserai-ri pua, neitiro nou ro



kimeserai-ma kawa anamadime-eserai-mari.  
Neitiro nou ro ubauba se niworohutiti-ma.

<sup>15</sup> Bida sosoro ra neitiro ata sabowa besere  
teibo sosoro, nou ro irasomai-ma pua, neitiro  
nou ro idaibo sosoro niworohutiti-ma. Neitiro  
oro aboto imese niaiwai-marō, neitiro  
kitohiti-ma wisa nou ro kouho kawa ta-gouho.

<sup>16</sup> Neitiro abera edi namabu sirio ro Godi ro  
imese aise giwagare-ro nou aboudo neitiro  
aboto, neitiro merebusere mutu. Ina nou rie  
Godi beda owerā garo oro aboto, aise  
ba-dosioidiro!'

<sup>17-19</sup> Rebeni sipisipi musuga iwasio ri gou. Iedi  
tau ro nato Rebeni poto-ro ie moto ato Rasere  
nato godoro nou moto to taie nou ro piro to  
abera iedi ota titi ro na-gisioidiro iato  
gimidai-ro. Taie iato Iakobo upi merebusere nou  
ro kaupoti moro to gidabuti, ibose namabu sirio  
na-gidabuti iato giaremuti nou ro sirio kemoro  
ohu ato.

Taie nou iato iodi moro ro na-gemeserai nou  
a-gasiriai-ro Keineni duriomoro to nou abera  
beda moro ato gomidiro. Nou keba se  
a-gitiodorai nou beda mutu kiwoubua namabu  
sirio ra idaibo nanigosi sipisipi kemoro  
burumakau doniki, imese neio ro gou-rimo. Iato  
imese beda mutu namabu patu sirio ra sirio se  
aise giaubai ata nakomu ata nou ro emeserai  
pua. Iedi namabu sirio ro nou na-imidirotiti  
Mesopotamia duriomoro ato nato giwia.

<sup>20</sup> Taie iedi tau ro nato Iakobo ro nogeredubu  
a-gasaubuti, nou ro emowapotai pua nou  
kemeserai aboto. Rebeni nou Arama gu dubu e.  
Nou aboto Iakobo ro ibo utura pua, 'Mo

anama-ou-ri iedi duriomoro neito,' nou dorogora se piro se goropirutai-ro ioudo upi merebusere mutu.

<sup>21</sup> Taie Iakobo ioudo na-gou-ro Iupereitisi oromo ipi ato nato gowea. Taie neio ro na-giabu-rimo iedi oromo ro noudo, gabo towamo nou gobodoro-rimo neio ro podo sirio duriomoro to, iedi duriomoro ro masiro ararasoro Giriadi.

<sup>22</sup> Netewa didi saiki saro gabo ato Rebeni nou umoro nato goi ibo 'Iakobo ibi ta-wodau-bimo mo aboudo.'

<sup>23</sup> Taie nou simara urubia iato gidabuti-ro nato gobodoro-rimo wapo rido. Neio ro Iakobo 7 saiki to na-gobodoro-rimo, ipi ato neio ro nato gowea-rimo Giriadi podo duriomoro ato.

<sup>24</sup> Taie iedi saiki ato gowea-rimo nou, iedi duwo ro nato Godi ro orowapotai-die Rebeni aboto hiwo to, nou ro ibo, 'Oro umoroumoro se ata owera ata ubauba owera utura ate Iakobo aboto.'

<sup>25</sup> Iakobo nou urubia mutu parai moto kainakaina ta-geremari Giriadi ato, taie iato Rebeni ro gorowateai-ro nou urubia mutu parai moto iato aise geremari nou abato.

<sup>26</sup> Rebeni ro iato gutura Iakobo aboto, 'Oro etou tanaro gosioidiro mo aboto? Oro auna ia karasaubuti gosioidiro-die! Mo besere teibo oro ro iato iwadau-madie neito beda sosoro ra neitiro oro ro tumu rido kiaubai-ma.

<sup>27</sup> Oro etou mabu ato godau-die piro se na-goropirutai-die neito? Mo oro ro auna ia se nasaubuti, oro ubi tato ra mo kemowapotai keba se? Oro mo ro mea se ba-notiodorai-die, oro mea

soriomu na ba-nemesioidiro urubia komaro,  
gama ra pate ra kiado, oro nou mutu  
ba-notiodorai.

<sup>28</sup> Mo aramio isome pua, mo besere teibo  
aboto iawo utura pua idaibo tanaro mo ro nou  
ba-nisioidiro. Oro odio tanaro ro na-gisioidiro  
imese ubauba tanaro gisioidiro.

<sup>29</sup> Mo abora pupuwo towamo mo urubia mutu  
oro ubauba kowai aboto, kaupoti nedi duwo ro  
nato Godi oro abera Aisaki ro na-emowabutiti  
hiwo to oweru nou ro aro-die mo aboto ibo mo  
ro ata oweru ata kutura modobo pua oro aboto.  
Mo umoro ie oro duriomoro giropu ro  
ta-gorobai-ro, nou ri orowameai-die,

<sup>30</sup> ina mabu boira mo kisioidiro ota titi oro ro  
na-giwopirowa-die?’

<sup>31</sup> Taie Iakobo ro iato gemowameai Rebeni,  
‘Oro mo ro na-nemeserai mo ro emowapotai  
pua, mo tere ie oro besere teibo ina kiapopo-ma  
ie mo aboudo.

<sup>32</sup> Ina oro ro nama-iwia-ri oro kisioidiro ota  
titi etu ro gimidai nou ro ba-mowea pamo!  
Abora neibi namabu ba-dimahederewado, oro  
simara namabu ba-dieibimo neio se ba-dimidai.  
Oro urubia ro amadimi-iauri-ri oro beda  
namabu iwameai.’

Ina Iakobo umoro oi pua edio kisioidiro ota  
titi ro Rasere ro na-giwopirowa-ro, nou abato  
giamo.

<sup>33</sup> Taie Rebeni nou iato gatamuai kiosora, nou  
ro iato gimahederewado Iakobo iedi parai moto  
neido gatamuai-ro nou namabu na-gemeauri,  
iato owea pua ata nakomu ata. Iato a-gemeserai

Iakobo moto imese gou-ro Ria iedi moto ro neito nou namabu na-gemeauri, ota titi iwia pua iato.

Taie sowake koroho orobo teibo neitiro moto ato na-giosora neitiro moto ato iwia pua.

<sup>34</sup> Iedi tau ro nato Rasere ro ta-gibiria iedi ota titi ro kemoro ohu ato komidiro nakomu nou maumo to giwaumia, nou ro aise giahidimai nou ohu ato gomidiro. Taie Rebeni Rasere iedi moto ro neito na-godoro nato egea se giosora nou ro iwia pua.

<sup>35</sup> Taie Rasere ro ibo abera aboto, 'Idau, oro serawo na ie mo aboto. Mo modobo pua kotobowa aboto oro sosoro gabo ato mabu mo abora sagana mutu nomidiro.'

Taie ina Rebeni imese goroho iedi moro ro neito parai moto na-gorowotoi nou ro ina iato giosora, nou ro ata ota titi ata owea pua.

<sup>36</sup> Iato Iakobo auna serawo ro gorobai nou ro iato gutura ibo, 'Mo etou tanaro nosioidiro, etou sabi nesebea oro ro nou ri a-naipirioi-die neito? Mo namabu oro ro nou ri a-nemahederewado?

<sup>37</sup> Oro ro ata nakomu ata owea pua nato neibi abato. Oro ro na-iwia obi ma-diedea-ro nimo sosoro gabo ato, nato ba-niauri-rimo atu se oro urubia ie mo urubia ie. Abora nimo anamadime-eremowauti-ri nedi tau ro nato etu ra morobise etu ra karasaubuti.

<sup>38</sup> Oro sapuwo to mo ro awawo woko ta-niwatititi 20 kisimisi to. Oro kiwoubua namabu na-nemeaurititi kainakaina nanigosi sipisipi kainakaina neio orowaburotiti pua mamio ro kirotuti ato. Idaro dubu sipisipi ata mo ro ouho pua.

<sup>39</sup> Oro sipisipi nanigosi ata kouho ato tumu na ro ata ro kowopirowa ato ina oro aboto mo ro iwapotaidirotiti pua, kaupoti mo edi nanigosi sirio ro sipisipi ro mo ro bobo neito nimodomotiti.

<sup>40</sup> Mo saiki ro auna se nasiaititi oro woko na-nemowatititi mo pupuwo kaseperai ie, duwo ato mo mea norou orobutititi pua, kokamokokamo norobutititi.

<sup>41</sup> Mo temeteme ta-niaurititi oro woko na-nemowatititi 20 kisimisi to. Kibase 14 kisimisi to nemowatiti oro besere teibo sapuwo to ie. Ina dutu ata 6 kisimisi to na-niwatititi edi namabu sirio ro na-oroho-dumo nou sapuwo to niwatititi woko. Mo wisa mutu oro ro 10 tau to nasaubutititi, ata tau ata owera kutura ie, ata tau ata owera kutura ie.

<sup>42</sup> Godi Aberaham ro na-wemowabutititi, mo abera Aisaki nou ro na-emowabutititi, nou mo mutu komidiro tato rasiri ie mo oro ro kotiodorai kawa ba-notiodorai-ro ata nakomu tato. Kaupoti Godi ro ta-giauri-ro mo odio mibo ato na-nimidiro mo ata wisa tato woko na-niwatititi. Ina oro abora duwo Godi ro ta-wotuputai-ro.'

<sup>43</sup> Rebeni iato gutura Iakobo aboto, 'Iedi besere teibo ro mo besere teibo ie. Neitiro merebusere mo do ie ibose. Ina iedi kiwoubua namabu sirio ro na-woroho-dumo mo do ie ibose. Oro na-iraroweauti imese beda mutu namabu sirio ra mo do ie. Kaupoti mo ata gabo tato ie mo besere teibo aramio mo ro kiwameai ie aboto.

<sup>44</sup> Abora neitiro nato owera mea mino to mosioidiro-rido, hodo nato mebuai-rido, nadi soirio atu moro to namadi-iwoiriamuti-ri mea mino to neitiro eremasoro na ie.'

<sup>45</sup> Iakobo ro auna nadi gebari tuputupu se iato gowotobowa. Nou ro urubia iato gimowapotai, 'Nadi didabuti-rimo neito!'

<sup>46</sup> Taie nou edi urubia sirio ro neio imese gimou-rimo nadi kidabuti iato giwoiriai-rimo atu moro to.

Taie nadi soirio abato neio komititi kaupoti moro ato iato giho-rimo.

<sup>47</sup> Taie iedi moro ro masiro Rebeni ro a-giduti Arama oweru to 'Iegara Sahaduta', Iakobo ibose ti-gomia Hiburu oweru to 'Gareda'. Masiro teibo iamo-ma ibo 'Nadi soirio na-iamo eremasoro na ie'.

<sup>48</sup> Rebeni iato gutura Iakobo aboto, 'Nedi nadi soirio ro na-iamo neitiro umoro nou ro nama-iwaititi-mari neitiro abora beda sosoro to neremowauti-do nato hodo na-neremebuai-do, sapuwo oro aboudo ie sapuwo mo aboudo ie.' Ina nou do ie neitiro ro noudo gomia-rido masiro 'Nadi soirio na-iamo eremasoro na ie'.

<sup>49</sup> Ata masiro asoro-dumo ibo 'Misipa', ibo owamo 'Kiauri' mabu Rebeni ro iato gutura ibo, 'Modobo ie neitiro Iawe ro anama-iaurititi-mari neitiro korohodowa to.

<sup>50</sup> Mo besere teibo ubauba se nama-iworohuti-mari, oro arua upi nama-iaremo-ri, arua urubia ro kiauri tato, kaupoti ba-dimaragoidiro Godi ro ama-iauri-ri, nou umoro koi ie.

<sup>51-52</sup> Abora nou e hodo neremasaubiai-do nadi soirio tiamo mo ro edina niaremuti ina auna negere nadi tuputupu se ta-nowotobowa ata sapuwo ato towamo neitiro emaragoidiro na ie. Neitiro nou ro namadi-owaititi-mari umoro abora hodo beda sosoro to neremebuai-do nato. Oro ro modobo pua nedi nadi soirio ro neio

kimasaudai. Oro mo sapuwo to iradauri ate mo urubia ubauba kiwaititi aboto. Mo ibose iradauri pua oro sapuwo to oro urubia ubauba kiwaititi aboto.

<sup>53</sup> Aberaham iedi na na-emowabutititi, Nahoro edina na-emowabutititi, neitiro nasa Tera edina na-emowabutititi, neitiro ata etu ro iradauriai ata sapuwo to, hodo etu ro asiai, iedi urio ro nou ro nou ubauba ama-owai-ri.'

Taie nedi tau ro nato Iakobo nou hodo iato gemasaubiai Rebeni aboudo. Nou abera ro edina na-emowabutititi nou masiro ato gemasaubiai.

<sup>54</sup> Iato Iakobo na-girario kaupoti kiwoubua nakomu nou ro iato gopia ioudo na-gowarario-ro podo ato nato imese gematowea Godi aboto gaiwai.

Taie nou ro iato gidabuti-ro nou iedi urubia ro kaupoti moro ato ohona iho ri, ina iedi duwo ro nato neio aise girobu iedi podo nato.

<sup>55</sup> Ata kowaroho na-gowaroho Rebeni nou aramio merebusere atu moro to na-gidabuai-ro, taie nou aramio na-gisome, besere teibo aboto iawo na-gutura, korosa iato gaiwai neio aboto, taie Rebeni imese gorowameai simara duriomoro to. Taie.

## 32

### *Iakobo Iso mutu kororowea gabo gisioidiro*

<sup>1</sup> Iakobo ina ioudo na-gaimai-ro Giriadi podo duriomoro rudo, ipi ato Godi sowake urio mutu neio iato gororowea-rimo.

<sup>2</sup> Taie Iakobo ro nato gutura ibo 'Nou Godi edi aimara sabowa ro nou e.'

Taie iedi moro ro nou ro masiro a-giduti Mahanaimi, Hiburu oweru to owamo ibo 'Aimara sabowa teibo ie'.

<sup>3-5</sup> Iakobo naramu Iso iato imidirotiti iedi duriomoro masiro Sia, iato owamotiti Idomu duriomoro ato. Iakobo ro ibo nou sowake urubia aboto, 'Nodio oweru ro demowou-mo mo eputa dubu Iso ba-demowapotai-mo nio ro ibo, "Oro sowake dubu Iakobo nou ro aro-die 'Mo ta-nimidirotiti Rebeni abato, womu tato abora nou e. Mo abora burumakau sirio, doniki sirio, sipisipi sirio, nanigosi sirio, sowake urubia upi dubu sirio mo abato toroho-dumo. Mo ro nemeiriai nedi oweru ro oro aboto, modobo ie oro mea se kimaragoidiro nimo aboto.' " ' "

Taie Iakobo nou sowake urubia iato gimeriai Iso oweru neio ro gemowou-rimo.

<sup>6</sup> Taie tuturu to pua Iakobo iedi sowake urubia ro aise gorowameai-rimo nou aboto. Neio ro ibo, 'Nimo ta-nou-mo oro naramu Iso aboto. Nou 400 dubu mutu tou-die oro owea-ri.'

<sup>7-8</sup> Iakobo ro na-girorowai edi oweru ro, nou auna tere ro gorobai, iato kimaragoidiro siriosirio gou-rimo. Nou a-gimaragoidiro, 'Etu umoro ra neio boso owou-dioumo mo aboto.'

Taie Iakobo urubia iato gihoduti netewa teibo patu to gihodowa-ma, arua urubia ito sapuwo to na-gihodowa arua neito sapuwo to gihodowa-ro. Kiwoubua namabu sirio nou ro ibose iato gihoduti, arua ito na-gihodowa arua neito iato gihodowa-ro. Iakobo ro ibo a-gimaragoidiro, 'Etu umoro ra Iso serawo mutu namadi-ou-ri nou ro neio ba-miwota iedi keba urubia dubu patu ro, arua kiwoubua namabu mutu neio ba-miopia,



ata urubia dubu patu neio korowadau modobo ie arua kiwoubua namabu mutu.'

<sup>9</sup> Iakobo iato gutura Godi aboto, 'Mo aramunegere Aberaham oro do ie, mo abera Aisaki oro do ie. Iawe, mo oro ro nemowapotai-ro mo orowameai-ri simara duriomoro to, mo upi merebusere mutu. Oro ro ta-nemowapotai-ro mo mea se iauri-ri.

<sup>10</sup> Mo mea dubu pua, kaupoti mo nirimagare mutu oro ro auna se nemaragoidirotiti-ro. Mo omona tau ato na-nou-ro mo simara duriomoro rudo Iodeni oromoturi na-nabu-ro mo namabu tato nabu-ro. Mo a-nabu-ro gonopu kawakawa mutu nou norobidiro nouto niradiouti-ro. Abora mo namabu imese sirio ia ie, sowake urubia imese sirio ia ie, modobo ie mo aimara sabowa teibo netewa teibo kisioidiro-ma.

<sup>11</sup> Mo dowarebai-ro! Mo naramu ipi ato tou-die. Nimo modobo pua ipi ato nou ro kiopia. Mo tere ie nou neito namadi-orowateai-ri mo aboto.

<sup>12</sup> Mo oro ro keba se ta-nemowapotai-ro ibo, "Oro mo ro anama-iauri-ri mea se, oro aramio merebusere mo ro sirio anama-emowai-ri koriri beda sosoro ra kioputi modobo pua urubia ro."'

<sup>13</sup> Iedi duwo ro nato Iakobo nirimagare mutu kiaiwai namabu iato gidabuti, nou simara kiwoubua namabu nou na-gidabuti naramu omia na,

<sup>14</sup> nou ro nanigosi iato gemadabuti 200 upi, 20 dubu, ina sipisipi iato gemadabuti 200 upi, 20 dubu,

<sup>15</sup> ina 30 upi kemoro neio dawade kainakaina mutu iato gemadabuti, burumakau iato

gemadabuti 40 upi, 10 dubu, ina doniki iato  
gemadabuti 20 upi, 10 dubu.

<sup>16</sup> Nou ro sowake urubia gabogabo giasouti  
iedi erere kiwoubua namabu ro. Taie nou ro  
ibo, 'Ba-daimai-mo nio keba se ipi ato bobo isia  
aise gi-iwamo-ri ina ata mere kiwoubua namabu  
mutu nato gi-aimai-ri.'

<sup>17</sup> Taie neio nedi owera ro nou mutu gimeiriai.  
Keba dubu nou ro na-gemeriai sirio kiwoubua  
namabu mutu, nou ro a-gutura, 'Mo naramu  
namadi-ou-ri oro aboto, oro nou ro  
ama-emodowa-ri ibo, "Oro etu sowake dubu ra,  
ina oro boito ama-ou-ri? Io etu do ra iedi  
kiwoubua namabu sirio ro?"

<sup>18</sup> Ina oro ro ba-demowameai ibo, "Neio oro  
sowake dubu Iakobo, nou do ie. Nou ro  
emapoi-die oro nirimagare emati-die, imese  
sirio se oro do ie. Nou ibose tou-die nimo wapo  
rido." '

<sup>19</sup> Iakobo ro idaibo sosoro atu owera ibose  
ti-garo ata dubu aboto, ina ata dubu aboto ibose,  
ina ata dubu aboto ibose, nou ro atu owera neito  
gimowauti, 'Iso kowea ato idaibo sosoro owera  
to ba-demowauti-mo,

<sup>20</sup> "Oro sowake dubu tou-die saro rudo." '

Iakobo a-gimaragoidiro, 'Mo ro  
nama-imeriai-ri nedi nirimagare kiwoubua  
namabu ro keba se, etu umoro ra mo edi  
ubauba tanaro ro na-nosioidiro keba se nou ro  
woki ama-emati-ri, ina mo nou ro  
anamadi-emaiddorai-ri.'

<sup>21</sup> Taie Iakobo ro imese gimeriai iedi  
nirimagare kiwoubua namabu sirio ro nou  
sowake urubia mutu, neio imese gou-rimo Iso  
aboto.

Taie neio nou ro na-gimeriai, nou edi duwo ro nato aise gomidiro aimara sabowa ato.

*Iakobo Godi mutu goroworoho-rido*

<sup>22-23</sup> Iedi atu duwo ro nato Iakobo ro upi merebusere namabu patu mutu imese giwaboi Iaboko oromo turi to. Taie neio iato gimeriai oromo turi sapuwo to imese giabudiro-rimo kabudiro moro ato. Nou orobo teibo, nou sowake orobo teibo edina giedea-ma ina nou 11 dubu mere neio ro giabu-rimo.

<sup>24</sup> Nou abu pua neio mutu nakara se aise geremeserai-ro iato gomidiro.

Iato ata dubu ro gosuwoidiro-ro nou aboto paea dubu sosoro gou-ro. Taie iato nou mutu nato goroworoho-rido duwo tuturu neitiro edi tanaro ro nou gowati-rido koroworoho, womu tato saiki banibani kiwotowa aboto.

<sup>25</sup> Iedi dubu ro ta-geremasibai, 'A Iakobo mo ro kowaburuti modobo pua.'

Taie Iakobo nou ro doto abo na-gowasomai taie nou doto aise gemahudiai.

<sup>26</sup> Taie nou ro Iakobo aboto iato gutura, 'Mo demeserai-ro mabu saiki tidiai-die.'

Ina Iakobo ro ibo, 'Mo oro ro korosa nama-omia-ri, oro mo ro nato anama-emeserai-ri.'

<sup>27</sup> Dubu ro iato gemodowa, 'Oro masiro etu ra?'

Ina Iakobo ibo, 'Mo masiro Iakobo ie.'

<sup>28</sup> Dubu ibo, 'Oro Iakobo to abora ararasoro-ri pua. Oro orio masiro a-nomia Isiraere. Mabu owamo ibo oro mo mutu nato ta-noroworohodo, ibose oro keba se ta-goroworoho urubia mutu.'

Abora oro keba to ta-weresia-ro.' Iedi masiro ro Isiraere Hiburu owera to ibo owamo 'Nou Godi mutu oroworoho-do'.

<sup>29</sup> Iato Iakobo ro emodowa edi dubu ro, 'Ina oro masiro etu ra?'

Ina edi dubu ro iato gemowameai ibo, 'Mo masiro etou mabu ato emodowa-die?' Iato Iakobo nou ro korosa iato gowai.

<sup>30</sup> Taie Iakobo ro ibo, 'Iedi tau ro nato Godi sosoro woidomari ta-nemowea, kaupoti mo araburai pua.' Mabu edi moro ro nou ri giduti masiro Peniere, Hiburu owera to ibo owamo 'Godi sosoro woidomari ie'.

<sup>31</sup> Taie saiki ro gidiai-ro Iakobo ro na-gemeserai edi moro ro, nou kimoduhikimoduhi se gou-ro mabu nou doto temeteme se gowamo.

<sup>32</sup> Abora nou do ie Isiraere urubia neio doto sumi dao beda mutu kiwoubua namabu patu ra neio ro iho tato mabu Iakobo iedi moro ro nato gowasomai doto mabu ato.

## 33

### *Iakobo Iso mutu gororowea-rido*

<sup>1</sup> Iakobo na-girarowea nou ro a-giwia 400 urubia sirio na-gou-rimo Iso mutu. Iakobo ro na-giwia neio, nou merebusere iato gihoduti simara mamio mutu giwotoburio.

<sup>2</sup> Iakobo ro keba to a-giwesia-ma nou sowake koroho orobo teibo neitiro merebusere mutu keba se neibi ro gai-birimo. Iato Ria merebusere mutu neio ie, iato Rasere tiro ie Iosepa mutu neitiro wapo rido.

<sup>3</sup> Iakobo ia nou keba to geresia nou ro na-gowea nou naramu Iso, nou iato sopu to aise giraposowa. Nou neido kou iato aise kiraposowa ie sopu to, neito gorowati nou kou ato aise kiraposowa ie, nou ro 7 tau to giraposoro sopu ato.

<sup>4</sup> Taie Iso ro na-gowea Iakobo, nou ioudo aise gerepeduai-ro komidiro moro rido, imese girario-ro Iakobo aboto. Iakobo nou ro nato aise gohiai iato gosome, taie neitiro idobi iato geremerete-rido.

<sup>5</sup> Iato Iso na-girarowea mamio merebusere mutu a-gorowotoi, nou ro Iakobo iato emodowa, 'Nou beda mamio ro orowotoi merebusere mutu? Neio etio ra?'

Iakobo ro ibo, 'Neio mo upi merebusere ro orowotoi, Iawe nou nirimagare ato giaiwo-ro oro sowake dubu, mo aboto.'

<sup>6</sup> Taie iato keba se nou ro ta-gihoduti nou upi merebusere ina keba se sowake koroho orobo teibo neitiro ro gou-rido merebusere mutu. Neitiro merebusere mutu na-gou-rido Iso aboto neio sopu to aise giraposowa-rimo.

<sup>7</sup> Taie ina ibose Ria nou merebusere mutu na-gou neio sopu to aise giraposowa-rimo. Taie iato Rasere Iosepa mutu na-gou idaibo tanaro ibo ti-gosioidiro-rido sopu to aise giraposowa-rido.

<sup>8</sup> Iso ro ibo, 'Oro mo ro sirio kiwoubua namabu ta-nemowea mo edio tau ato na-nou-die. Etou mabu ato iwou-die iedi kiwoubua namabu sirio ro?'

Iakobo ro ibo, 'Auna dubu, oro kamade kowai sapuwo to ie mo ro nou ri niwou-die.'

<sup>9</sup> Iso ro ibo, 'Mona mo neama, mo abato idaibo sosoro namabu sirio se toroho-dumo, oro edi kiwoubua namabu sirio ro oro do ie, ba-diworohuti!'

<sup>10</sup> Ina Iakobo ro ibo, 'E e, ibo pua buro naramu. Oro kamade na-woi-die mo aboto, modi kiwoubua namabu sirio ro mo ro oro nemapoi, dimidai buro! Mo auna kamade ie oro mo ro sosoro beda sosoro nowea abora idaibo sosoro ie Godi sosoro woidomari kowea aboto, mabu mo oro ro ta-nemaidodorai-ro.

<sup>11</sup> Abora oro binio to nemediai mo edi nirimagare kiwoubua namabu sirio ro na-niwou-die oro ro kimidai aboto, mabu Godi nou meamea tanaro mo aboto ta-wisioidirotiti. Mo ro sirio ia se niworohuti, arua oro do ie oro nama-omia-ri.' Nou ro ina ina binio to gemediawado, womu tato Iso ti-garaidodorai.

<sup>12</sup> Ina Iso ro iato gutura, 'Neitiro anamada-aimai-ri, mo mutu atu se anamado-ou-ri.'

<sup>13</sup> Iakobo ro a-gemowameai nou ibo, 'Auna dubu, oro umoro ie mo merebusere pupuwo tato ta-woi-mo kou aboto, mo kiwoubua namabu sirio kainakaina mamio mutu, mo modobo ie neio mea se kimowotoi. Mo ro neio nama-imagege-ri hio ito namadimo-ou-ri neio amadimo-orowaburai-ri ipi ato.

<sup>14</sup> Auna dubu, modobo buro ie oro keba se ba-daimai oro mo ro umodi to anama-obodoro-ri mo merebusere kiwoubua namabu sirio mutu, ina mo neio kou to nama-ou-ri, womu tato oro kematimai Idomu duriomoro ato.'

<sup>15</sup> Iso ro ibo, 'Oro mo ro emowameserai-ri ra arua dubu.'

Ina nou ro iato gemowameai, 'E e, marasio buro, oro ro emowameserai ate, oro kamade ta-woi mo aboto. Mo oro ro ina kowarebai modobo pua.'

<sup>16</sup> Iedio saiki ro nato Iso nou ioudo gaimai-ro Idomu to gorowameai.

<sup>17</sup> Ina Iakobo nou Idomu to ou pua, nou ata moro towamo masiro Sukoti neito gou, iato moto aise gididi, ibose mapagea sirio iato gitomo kiwoubua namabu sirio sapuwo to. Ina nou rie iedio moro ro ararasoro 'Sukoti', Hiburu owerato owamo ibo 'Mapagea'.

<sup>18</sup> Iakobo ro ta-gemeserai Rebeni duriomoro oromo teibo turituri ato na-owamo nou mea se gorowateai-ro Keineni duriomoro to, Hiwi gu dubu Sekemi beda sabowa to gomidiro, neito gorowateai-ro. Taie iedi sabowa ro nato saiki beda sapuwo rido idiawado-die nou urubia mutu parai moto iato geremari-rimo.

<sup>19</sup> Neio parai moto beda moro ato geremari-rimo, iedi goto kere ro aise gomidai. Sekemi abera Hamo nou edi dubu mere peteibi ro neibi aboudo gomidai nou ro, 100 siriba mani to.

<sup>20</sup> Taie iedi goto kere ro nato nou nadi iato gitomuti, nou ro masiro a-giduti, 'Ere, nou ata masiro Iawe mo ro edina urio na-nemowabutititi'.

## 34

### *Daina Sekemi ro gorobai*

<sup>1</sup> Iedi tau ro nato Ria ra Iakobo ra neitiro besere irimo ie Daina sabowa mamio aboto imese gou apira.

<sup>2</sup> Taie eputa dubu Hamo edi mere ro Sekemi, Hiwi gu dubu e, Daina sabowa ato nou ro nato gowea. Sekemi ro na-gowea Daina, nou ro aise gorobai imese gowodau iato tanaro aise gemesioidiro, Daina Sekemi ro siripo ta-gowai.

<sup>3</sup> Sekemi auna ubi ro gowamo Daina aboto, nirimagare owera to iato gageawado.

<sup>4</sup> Taie nou ro edi umoro owera ro aise gowarario nou simara abera aboto, nou ro ibo, 'Iedi besere ro na-wotoi-die mo oro ro gabo demoworohuti-ro, mo ubi ie nou kede a aboto.'

<sup>5</sup> Iakobo nou umoro ta-woi nou besere aboto Sekemi ro beda siripo tanaro gisioidiro, iedi tau ro nato nou dubu mere ta-garaseperai-rimo kiwoubua namabu imowotoi ri. Taie Iakobo nou ata owera ata utura pua iedi tanaro ro nou sapuwo to, womu tato nou dubu mere ti-gorowameai-rimo kiwoubua namabu kimowotoi moro rido.

<sup>6-7</sup> Iakobo dubu mere neio ro na-girowai-rimo otou tanaro gororosioidiro neio auna serawo ro giwati mabu Sekemi ro neio medera na-gowadau ubauba tanaro gosioidiro Isiraere urubia aboto. Neio serawo niro aise giahidimai-rimo, ina tau se gorowameai-diomo abera aboito.

Taie iato Sekemi abera Hamo nou ro gorowateai owera eremowauti ri Daina abera ina nou medamio mutu.

<sup>8</sup> Nou ro ibo, 'Mo mere ubi auna se owamo Daina aboto, nou auna ubi ie nou kede a aboto.

<sup>9</sup> Nimo upi busere modobo ie keremahudurio, nimo upi busere nio ro ba-diaremo-mo, nio upi busere nimo ro namadimi-iaremo-ri.



<sup>10</sup> Nimo duriomoro nio duriomoro ie, atu se anama-irowomidiro-titi-ri kamade mutu. Nio aise gidimo-oroho-ri, modobo ie nimo mutu nio namabu keremahudurio.'

<sup>11</sup> Sekemi ro ibose ti-garo Daina abera medamio neio aboto ibo, 'Nirimagare peteibi modobo buro ra Daina mo ro kede? Mo ower a nibi ro namabimo-omidai-ri ubi to, nibi etou nakomu apoi-diebirimo kotohiti sapuwo to nibi anama-imia-ibiri.

<sup>12</sup> Nibi ohu ia to namabimo-owioidiro-ri, ibose nibi ro amabimo-owea-ri iedi wisa ro. Kaupoti nibi medera aise daiwai-birimo mo ro anama-ede-ri.'

<sup>13</sup> Ina Daina medamio ro Sekemi abera mutu neitiro iato gimowapotai-marimo karasaubuti ower a mabu neio abato iedi niro temeteme ro ibose ti-giamo neio medera nou ro ubauba beda sosoro gowai.

<sup>14</sup> Taie, medamio ro ibo, 'Nimo medera oro ro ede-ri pua, kaupoti namabu towamo, dodio nou ro odiobidiro mabu oro dubu simara takamai owasiai pua ina uriai pua. Idaibo sosoro dubu ro kede ato nimo medera, nimo siripo aise namadimo-oi-ri.

<sup>15</sup> Nimo ro oro nato namadime-emapoi-ri oro dubu simara takamai nama-asiai-ri ina nama-uriai-ri nimo sosoro iedi kaupoti tanaro ro oro ro nama-isioidiro-ri io modobo ie.

<sup>16</sup> Idaro oro nimo ro a-nemowapotai-dumo beda mutu domere ro orowomidiro auna sabowa ato modobo ie neio dubu simara takamai kiasio kiouriouti ina iedi tau ro nato nimo busere nio ro amadimi-iaremo-ri, nio gabo amadi-orodobura-ri. Nimo domere ro nio upibusere modobo ato amadimi-iaremo-ri, nimo

kaupoti duriomoro ato anama-irowomidirotiti-ri kamade mutu, nimo kaupoti urubia, kaupoti ohona nato nama-orowomidiro-ri.

<sup>17</sup> Nio ubi tato namadimo-oi-ri dubu simara takamai kiasio kiouriouti aboto Daina nimo ro anamadimo-owagare-ri neido ata duriomoro to anamadimo-ou-ri.'

<sup>18</sup> Nedi owera ro neitiro na-girowai-rido medamio beda sosoro owera to garo-rimo, neitiro ro eso to gomidai-rido.

<sup>19</sup> Iato Sekemi imese girario nou simara urubia imowauti ri edi tanaro ro nou osioidiro ri, mabu nou auna ubi ie Iakobo besere kedea aboto.

Sekemi simara urubia auna ubi ie nou aboto nou ro beda owera karo ra neio ro aise kirowidiro ie.

<sup>20</sup> Taie Sekemi ra Hamo ra imese gou-rido auna sabowa to beda moro ato iradabutiti-dumo neitiro ro domere iato gimowauti-rido iedi owera ro.

<sup>21</sup> Neitiro ro ibo, 'Nodio urubia ro miro gowou-diomo, modobo ie nimo mea se korowomidiro neio mutu, neio nato ba-mirowomidiro nimo duriomoro auna ie, atu se anamadimo-orowarebai-ri, modobo ie nimo namabu keremahudurio. Idaro neio ro kiaremo modobo ie nimo upibusere, nimo ro kiaremo modobo ie neio upibusere.

<sup>22</sup> Kaupoti tanaro towamo nimo ro kisioidiro aboto, nimo domere sirio na-norowotoi nato nedi kaupoti tanaro ro nou mosioidiro-rimo, neio sosoro nimo modobo ie dubu simara takamai kiwasio kiwouriouti.

<sup>23</sup> Nedi tau ro nato neio ubi nato amadidimo-oi-ri neio atu se nato ama-irowomidiro-ri nimo mutu atu moro ato.

Taie nimo kaupoti urubia to nato  
namadima-ararapoi-ri. Nimo ro  
namadimo-osioihiro-ri idaibo tanaro, neio edio  
kiwoubua namabu sirio ro burumakau sipisipi  
nanigosi kemoro ibose neio moto ato edi  
namabu sirio na-iamo nimo ro  
anamadimi-irahidimai-ri, nimo ro modobo ie  
edio tanaro ro nou kosioihiro. Taie, neio aise  
ama-irowomidirotiti-ri nimo abato.'

<sup>24</sup> Imese beda mutu domere ro gemeiti ito neio  
ro na-girowai-rimo iedi oweru ro neio ro ubi to  
gomidai-rimo, Hamo ra Sekemi ra beda oweru to  
gimowauti-rido.

Taie iedi tau ro nato imese domere neio edi  
tanaro ro aise gosioihiro-rimo, dubu simara  
takamai na-giwasio-rimo taie iato  
giwouriouti-rimo.

<sup>25</sup> Netewa didi saiki peteibi ro  
goroporeai-rimo iedi domere ro na-giwasio-rimo  
dubu simara takamai na-giwouriouti-rimo, neio  
temeteme mutu girobu, Daina iedi medera teibo  
ro Simioni ra Riwai ra neitiro giri susura teibo  
na-gimidai-marido taie urubia umoro iwai pua  
neitiro edi sabowa gebari ro neito  
na-godoro-rido, taie imese dubu sirio neitiro ro  
pamo se giopiauti-rido.

<sup>26</sup> Taie neitiro neido na-gou-rido Hamo ra  
Sekemi ra iato giopia-marido, Daina Sekemi  
moto ato gomidiro neitiro ro aise  
gowosuruwo-rido imese gowameai-rido.

<sup>27</sup> Taie Iakobo arua dubu mere neio wapo rido  
gou-rimo neio ro pamo urubia aise

gimadau-rimo neio beda mutu nakomu ro  
giamo iedi sabowa gebari ro nato,

<sup>28</sup> goto ato edi na ro na-goroho-rimo kiwoubua  
namabu sirio, ibose pari ato edina na-gorowotoi  
neio ro imese aise giwagare-rimo.

<sup>29</sup> Neio ro Daina wisa gowameai-rimo, Sekemi  
iedi tanaro ro na-gosioihiro neio medera aboto  
nou wisa ie. Taie beda mutu namabu patu ra  
moto ato na-giamo imese aise gimade-rimo neio  
ro, arua awawo mani to na-gimade-rimo nedi  
namabu patu ro neio ro aise giwadaudio-rimo.

<sup>30</sup> Iakobo ro na-gowea iedi tanaro ro nou ro  
iato gutura Simioni ra Riwai ra aboto, 'Nitiro ro  
mo auna mibo ta-nomia-do. Keineni urubia  
Perese urubia nato na-orowomidiro nedi  
duriomoro ro nato, iedi urubia sirio ro neio  
namadima-aradabuti-ri atu se neio ro auna boso  
amadimo-osioihiro-ri neibi aboto, neibi  
anamadimi-iwota-ibiri, neibi dubu patu pua,  
neibi anamadimi-iporea-ibiri.'

<sup>31</sup> Taie, medamio ro ibo, 'Nimo medera era  
gabo orobo ra?'

## 35

### *Iakobo Betere to gorowameai*

<sup>1</sup> Godi ro iato gutura Iakobo aboto, 'Oro  
ba-dohau ito Betere to, iato ba-dimidiroiti, mo  
nadi iato ba-demotomuti-ro. Oro Iso aboudo  
beda duriomoro rudo godau-ro, mo keba se oro  
aboto iato ta-norowapotai.'

<sup>2</sup> Taie Iakobo ro na-girowai odio owera ro nou  
edi urubia mutu na-gou nou ro iato  
gimowapotai ibo, 'Nio gatere sua namabu

na-iwou-diomo neito ota titi nio ro  
ba-dimeserai-mo. Godi kemowabuti aboto nio  
mea se ba-deremododiai-mo keba se,  
mareamarea tato obotama nou ba-diroiti-mo.

<sup>3</sup> Iedi duriomoro ro nimo ro  
anamadime-emeserai-ri ito anamadimo-ohau-ri  
Betere to, mo ro nadi iato anama-emotomuti-ri.  
Mo Iawe ro ta-nowarebaititi mo mibo ato  
na-nimidirotiti, mo beda moro to kou ra nou  
ibose kou e mo mutu.'

<sup>4</sup> Taie Iakobo iedi urubia mutu na-gou neio edi  
gatere suana ota titi na-giwou-rimo iato  
giaiwo-rimo Iakobo aboto, ibose neio ro gare  
sowio na-giroidiro-rimo aise gipuruti-rimo iato  
giaiwo-rimo Iakobo aboto. Taie nou ro aise  
gimoba piro se iato auna ota edi moro ato  
na-itaititi Sekemi sabowa aupiaupi ato.

<sup>5</sup> Taie Iakobo iedi urubia mutu na-gou nou  
merebusere edi moro ro neio ro aise  
gemeserai-rimo. Neio ro na-gemeserai-rimo edi  
duriomoro ro taie Godi ro iedi duriomoro  
urubia ro auna tere aise gimia noudo ie Iakobo  
nou urubia mutu neio ro iaipirio tato.

<sup>6</sup> Neio Betere to gohau-rimo, keba se Rusi to  
ararasoro, Keineni duriomoro ato owamo.

<sup>7</sup> Iedi moro ro nato Iakobo ro nadi aise  
gitomuti, taie iedi moro nou ro masiro a-giduti  
'Iawe, nou ata masiro Ere, Betere ato  
na-gorowawea-ro', mabu Iakobo Iso tere ri  
na-gemeserai edi moro ro Godi hiwo to iato  
gorowawea nou aboto.

<sup>8</sup> Rebeka iedi sowake orobo ro na-iaurititi  
masiro Debora, nou iedi tau ro nato garaburai,  
Betere ato aise gemoba-rimo ota gebari gomo

ato. Taie neio ro iedi ota ro masiro a-giduti-rimo  
'Ota mabu idobi'.

<sup>9</sup> Iakobo iedi tau ato ta-gorowameai-ro oromo  
teibo turituri edi duriomoro rudo Keineni  
duriomoro to Godi iedi tau ro nato  
gorowapotai-ro nou aboto taie nou korosa iato  
gomia.

<sup>10</sup> Godi ro iato gutura nou aboto, 'Abora oro  
masiro Iakobo ie, ina oro urubia ro Iakobo to  
asoro-ri pua. Oro orio masiro a-niduti mo ro  
Isiraere, urubia ro neito amadima-asoro-ri  
Isiraere to.

<sup>11</sup> Mo nakara se nou e pupuwo ia Godi. Oro  
aramio merebusere sirio ba-moi-mo iedi aramio  
merebusere sirio ro neio aboudo  
amadimo-orobodorai-ri sipu. Urubia dubu patu  
sirio neio eputa urubia mutu oro aboudo  
amadi-ororuwo-ri.

<sup>12</sup> Iedi duriomoro ro Aberaham ra Aisaki ra  
ta-nimasouti-ma, oro abora edi duriomoro  
gebari ato na-wotoi nou anama-omia-ri mo ro,  
oro aramio merebusere mutu.'

<sup>13</sup> Taie iato nou Godi ro aise gemeserai.

<sup>14</sup> Iedi moro ato na-geremowauti-rido Iakobo  
ro nadi na-gomidai-ro tuputupu se iato  
gowotobowa. Nou ro waini obo komidai iato  
gemasia, ibose oribi iopu isi komidai ina nouto  
iato gemasia. Idaibo tanaro nou ro na-gosoidiro  
tarena gowai, iato Godi urubia ro kemowabuti  
sapuwo to.

<sup>15</sup> Taie Iakobo ro iedi moro ro Betere to giduti,  
ibo owamo Hiburu owera to 'Godi Moto ie'. Taie.

*Rasere a-garaihi*

<sup>16</sup> Iakobo Betere rudo na-gasiriai-ro nou urubia mutu ata moro masiro Eparati, nou gemidiai-rimo. Rasere mere niro mutu gou-ro ina ipi ato mere temeteme ro gemeriai-ro. Nou iato ipi ato auna ia se gorowaibia, nou modobo pua mere hio to koroto aboto.

<sup>17</sup> Rasere edi mere koroto kowarebai orobo ro nou ro na-gowea nou beda sosoro gorowaibia nou ro ibo, 'Oro tere na ie Rasere, oro dubu mere ta-worobu.'

<sup>18</sup> Iato tuturu to pua aupise Rasere karaihi, nou ro masiro a-giduti Benoni, ibo owamo Hiburu owera to 'Mo mere ro auna se nowaibia'. Taie nou iato a-garaihi.

Taie Iakobo ro nou ata masiro to iato giduti Beniamini, ibo owamo Hiburu owera to 'Mo tumodi mere'.

<sup>19</sup> Rasere nou gabo bara ato gemoba-rimo Eparati to edi gabo ro na-gou. Eparati ata masiro Beterehema.

<sup>20</sup> Taie Iakobo ro nadi kememidai iato gemowotobowa bobo ato, emaragoidiro na ie, abora iedi nadi ro towamo-die iato.

<sup>21</sup> Taie Isiraere imese gidiai-ro urubia mutu ipi ato na-gou-ro neio aise gorohodorai-rimo moro masiro tararasoro 'Ohu rudo kiauri moro ie imese kiwoubua namabu', taie neio aimara sabowa iato aise gosioidiro-rimo.

<sup>22</sup> Isiraere iedi duriomoro ato na-gomidiro, nou keba mere Rubeni Isiraere sowake orobo edina gedea Biriha nou mutu goroho-rido. Isiraere ro ta-girowai iedi owera ro.

*Iakobo 12 dubu mere*

<sup>23</sup> Nodio 12 dubu mere sirio ro Iakobo ro girasomo erere mamio ato. Ria ro girotuti 6 dubu mere. Iakobo keba mere Rubeni, iato Simioni, Riwai, Iuda, Isaka, Seburuni.

<sup>24</sup> Rasere ro giroto-ma netewa teibo dubu mere teibo, keba mere masiro Iosepa, ina saro mere Beniamini.

<sup>25</sup> Rasere edi sowake orobo ro Biriha nou ro giroto-ma netewa teibo dubu mere teibo, keba mere masiro Dani, saro mere Napatari.

<sup>26</sup> Ria edi sowake orobo ro Siripa nou ro giroto-ma netewa teibo dubu mere teibo, keba mere Gadi, saro mere Asere.

Imese sirio se Iakobo dubu mere Mesopotamia duriomoro ato neio mamio ro iato girotuti-rimo.

### *Aisaki pamo gowea*

<sup>27</sup> Taie Iakobo nou urubia mutu imese gaimai-rimo Mamere to, nou abera Aisaki iato gomidiro Heboroni sabowa aupi ato. Keba se Aberaham ra Aisaki ra beda ipi ato imidiro-do neio neito gou-rimo.

<sup>28</sup> Aisaki nou ta-imidiro titi tuturu tau to 180 kisimisi to.

<sup>29</sup> Nou komidiro ro ta-gamidimai, oromano ia ro ta-gorobai, iato nou aise garaburai. Taie nou mere teibo ro Iso ra Iakobo ra neitiro ro iato aise gibiria-rido bobo to.

## 36

### *Iso aramio merebusere*

<sup>1-2</sup> Iso, nou ata masiro Idomu, nou ro Keineni duriomoro urubia upibusere giaremo. Nou upi dubu mere mutu neio nou e. Hiti gu rudo Ada



Eroni nou gedea. Ata orobo Ohoribama nou gedea, Ana Sibioni nou abera nou Hiwi gu dubu e.

<sup>3</sup> Iso ro ina Basemati Isimere gedea, nou Nebaioti medera ie.

<sup>4</sup> Ada ro goroto Eripasi. Basemati ro goroto Reuere,

<sup>5</sup> ina Ohoribama ro giroto-ibi Ieusi Iarami Kora. Nou Iso dubu mere ie Keineni duriomoro ato gohaudio-rimo.

<sup>6</sup> Iso imese girobai nou upi merebusere, nou urubia etio ro wirowomidirotiti nou abato, nou burumakau sirio doniki sipisipi nanigosi kemoro nou arua namabu Keineni duriomoro ato na-giwi neio mutu imese gaimai ata muso duriomoro to, nou neama Iakobo nou gemeserai.

<sup>7</sup> Iso ra Iakobo ra neitiro namabu sirio ia se ta-goi-rimo, neitiro atu moro ato komidiro modobo pua, mabu neitiro edi kiwoubua namabu sirio ro sugamoso auna se ihotiti-mo, kaupoti sugamoso modobo pua iedi duriomoro ro nato.

<sup>8</sup> Iso neama aise gemeserai, nou imese gidiai Idomu podo duriomoro to, iato imese imidirotiti. Iso ata masiro Idomu.

<sup>9</sup> Iso nou Idomu urubia neio orora ie neio Idomu podo ato wirowomidirotiti.

<sup>10</sup> Iso dubu mere aramio mutu neio masiro nou e, Eripasi nou mamu Ada, Reuere nou mamu Basemati.

<sup>11</sup> Eripasi 5 dubu mere girasomai. Neibi masiro Temani, Omara, Sepo, Gatamu, Kenasi mutu.

<sup>12</sup> Eripasi ibose ta-gedea sarupo kaubai besere masiro Timina. Timina ro goroto Amereke. Nou Iso ra Ada ra neitiro dubu aramio ie.

<sup>13</sup> Reuere 4 dubu mere girasomai-ibi, Nahata, Sera, Sama, Misa. Neibi Iso ra Basemati ra neitiro dubu aramio ie.

<sup>14</sup> Iso ata orobo Ohoribama, Ana Sibioni ro garasomai. Iso ra Ohoribama ra neitiro ro dubu mere giwia-ibirido Ieusi, Iarami, Kora.

<sup>15</sup> Nou keba eputa urubia ie Iso ro edina girasomai. Iso keba mere Eripasi. Nou aboudo eputa urubia to neio ro gorowotoi Temani, Omara, Sepo, Kenasi,

<sup>16</sup> Kora, Gatamu, Amereke. Nodi urubia ro eputa rubi to gorowotoi Eripasi ro girasomai Idomu duriomoro ato. Neio Ada aramio ie.

<sup>17</sup> Iso ata mere Reuere nou dubu mere girasomai, ina eputa rubi to neio ro gorowotoi, neio masiro nou e, Nahata, Sera, Sama, Misa. Nodi eputa urubia ro neio ro gorowotoi Reuere ro girasomai Idomu duriomoro ato. Iso ra Basemati ra neitiro dubu aramio ie.

<sup>18</sup> Iso iedi orobo ro Ohoribama Ana nou ro girotuti ina eputa rubi to neio ro gorowotoi Ieusi, Iarami, Kora.

<sup>19</sup> Nou Iso dubu mere sirio nou e, ina neio Idomu duriomoro ato eputa rubi to neio ro gorowotoi. Iso ata masiro Idomu.

### *Sia aramio merebusere*

<sup>20</sup> Hori urubia iato gorowomidiro Idomu duriomoro ato. Sia nou Hori gu dubu e, nou dubu mere ta-girasomai neio ie Rotani, Sobari, Sibioni, Ana,

<sup>21</sup> Disoni, Ese, Disani. Neio ro gorowomidiro Idomu duriomoro ato. Neio eputa rubi to gorowotoi Hori gu urubia sapuwo to.

<sup>22</sup> Rotani dubu mere teibo girasomai-ma Hori ra Homama ra. Timina Rotani medera ie.

<sup>23</sup> Sobari dubu mere girasomai neio ie Arawana, Manahata, Ebara, Sepoho, Onama.

<sup>24</sup> Sibioni dubu mere teibo girasomai-ma Aia ra Ana ra. Ana abera doniki sirio na-gimowotoi ota tato moro ie nou ro korosa obo boido wororuworo nato garitiai.

<sup>25</sup> Ana ro mere ra besere ra girasomai-ma Disoni ra Ohoribama ra.

<sup>26</sup> Disoni dubu mere peteibi girasomai-ibi Hemadana, Esebana, Itirani, Kerana.

<sup>27</sup> Ese dubu mere peteibi girasomai-ibi, Birihana, Sawana, Akana.

<sup>28</sup> Disani dubu mere teibo girasomai-ma Usu ra Arana ra.

<sup>29</sup> Nou neio masiro ie Hori urubia sapuwo to etio ro gorowotoi eputa rubi to, Rotani, Sobari, Sibioni, Ana,

<sup>30</sup> Disoni, Ese, Disani. Nodi urubia ro neio ro gorowotoi eputa urubia to Hori urubia sapuwo to Idomu duriomoro ato. Nedi duriomoro ro masiro teibo netewa teibo ie, Idomu ra Sia ra.

*Idomu duriomoro eputa urubia ie*

<sup>31</sup> Isiraere urubia neio na-girosuwotiti Idomi duriomoro ato, eputa urubia sirio ro Idomu duriomoro ato gorowomidiro. Neio masiro neio ie.

<sup>32</sup> Bera Beo nou ro wimidiro eputa dubu to Idomu duriomoro nou ro wiauri, nou Dinihaba auna sabowa dubu e.

<sup>33</sup> Bera na-garaburai iato Iobabi Sera ro gotobowa eputa dubu to, Bosara sabowa dubu e.

<sup>34</sup> Iobabi na-garaburai iato Husama ro gorobai nou bobo, ina eputa dubu to nou ro gotobowa, nou Temani gu abato gomidiro.

<sup>35</sup> Ina Husama na-garaburai, Hadadi Bedada gotobowa eputa dubu to. Nou ro giwota Midiani urubia Moabi duriomoro ato. Nou Awiti auna sabowa dubu e.

<sup>36</sup> Hadadi na-garaburai iato Samara ro gotobowa eputa dubu to, Masareka auna sabowa dubu e.

<sup>37</sup> Samara na-garaburai iato Sauro ro gotobowa eputa dubu to, Rehoboto sabowa dubu e Iupereitisi oromo ato owamo.

<sup>38</sup> Sauro na-garaburai Barahanane Akobo ro iato gotobowa eputa dubu to.

<sup>39</sup> Ina Barahanane Akobo na-garaburai, iato Hadada nou ro gotobowa eputa dubu to, Pau auna sabowa dubu e. Nou orobo masiro Mehetabere, ina Mehetabere mamu masiro Materedi Mesahaba.

<sup>40</sup> Ina nou e eputa urubia ie neio gu gabogabo iamo duriomoro kere gabogabo iamo imese Iso aboudo gororuwo-ro. Neio masiro neio ie Timina, Arawa, Ietete,

<sup>41</sup> Ohoribama, Eraha, Pinono,

<sup>42</sup> Kenasi, Temani, Mibisa,

<sup>43</sup> Magadiere, Irama. Nodi urubia ro neio ro worowotoi Idomu eputa urubia to. Iedi erere ipi ato na-irowomidiroiti neio simara erere gu masiro to giasoro-rimo.

## 37

### *Iosepa totomu*

<sup>1-2</sup> Iakobo Keineni duriomoro ato wimidirotiti ina nou abera ibose iato ta-gomidiro. Iakobo dubu mere sirio mutu ibo imidirotiti. Iosepa kanikani na-goroho 17 kisimisi ro na-gorobai naramio mutu sipisipi nanigosi nou imowotoititi-mo. Iakobo ro ta-giedea-ma sowake besere teibo, Biriha Siripa mutu, neitiro ato nou ro na-girasomai-ibi dubu mere peteibi neibi Iosepa mutu sipisipi nanigosi atu se wimowotoi-bimo.

Iosepa na-irowametiti-ro moto to naramio nou ro nato wiwautiti abera aboto neio ro beda ubauba tanaro wisoidiroititi-mo.

<sup>3</sup> Iakobo ata masiro Isiraere, nou ubi mere ie Iosepa mabu Iosepa nou ro oromano ato garasomai. Taie nou ro Iosepa nato gemowaruwoidiro tu tuturu sodo tititi se.

<sup>4</sup> Nou naramio umoro na-goi-rimo ibo Iosepa Iakobo ubi mere ie, neio aboto auna ubi iamotiti pua noudo ie Iosepa naramio ro neido wohoiotiti-mo. Neio owera Iosepa aboto mea mino to iarotiti pua, masawemasawe to wiaro-mo.

<sup>5-8</sup> Taie ata tau Iosepa hiwo nato gorobu, ina nou edi hiwo owera ro nato gorowauti naramio aboto ibo, 'Mo hiwo owera aboto gare neito ma-diedea-rimo. Mo ro nedi duwo ro nato na-norobu nimo woiti ohona patu nitohiti-dumo pari ato. Mo edi patu ro tuputupu se otoi turi ato, nio edi woiti patu ro neio ro

garadabuai-rimo sapuwosapuwo  
gotoburio-rimo iato giroboreauti-rimo.'

Nou naramio ro edi hiwo owera  
na-girowai-rimo neio ro ibo, 'Oro ibo  
a-imaragoidiro ra oro gabamani to  
ama-omidiro-ri? Oro ubi ra nimo oro ro iauri ri?'

Nou naramio ro auna ia se wohoiotiti-mo  
mabu nou edi hiwo owera ro na-irowautititi nou  
sapuwo to wohoiotiti-mo.

<sup>9</sup> Taie ata tau ato nou ata hiwo iato gorobu.  
Iosepa ro ina nou naramio iato gimowauti, 'Mo  
ro ata hiwo ta-norobu ina, mo ro ta-niauri saiki  
sagana 11 kiboni mutu neio ro orowotoi-die  
toboro ohu ato. Mo aboto neio ro  
iroboreauti-diomo.'

<sup>10</sup> Iosepa nou edi hiwo owera ro nou  
gorowauti nou abera aboto ina Iakobo ro edi  
hiwo owera ro na-girowai, nou ro Iosepa iato  
gemaiauti. Iakobo ro ibo, 'Io beda hiwo owera ra  
io? Oro ibo a-imaragoidiro ra oro mamu mo ia  
nimo atu se oro aboto iroboreauti-ri?'

<sup>11</sup> Iosepa ro naramio masawe ia gimowai,  
kaupoti Iakobo ro nou hiwo owera beda sosoro  
to girowidiro nou ro na-gimaragoidiro ina  
maumo kimaragoidiro beda sosoro ra, nou ro  
nou gosora.

### *Iosepa mani to gahodorai-rimo*

<sup>12</sup> Iosepa naramio ta-gou-rimo Sekemi sabowa  
gomo to abera edi sipisipi ro neio imowotoi rie.

<sup>13</sup> Taie neibi abera Iakobo iato gutura Iosepa  
aboto, 'Oro ba-dou Sekemi to, oro naramio  
toroho-dumo sipisipi timowotoi-dumo iedi  
sabowa gomo nato.'

Iosepa ro iato gutura, 'Io idau mo anama-imai-ri.'

<sup>14</sup> Taie nou abera ro iato gutura nou ato, 'Ba-dou oro naramio ba-diraturioma neio modobo ato hato oroho-dumo ibose sipisipi modobo ato hato oroho-dumo? Ina ba-dorowameai-ro neito mo emowapotai ri neio beda sosoro oroho-dumo.'

Taie Iosepa nou ro ioudo gotiodorai-ro Heboroni gawagogo rido Sekemi sabowa to,

<sup>15</sup> nou na-gorowateai ata dubu ro iato gowea. Iosepa koroho kawa goroho.

Taie iedi dubu ro nou ro iato gemodowa nou, 'Oro etou osora?'

<sup>16</sup> Ina Iosepa ro ibo, 'Mo naramio niosora sipisipi na-imowotoi-dumo. Sipisipi beda ipi ato imowotoi-dumo mo ma-demowapotai-ro neio bato oroho-dumo?'

<sup>17</sup> Ina nou ro ibo, 'Neio ro ta-wemeserai-mo nedi moro ro, ta-wou-mo. Mo ro ta-nimororowai neio na-warow-dumo Dotani sabowa to ou ri.'

Taie Iosepa ro na-girowai nedi owera ro nou imese gaimai naramio iosora ri Dotani sabowa to. Taie nou ro iato aise giwia Dotani sabowa gomo ato.

<sup>18</sup> Neio ro muso rido gowea-rimo nou, ito ido ama-orowateai-ri nou naramio nato geremowauti-rimo nou kesuai sapuwo to.

<sup>19</sup> Neio ro ibo, 'Hiwo dubu tou-die.'

<sup>20</sup> Dou-rimo esuai rie, nou pamo durupi anamadime-eherai-ri goto bobo to. Taie Idau nimo ro nato anamadime-emowapotai-ri ibo, "Ata tumu na ro ouho nou." Nou hiwo owera morobise to amadimo-ororosioi-di-ro ra?'

<sup>21</sup> Rubeni ro ta-gimewidiro nou niramio beda sosoro geremowauti-rimo nou ubi tato ie Iosepa neio ro kesuai aboto ina nou ro nou ri gidiobo.

Nou ro ibo, 'Nimo ro esuai-ri pua nou.

<sup>22</sup> Nedi goto bobo ro nakara moro ato na-owamo neito se meherai-rimo temeteme omia ate!'

Taie nou ro niramio nou ri gimowapotai mabu nou kimaragoidiro to ta-giwiua neio ro kopia rie ina nou ri gidiobo. Ina nou ubi a-gowamo ibo Iosepa nou ro piro se eihai ri goto bobo rudo ina emeiriai ri abera aboto.

<sup>23</sup> Iosepa na-gorowateai-ro nou naramio aboto neio ro nou iato aise gohiai-rimo tu tututu sodo tititi se edina goroidiro neio ro aise gowopirutai-rimo,

<sup>24</sup> imese gomudo-rimo goto bobo to nato geherai-rimo. Iedi goto bobo ro obo iato omidiro pua, nou bobo ato imese gotoi.

<sup>25</sup> Iosepa naramio na-gorowameai-rimo komititi taie neio dokou imese giho-rimo. Neio dokou giho-rimo edi tau ro nato neio na-girarowea-rimo Isimere gu urubia ro gou-rimo muso ato. Neio ioudo gou-rimo Giriadi duriomoro rudo meamea nibo meresini nou giwou-rimo Isipi duriomoro to imade ri, kemoro ohu ato giamo neio ro gitomaidiro-ro.

<sup>26</sup> Taie Iuda ro ibo, 'Nimo ro karima boina na beda namadimo-opia-ri piro se, etou mabu ato ra?

<sup>27</sup> Nimo ro modobo ie kaiwai iedi Isimere gu urubia ro neio aboto, mani to neio ro amadimo-omidai-ri. Nimo ro nou temeteme



komia modobo pua mabu nou nimo ia karima boina na ie.'

Iuda beda owera garo naramio ubi aise goi-rimo.

<sup>28</sup> Iato Isimere urubia na-gou-rimo, nou naramio ro goto bobo rudo na-geihai-rumo, iato gahodorai-rimo auna mani to Isimere urubia aboto, Iosepa neio ro imese gowou-rimo Isipi to.

<sup>29</sup> Rubeni na-gorowameai-ro nou ro Iosepa potoro se gowea goto bobo ato. Taie nou auna mibo ro gorobai neama sapuwo to, nou obotama nou ri gerewekekeouti.

<sup>30</sup> Nou imese gorowameai niramio aboto iato gimowapotai-ibi ibo, 'Iodio mere ro boira? Potoro ie bobo ato! Mo nou abera aboto beda sosoro nama-orowameai-ri nou tato?'

<sup>31</sup> Iato niramio ro nanigosi na-gopia-rimo nou edi sodo ro tu tuturu tititi se neio ro na-godobia-rimo iato gowoiti-rimo karima to

<sup>32</sup> imese gowou-rimo Iakobo aboto.

Neio ro iato gutura-rimo nou aboto, 'Nodi sodo ro tu tuturu tititi se oro mere do hata ie? O nou do pua ra?'

<sup>33</sup> Iato Iakobo ro na-geibimai nou ro ibo, 'Io nou do se ie, mo mere do ie. Nou ata tumu na ro ta-wouho. Nou durupi imese wasinawasina ta-emowai.'

<sup>34</sup> Nou auna natonato ie mere aboto iato Iakobo edi obotama na-giroidiro aise gerewekekeouti iato garegare obotama imese giroiti. Nou pape imese gomidiro, Iosepa nou ro auna idobi aise gemeretetiti tuturu tau to.

<sup>35</sup> Nou merebusere ta-wiroho-mo nou aboto nou a-geawadori kaupoti nou ubi tato ie nou kageawado.

Nou ro iato gutura ibo, 'Nou pape anama-imidirotiti-ri womu tato mo pamo kowea.' Iosepa nou ro sirio saiki to emeretetiti idobi.

<sup>36</sup> Wisa na Iosepa Potipa ro mani to gahodorai Isimere urubia aboudo. Potipa Isipi duriomoro ato auna gabamani dubu e. Isipi eputa dubu moto na-emotoititi-mo urubia imese Potipa ro iaurititi. Taie.

## 38

### *Iuda ra Tama ra*

<sup>1</sup> Iuda ata tau ato nou naramio niramio aise gimeserai taie nou imese gou-ro ata sabowa masiro ie Adurami, taie nou iato imidirotiti ata dubu abato masiro Haira.

<sup>2</sup> Iato na-imidirotiti nou ro ata besere nato gowea Keineni duriomoro ato nou ro nou gedea, nou abera masiro Sua. Iuda nou mutu na-imidiro-do

<sup>3</sup> iato nou niro ie, nou ro Iuda mere gemowohau, nou ro masiro Eri to giduti.

<sup>4</sup> Iato ina ibo wimidiro-do Iuda orobo ina niro iato gowea, iato ata mere se gemowohau, nou ro masiro Onana to giduti.

<sup>5</sup> Iato ina ibo wimidiro-do Iuda orobo ina niro iato gowea, Kesibi ato na-gomidiro ata mere nou ro iato goroto, nou ro masiro Sira to giduti.

<sup>6</sup> Iedi mere teibo ro Eri ra Onana ra auna na-go-ri-do, Iuda ro keba mere orobo iato gemerebai-ro masiro Tama, nou ro nou gedea.

<sup>7</sup> Iuda edi keba mere ro Eri na-wimidirotiti nou kerewaikerewai se iraridirotiti Iawe sosoro gabo ato. Taie nou Iawe ro keremiro aise gemasiai.

<sup>8</sup> Taie Iuda ro iato gutura Onana aboto nou turi mere, 'Oro naramu ta-garaburai nou edi orobo garamu ro oro nou mutu ba-dirobuti-ma. Nou abato ba-dirasomai merebusere, naramu merebusere to ararasoro na. Nou nimo tanaro ie.'

<sup>9</sup> Onana umoro ta-goi ibo nou ro edi merebusere ro nama-irasomai-ri naramu orobo garamu ato nou merebusere to ararasoro-ri pua.

Taie nou ibo orowatititi naramu orobo mutu kirobuti-ma ato nou dubu simara na goto to kiawira ie mabu nou ubi tato ie merebusere kirasomai naramu orobo garamu abato. Mabu edi merebusere ro nou merebusere to ararasoro-ri pua, naramu merebusere to kararasoro ie.

<sup>10</sup> Iawe ro ta-iaurititi-ro nou edi tanaro na-isioidirotiti. Onana ro beda tanaro isioidirotiti Iawe kamade tato owaitititi ina noudo ie Iawe ro nou keremiro nato gemasiai.

<sup>11</sup> Iuda ro ibo etera garamu ato, 'Oro ba-dorowameai simara sabowa to, oro garamu iato ba-dimidiro womu tato mo saro mere nama-ororomai-ri oro nou ro nato ama-edea-ri.' Iato Tama abera aboto imese gorowameai. Ina Iuda nou ubi tato ie nou saro mere naramu teibo sosoro karaburai.

<sup>12</sup> Iuda tuturu tau to ta-imidirotiti, nou orobo, Sua edi besere ro nato garaburai. Taie nou pape ibo imidirotiti womu tato pape ti-goroporeai, ina ioudo Timina sabowa to nato gou, urubia iwia ri

nou sipisipi sobo na-giwasio-rimo neio giwia  
nou simara namutuna Adurami dubu e Haira,  
nou mutu gou-rido.

<sup>13</sup> Tama ta-gemowapotai-rimo ibo, 'Oro  
daramunegere tou-die Timina sabowa to, nou  
sipisipi sobo iwasio rie.'

<sup>14</sup> Taie nou garamio edi garegare suana ro aise  
gipuriti, orio obotama iato giroiti ina obotama  
kere to nou sosoro woidomari iato  
gorowasiai-ro. Timina gabo sapuwo ato  
na-owamo nou iato aise gomi Enaimu sabowa  
ato magere damo kodouti moro ato. Nou ro edi  
tanaro ro nou ri gosioidiro mabu nou umoro  
ta-go'i ibo Iuda saro mere Sira auna ta-go'i  
kaupoti Iuda ro gabo mena se emoworohuti pua  
nou ro kedea aboto.

<sup>15-16</sup> Taie Iuda ro na-gowea edi orobo ro  
na-gomidiro nou ro eibimai pua, nou  
a-gimaragoidiro ibo nou ata era gabo orobo ie  
mabu nou sosoro woidomari ta-giwasiai  
obotama kere to. Iato Iuda nou aboto aupise  
na-gou nou ro iato gutura ibo, 'Mo ubi ie oro  
mutu koroho.'

Tama ro ibo, 'Mo oro mutu namado-oroho-ri  
mo etou nakomu namadi-omia-ri oro ro?'

<sup>17</sup> Ina Iuda ro ibo, 'Oro nanigosi dawade  
anamadi-ememeiriai-ri.'

Tama ro iato gutura ibo, 'Io modobo ie tauo  
mo ata namabu ata domia-ro mo umoro koi  
sapuwo to ibo morobise to ido nanigosi dawade  
oro ro amadi-ememeiriai-ri. Oro edi namabu ro  
nato anama-emowameai-ri.'

<sup>18</sup> Iuda ro ibo, 'Ina mo ro oro etou namabu  
nama-omia-ri oro umoro kiamo sapuwo to?'

Tama ro ibo, 'Abora oro ro diaiwai-maro isitoro wagoha ato na-woroidiro oro simara masiro mutu, ibose oro kiradiouti gonopu.'

Iato Iuda ro aise giaiwai-ma edi namabu teibo ro taie nou ro iato goworohuti era gabo to. Iedi tau ato na-goroho-rido iedi atu saiki ro nato Tama niro aise gowea.

<sup>19</sup> Tama imese gorowameai nou ro edi obotama na-iroidiro nou ro kipurutai taie garamio obotama iato giroiti.

<sup>20</sup> Iuda namutuna Haira iato gemeiriai nanigosi dawade mutu edi orobo nou aboto ina Iuda edi namabu teibo ro na-gaiwai-ma nou emowameai-ma rie. Ina iedi orobo ro egea se gosora, nou ro owea pua.

<sup>21</sup> Taie Haira ro iato gimodoruti duriomoro urubia ibo, 'Iedi era gabo orobo ro na-imidiroititi Enaimu to kodouti gabo bara ato nou bato omidiro?'

Neio ro ibo Haira ato, 'Ata era gabo orobo ata nato omidiro pua.'

<sup>22</sup> Iato Haira imese gorowameai nou ro ibo Iuda ato, 'Mo ro egea se nosora. Ata era gabo orobo ata omidiro pua sabowa rubi ibo utura-diemo.'

<sup>23</sup> Taie Iuda ro ibo, 'Marasio iodio namabu teibo ro ba-miworohuti-ma. Modobo pua neitiro gaga kimororouti-ma. Mo ro ta-nemeiriai nanigosi dawade ina iato oro ro ata kowea tato ie.'

<sup>24</sup> Sagana peteibi ta-goroporeai-birimo, Iuda ata dubu ro nato gemowapotai ibo, 'Oro edi etera garamu ro niro ie, era gabo to irohotiti.'

Iuda ro urubia iato gitiodorai, nou ro ibo, 'Iedi garamu ro neito dorobai-rimo ba-datahiti-mo era to ba-deherai-mo mabu nou ro nimo sabi gesebea.'

<sup>25</sup> Tama ido amadimo-owosuruwo-ri nou ro keba se owera se gemeiriai-ro daramunegere aboto, nou ro ibo, 'Nodi namabu teibo ro na-nirobidiro-mamo niro nou ro nemowea. Isitoro na-woroidiro wagoha ato masiro mutu ibose kiradiouti gonopu ma-diwia-ma, etu do ra?'

<sup>26</sup> Iuda aupise na-gou nou ro nato gieibimai-ma. Nou ro ibo, 'Iedi orobo ro morobise ie, mo ro narasaubuti. Mo ro keba se emeiriai pua Sira nou ro edea ri, ina Tama ro nou ri gosioidiro edi tanaro ro.'

Iuda ro ido Tama aboto ina osioidiro-ri pua idaibo tanaro.

<sup>27</sup> Tama mere koroto tau ro na-gorobai nou ro edemuai teibo giroto-ma.

<sup>28</sup> Nou odio korowaibia ro na-gorowaibia ata mere tu se gowosuwoidiro-ro kiauri orobo ro tu mau ato karima obotama kere to se gemasaubiai isabuna.

Iato kiauri orobo ro ibo, 'Keba se nou ro ai-die.'

<sup>29</sup> Kaupoti nou tu aise owiodidiro-ro. Nou tu edi kowiodidiro na-gowiodidiro iato neama ro geresia-ro nou goroto keba se. Kiauri orobo ro ibo, 'Oro gabo keba se ibo a-wopito-die?'

Keba se edi mere goroto nou ro masiro Peresi to giduti, ibo owamo Hiburu owera to 'Gabo opito-die'.

<sup>30</sup> Iato tu mau ato edi mere ro na-gematahirai karima obotama kere to iato nou gowahau nou

ro masiro Seraha to giduti, ibo owamo Hiburu  
owera to 'Karima ia ie'. Taie.

## 39

### *Iosepa Potipa orobo ro gemediawado*

<sup>1</sup> Iosepa Isipi duriomoro to Isimere urubia ro ta-gowou-rimo ina iato neio ro ta-gaiwai-rimo Potipa aboto nou ro mani to ta-gahodorai. Pero Isipi duriomoro eputa dubu e, nou saro gabo Potipa ro emeaurititi. Pero moto iedi urubia ro na-emotoititi-mo neio imese Potipa ro iaurititi.

<sup>2</sup> Iawe ro Iosepa woki emati pua, nou mutu imidirotiti, ina nou rie nou beda tanaro ra na-isioidirotiti saro rido nou ro mea wisa aise koweia ie.

<sup>3</sup> Iosepa Potipa moto ato na-imidirotiti nou umoro ta-goi Iawe Iosepa mutu e ina noudo ie Iosepa aboto nou auna kamade ro owatititi.

<sup>4</sup> Taie Potipa ro gabo nato gapoi Iosepa aboto nou ro otoi ri Potipa saro gabo ato nou sowake oroho na ie. Potipa ro auna woko gomia nou moto kemeauri sapuwo to, idaibo, iedi moto ro nato woko urubia na-irohotiti-mo imese Iosepa ro iaurititi. Ina ibose Potipa imese namabu patu Iosepa ro emeaurititi.

<sup>5</sup> Ina Iawe ro Potipa korosa ta-gomia ibose iedi urubia ro woko na-isioidirotiti-mo nou moto ato Iawe ro neio mutu atu se korosa ta-gimia. Beda mutu namabu patu ro giamo Potipa edi moto goro nato, moto pari ato edi namabu ro na-gorowotoi Iawe ro imese korosa aise gimio, mabu Iawe ro Iosepa ta-emaragoidirotiti-ro.

6-7 Potipa ro beda namabu sirio iworohutiti nou ro Iosepa tu to aise gimeseruti. Iosepa ro emeaurititi imese sirio namabu, Potipa ro ata woko ata emaragoidirotiti pua, nou simara durupi eremododiaititi.

Ata tau ato Potipa edi orobo ro ubi nato goi Iosepa aboto. Nou auna ubi ro owamotiti Iosepa mutu kirobu-ma. Iosepa nou mea domere ie, amura ia ie. Taie ata tau ato nou ro iato gutura Iosepa aboto, 'Oro dou-ro neitiro nato irobu-mari!'

8 Ina Iosepa a-gorowairiai. Nou ro ibo, 'Oro uramu ro sirio namabu mo tu to ta-gimeseruti-ro. Nou umoro towamo-die namabu patu nato mo ro mea se nemeauri.

9 Ata omidiro pua mo sosoro nedi moto ro nato. Nou ro sirio namabu patu mo tu to ta-gimeseruti-ro, nou ro ata nakomu ata orobai pua mo aboudo, kaupoti oro, mabu oro nou orobo ie. Mo ro ubauba beda sosoro nama-osioidiro-ri Godi aboto?'

10 Iedi orobo ro sirio saiki patu Iosepa nou ro aise wesebotiti nou mutu irobuti-mari kaupoti Iosepa ia aise wirowairititi iedi tanaro nou kisioidiro aboto. Nou aboto aupise ateawadotiti pua.

11 Iosepa ata tau ato nakara se gosioidiro woko moto goro ato ata dubu ata omidiro pua.

12 Potipa orobo ro nou sodo rido gomudurai-ro. Nou ro ibo, 'Dou-ro oro, nedi tanaro ro nou namado-osioidiro-ri.'

Iosepa sodo nou ro iato gowopurutai-ro nou tu ato aise gomowamo iato nou tere ri imese gosuwoidiro-ro moto goro rido.



<sup>13</sup> Potipa orobo umoro na-goi ibo Iosepa sodo ta-wemeserai-ro nou ro iato na-gosuwoïdiro-ro moto goro rido,

<sup>14</sup> taie nou sowake urubia aboto iato giaia ibo, 'Neito dirowidiro-rimo! Nedi Hiburu sowake dubu ro neito na-gou-ro nimo isaubuti-ri gowou-ro Potipa ro. Nou ro odoro-die mo aboto mo mutu irobu-marie,

<sup>15</sup> kaupoti mo iamo nutura ina nou sodo nou rie emeserai-die mo abato, nou e nou sodo.'

<sup>16</sup> Taie nou ro aise gorobidiro iedi sodo ro urubia ro iauri ri womu tato nou uramu ti-gorowameai-ro.

<sup>17</sup> Taie nou ro iato gorowauti uramu aboto beda sosoro tanaro gororosioidiro. Nou ro ibo, 'Oro edi Hiburu sowake dubu ro na-gowodoro-ro neito, nou ubi ie mo asaubuti ri nou aupise na-wou-die

<sup>18</sup> mo ro auna iamo nato niaia urubia ro irorowai ri, nou na-wosuwoïdiro-die nou sodo nato nani kemeserai ie mo abato.'

<sup>19</sup> Iosepa eputa dubu ro na-girorowai nou orobo ro beda owera gorowauti nou sapuwu to iato nou niro korosa nou ro aise gemowai.

<sup>20</sup> Taie Iosepa Potipa ro iato gohiai dibura to aise gede. Isipi duriomoro eputa dubu ro urubia edi dibura moto neito na-iaremotiti, Iosepa edi atu dibura moto ro neito gibiria-rimo. Nou iato imese imidirotiti dibura goro ato.

*Iosepa ro dibura dubu teibo hiwo owera maumo gimamabuti-ma*

<sup>21</sup> Iosepa na-imidirotiti dibura ato Iawe nou mutu imidirotiti ina Iawe nirimagare ie nou

aboto. Ina noudo ie dibura moto kiauri dubu auna ia kamade ro gowatititi Iosepa aboto,

<sup>22</sup> nou ro ibose Iosepa gaubai imese sirio dibura urubia nou ro wiaurititi. Dibura moto kiauri dubu ro imese woko patu Iosepa tu to gimeseruti iedi dibura moto ro nato.

<sup>23</sup> Nou ata ata kimaragoidiro tato imidirotiti mabu nou ro imese woko sirio Iosepa tu ato giedea mabu Iosepa lawe ro iaurititi nou do ie nou ro beda tanaro na-isioidirotititi saro rido nou ro mea wisa aise kowea ie.

## 40

<sup>1-2</sup> Ata tau ato Isipi duriomoro eputa dubu nou masiro Pero auna serawo ro gorobai netewa teibo woko dubu teibo aboto, nou neito gemohuta-rido, mabu neitiro ubauba tanaro gisioidiro-rido nou aboto. Ata Pero tuba sosoro obo kemeauri dubu e, ata Pero parawa kemito dubu e.

<sup>3</sup> Taie iedi dubu teibo ro nou ro dibura moto goro to aise giedea-ma, Iosepa bida dibura moto ato gomidiro neitiro neito gibiria-marimo.

<sup>4</sup> Taie Pero edi moto kemeauri urubia ro neio eputa dubu ro neitiro Iosepa tu to giedea-ma iato imese imidirotiti-do tuturu tau to dibura moto goro ato.

<sup>5</sup> Ata duwo iedi dubu teibo ro erere hiwo teibo girobu-mado. Neitiro dibura moto ato hiwo na-girobu-mado, Pero tuba sosoro obo kemeauri dubu ata hiwo gorobu, Pero parawa kemito dubu ata hiwo gorobu, neitiro hiwo teibo maumo erere ie.

<sup>6</sup> Taie iedi kowaroho ro nato neitiro na-gireribua-rido Iosepa ro gou-ro iedi dubu

teibo ro neitiro aboto, nou ro na-giwia-ma  
neitiro nitonito se gomidiro-rido  
kamadekamade tato giwaroho-ma.

<sup>7</sup> Taie Iosepa ro iato gimodowa-ma, 'Nitiro  
etou mabu ato irarowo-do kamadekamade tato  
etona ro iari-ma?'

<sup>8</sup> Taie neitiro ro ibo, 'Neitiro hiwo teibo  
ta-nirobu-mado nedi duwo ro nato, ina ata dubu  
ata ro modobo pua neitiro hiwo ower a teibo  
maumo kimowamea-ma aboto.'

Ina Iosepa ro ibo, 'Godi kaupoti nou se ie hiwo  
ower a maumo nou ro kiwawuti ie. Nitiro hiwo  
ower a ma-dorowauti-rido mo aboto.'

<sup>9</sup> Taie Pero tuba sosoro obo kemeauri dubu ro  
Iosepa aboto iato gorowauti nou simara hiwo  
ower a, nou ro ibo, 'Mo ro hiwo to ta-niauri ata  
ota sere,

<sup>10</sup> ina iedi ota sere ro ioudo netewa didi agagi  
peteibi neibi ro osuruwo-diebirimo. Mo ro ibose  
ta-niwia kakamu upa na-wosuwoduti-dumo hio  
to, iato iedi upa ro noudo mo ro ta-niwia  
kakamu na-wosuwoduti-dioumo hio to, ibose  
iedi kakamu ro ioudo mo ro ta-niwia iopu hio to  
na-wosuwoduti-dumo, iedi iopu ro imese  
gumuni samo to oi-dumo.

<sup>11</sup> Ina mo ro norobidiro eputa dubu edi  
panikere ro, mo ro iopu isi nato nimapipiti  
panikere to, iato naiwai eputa dubu aboto.'

<sup>12</sup> Iosepa ro iato gemowameai ibo, 'Oro edi  
hiwo ower a ro maumo mo ro  
anama-emowawea-ri. Netewa didi ota sere agagi  
peteibi ibo nowawea netewa didi saiki peteibi ie.

<sup>13</sup> Netewa didi saiki peteibi iporeai-ibiri pua,  
oro eputa dubu ro ama-otiodorai-ri dibura

aboudo simara woko to ama-owameai-ri, ina oro ro nou simara tu to ama-omio-ri keba se beda sosoro to womiotiti idaibo sosoro ama-omiotiti-ri.

<sup>14</sup> Ina, tanaro patu mea se namadimo-ororosioi diro-ri, mo ba-demaragoidiro-ro oro ro, mo natonato ie, ibose mo sapuwo to Pero aboto ba-daro owera mo dibura aboudo osuruwo modobo ie.

<sup>15</sup> Mo Hiburu duriomoro rido kou kawa ou pua, urubia ro sarupo naubai-rimo ina mo ro ata ubauba ata osioi diro pua nato. Mo kedea kawa nedeai-rimo dibura to.'

<sup>16</sup> Ina Pero parawa kemito dubu ro na-giowidiro Iosepa ro beda sosoro gemowawea tuba sosoro obo kemeauri dubu nou hiwo owera mea, nou iato gutura Iosepa aboto, 'Mo ibose hiwo ta-norobu. Mo ro netewa didi parawa gatere Peteibi niauri-ibi mo eputa ato neibi ro itomaidiro-ibi,

<sup>17</sup> ibose ohu gatere ato iamo sirio meamea parawa ohona Pero ubi ohona ie, kaupoti pawa sirio ro iroruwo-die edi ohona ro neio ro iato giho-rimo.'

<sup>18</sup> Iosepa ro ibo, 'Oro hiwo owera maumo ibo ie. Netewa didi gatere Peteibi ibo nowawea, netewa didi saiki Peteibi ie.

<sup>19</sup> Netewa didi saiki Peteibi iporeai-ibiri pua oro Pero ro ama-owagare-ri dibura aboudo ina iato oro eputa ama-asiai-ri, oro durupi ududu nou bosu rubi ro amadimo-owioro-ri ota ohu to ioudo amadi-ororidiro-ri. Pawa ioudo namadimi-iroruwoidiro-ri oro durupi neio ro amadime-ekekeouti-ri.'

<sup>20</sup> Netewa didi saiki peteibi oroporeai pua  
Pero koroto saiki ro gowamo. Edi tau ro nato  
nou soriomu nato geremesioidiro. Nou ro sirio  
woko urubia iato gidabuti-ro, taie tuba sosoro  
obo kemeauri dubu parawa kemito dubu Pero  
ro nato gimodobura-marō dibura aboudo,  
neitiro iato giwotobowa-ma nou woko urubia  
sosoro gabo ato.

<sup>21</sup> Pero ro ibo tuba sosoro obo kemeauri dubu  
aboto, 'Oro simara woko to  
amadi-orowameai-ri.' Iato nou woko aise  
gitamuai eputa dubu tuba sosoro obo panikere  
to kemaseduti ie tu ia to kemowou e.

<sup>22</sup> Kaupoti parawa kemito dubu eputa aise  
gasiai-rimo nou ududu ota ohu rido  
gororidiro-ro, Iosepa ro beda sosoro  
gimowauti-ma, hiwo owera maumo tanaro patu  
ibose ti-gororosiodiro-rimo.

<sup>23</sup> Pero tuba sosoro obo kemeauri dubu ata  
kimaragoidiro iamotiti pua Iosepa aboto, nou ro  
Iosepa woki ta-gemati.

## 41

### *Pero hiwo gorobu*

<sup>1</sup> Netewa teibo kisimisi teibo  
na-goroporeai-rido, Pero hiwo nato gorobu. Nou  
hiwo to Naire oromo bara ato gotoi.

<sup>2</sup> Nou ro a-giwia 7 meamea gebarigebari  
burumakau neio ro gerereihai-rimo oromo rido,  
iato aise gidiawado-rimo oromo bara to  
sugamuso iato giho-rimo.

<sup>3</sup> Ina iato nou ro hiwo to a-giwia 7 soro kiokio  
burumakau durupi tato neio ro gerereihai-rimo

atu oromo rido gioro-rimo neio iato imese  
gidiawado-rimo, oromo bara ato aise  
gorowotoburio-rimo gebarigebari burumakau  
gomo ato.

<sup>4</sup> Ina iedi 7 soro kiokio burumakau neio ro 7  
meamea gebarigebari burumakau aise  
giho-rimo. Pero ro na-giauri hiwo to nou aise  
gerebidiro-ro norou maumo rido.

<sup>5</sup> Ina tuturu to pua edi norou ro nou ro ina  
aise gowameai, nou ro ata hiwo nato gorobu.  
Nou ro a-giauri kaupoti woiti itiri  
na-gosuruwo-ro, neido geremapepe-rimo 7  
meamea gebarigebari koko woiti iopu neio ro  
gosuwoduti-rimo atu itiri rido.

<sup>6</sup> Iato nou ro a-giauri ata woiti itiri 7  
kainakaina iopu mutu na-geremapepe-rimo  
surama korosa ro na-gioura,

<sup>7</sup> kainakaina iopu ro awawo iopu aise  
gimodi-rimo. Pero ro a-gimaragoidiro morobise  
ie, kaupoti nou norou aboudo na-gerebidiro-ro,  
nou ro ibo 'O, hiwo norobu.'

<sup>8</sup> Kowaroho ato nou na-geribua-ro nou auna ia  
kimaragoidiro giwia. Taie nou ro ata dubu  
imese gemeiriai Isipi idomari ramutu urubia  
aboto, ibose meamea woki tututu urubia ou ri  
nou aboto, neio ro emowauti-ri hiwo owera  
maumo beda sosoro ra. Pero hiwo owera teibo  
na-giwauti-ma neio aboto ina neio ata ro  
modobo pua hiwo maumo kimabuti-ma aboto.

<sup>9</sup> Ina tuba sosoro obo kemeauri dubu ro Pero  
aboto iato gutura, 'Mo ubauba ta-nosoidiro keba  
se. Ata owera ta-nemati woki mo ro,

<sup>10</sup> oro ro neitiro keba se serawo na-niwia-ma  
ina dibura to iato nibiria-ma oro parawa kemito

dubu mutu, oro ro neitiro oro moto kemotoi urubia neio eputa dubu nou moto goro ato nimopai-ma.

<sup>11-12</sup> Ata Hiburu orio domere ie ta-gomidiro dibura moto goro ato neitiro mutu, nou Potipa sowake dubu e. Neitiro hiwo atu duwo ato nirobu-mado, ina hiwo owera nato norowauti-rido nou aboto, ina neitiro hiwo owera maumo nou ro iato nimamabuti-marō.

<sup>13</sup> Nou ro beda sosoro gimabuti tanaro patu ibose ti-gororosioiido-rimo iato mo oro ro simara woko to aise nowameai ina oro ro ti-gopia oro parawa kemito dubu.'

<sup>14</sup> Taie Pero ro ata dubu iato gemeiriai dibura moto to Iosepa ou ri nou aboto hiwo owera maumo ememabuti-ri. Iosepa samo to gowosuruwo-rimo dibura rido nou atata musuga na-gorowarure, dibura obotama na-gipuriti taie orio obotama iato giroiti, imese gou-ro Pero aboto.

<sup>15</sup> Taie Pero ro iato gutura nou aboto, 'Mo hiwo ta-norobu ina ata dubu ata ro modobo pua hiwo maumo kemabuti aboto. Mo ta-nemowapotai-mo urubia ro ibo oro ro hiwo owera mea se kimabuti ie.'

<sup>16</sup> Iosepa ro ibo, 'Auna dubu, mo ro hiwo owera nakara se kimabuti modobo pua, Godi nakara umoro ie, oro hiwo owera nou ro ama-ememabuti-ri.'

<sup>17</sup> Pero ro ibo Iosepa aboto, 'Mo hiwo to Naire oromo bara to notoi.

<sup>18</sup> Mo ro ta-niwia 7 meamea gebarigebari burumukau neio ro erereihai-dioumo obo

maumo rido, iato aise idiawado-dioumo oromo bara to sugamuso imese iho-dumo.

<sup>19</sup> Ina iato mo ro ta-niwia 7 soro kiokio burumukau durupi tato neio ro erereihai-dioumo obo maumo rido, iato aise idiawado-dioumo oromo bara to, taie neio imese orowotoburio oromo bara ato gebarigebari burumukau gomo ato. Kibase idaibo sosoro ubauba burumukau mo ro iaui pua Isipi duriomoro ato,

<sup>20</sup> ina iato 7 soro kiokio burumukau ro 7 meamea gebarigebari burumukau neio ro iho-dumo.

<sup>21</sup> Neio ro na-iho-dumo gebarigebari burumukau ina neio iroromai pua, atu sosoro ibose to oroho-dumo soro kiokio tokatoka. Ina mo aise nerebua-die norou maumo rido,

<sup>22</sup> ina norou aise nowameai.

Iato ata hiwo norobu, mo ro a-niaui kaupoti woiti itiri na-wosuruo ina ioudo eremapepe-dumo 7 meamea koko woiti iopu neio ro osuruwo-dumo atu itiri rido.

<sup>23</sup> Iato mo ro ta-niaui ata woiti itiri 7 kainakaina iopu mutu na-eremapepe-dumo surama korosa ro na-gioura,

<sup>24</sup> awawo woiti neio ro aise imodi-dumo. Kowaroho ato mo na-neribua-die ata dubu imese nemeiriai Isipi idomari ramutu urubia ou ri mo aboto, mo hiwo teibo maumo mea se ememabuti ri. Mo ro neio aboto iato norowauti hiwo owera ina mo neio ata ro modobo pua hiwo teibo maumo mea se kimamabuti-ma aboto.'

*Pero hiwo teibo maumo Iosepa ro gememabuti-ma*



<sup>25</sup> Iosepa ro ibo Pero ato, ‘Oro edi hiwo teibo ro atu sosoro ie. Oro Godi ro emowawea-die, nou ro etou tanaro ama-isioidiro-ri nedi tau ro nato.

<sup>26</sup> 7 meamea gebarigebari burumakau ibo nowawea 7 meamea kisimisi ie, ibose 7 meamea woiti gebarigebari iopu 7 meamea kisimisi ie. Nodi hiwo teibo ro neitiro maumo atu se ie.

<sup>27</sup> Ibose 7 soro kiokio burumakau durupi tato edina ro na-gerereihai-dioumo obo maumo rido ina 7 ubauba woiti surama korosa ro na-gioura ibo owamo ohona tato sogoi 7 kisimisi ro amadidimo-ou-ri.

<sup>28</sup> Oro mo ro beda sosoro nemowauti idaibo sosoro amadimo-ororosioioidiro-ri. Oro Godi ro emowauti-die, nou ro etou tanaro ama-isioidiro-ri.

<sup>29</sup> Isipi duriomoro ato 7 kisimisi to sirio ohona neio ro ama-iamo-ri, urubia modobo ato ama-orowomidiro-ri.

<sup>30-31</sup> Ina iedi 7 meamea kisimisi ro namadimo-oroporeai-ri, 7 sogoi kisimisi tau ro amadi-ereredeai-ri, urubia ro woki amadidimi-imati-ri iedi 7 meamea kisimisi ro. Neio sogoi ro auna ia se ama-iwatiti-ri.

<sup>32</sup> Nodio hiwo teibo ro maumo teibo atu sosoro ie. Godi ro iaiwai-ma-die nedi netewa teibo hiwo teibo ro oro aboto, mabu tanaro aupise ie nou ro morobise to amadi-iwapotai-ri.

<sup>33</sup> Ina abora nedi tau ro nato mea dubu ata ba-daubai kimaragoidiro tututu mutu, nedi Isipi duriomoro ro nou ro ama-iauri-ri.

<sup>34</sup> Ina duriomoro gabogabo ohona kiauri urubia ba-diaubuti, 7 meamea kisimisi ato sabowa urubia aboudo ohona neio ro amadimi-idabuti-ri. 5 soirio kidabuti ato, 4

soirio sabowa urubia do ie, kaupoti soirio ohona  
kiauri dubu ro kimidai ie sogoi tau sapuwo to.

<sup>35</sup> Pero owera to urubia ro ohona  
amadimi-idabuti-ri awawo sabowa to neio ro  
awawo moto goro to amadimi-iwodouti-ri,  
kimotoi urubia ro iato amadimi-imotoititi-ri.

<sup>36</sup> Ohona tato 7 kisimisi  
namadidime-ererede-ri urubia sirio ohona  
kimio to Isipi duriomoro gabogabo ioudo  
amadimi-iwarebidirotiti-ri. Idaibo sosoro tanaro  
neio sogoi se orowomidiro-ri pua ina  
orowaburo-ri pua.'

*Iosepa eputa dubu to Pero ro gowomi*

<sup>37</sup> Nodi tanaro ro Pero ro mea se gowea Iosepa  
abato, ibose Pero gabamani urubia imese sirio  
se ubi aise goi-rimo Iosepa ro beda owera  
gimowauti.

<sup>38</sup> Pero ro ibo, 'Nimo abato ata dubu ata  
omidiro pua Godi urio mutu Iosepa nou se ie,  
kaupoti nou ro omidiro.'

<sup>39</sup> Ina nou ro ibo Iosepa aboto, 'Oro Godi ro  
emowawea-die nedi tanaro sirio ro. Isipi  
duriomoro ato ata dubu ata omidiro pua oro  
sosoro mea kimaragoidiro mutu.

<sup>40</sup> Mo moto ato beda woko ro iamo oro ro  
nama-emeaurititi-ri. Ina mo urubia ro modobo  
ie oro owera kibodoro, oro beda owera kutura  
ra neio ro modobo ie aise kisioidiro, kaupoti oro  
mo saro rido amadi-irarebidiro-ri, mo huru oro  
ro namadi-emeauri-ri, mo kaupoti mo ro  
nama-otoi-ri keba to.

<sup>41</sup> Oro mo edi duriomoro gebari ro, oro ro  
nama-emeaurititi-ri. Imese urubia sirio oro ro  
neio sopu to amadi-iauri-ri.'

<sup>42</sup> Taie iato Pero simara tu rido tu reini simara titi mutu iato guriai ina Iosepa tu mopokoi to iato gadebo. Ibose nou ro mea obotama kememidai iato gowori. Iosepa nou ro ina gorodi seni to wagotha to iato gowori.

<sup>43</sup> Pero edi boso aboto koroho nakomu ro ata nou gemapoi oroho na, nou neito na-gorora iato girario urubia sirio keba to giwisia Pero ro, nou saro rido koroho nakomu ohu ato amura to gomidiro-ro. Iedi urubia ro na-gou-rimo keba to, nou sosoro gabo ato neio iato kai diamo ro geresebuti, 'Gabo dematateai-mo! Gabo dematateai-mo!' Iosepa gabo ato na-irohotiti neio idaibo tanaro nou isioidiro-titi-mo. Pero ro nou ri gisioidiro iedi tanaro sirio ro mabu Iosepa auna masiro gomia Isipi duriomoro nou ro ama-emeaurititi-ri.

<sup>44</sup> Pero ro ibo Iosepa aboto, 'Mo ia ro naro, mo Pero kaupoti nou se ie, ata ata ro isioidiro-ri pua simara ubi tanaro, marasio ie keba se oro aboto gi-ou-ri, oro kemowapotai ato nou ro ido kisioidiro ie.'

<sup>45</sup> Taie Pero ro nou masiro iato gomia Sapienata Panea. Nou ro ibose Iosepa orobo iato gemapoi nou masiro Asenata Potipera. Oni sabowa ato na-gotoi tarena namabu kiamo moto Potipera iato isioidiro-titi woko. Iosepa imidirotiti pua kaupoti moro ato Isipi duriomoro gabogabo irohotiti urubia na-iraturiotiti.

<sup>46</sup> Iosepa nou 30 kisimisi ro na-gorobai Isipi eputa dubu woko kemesioidiro nato gatamuai. Iosepa nou Pero moto ato dorogora se imidirotiti pua, nou Isipi duriomoro gabogabo irohotiti urubia na-iraturiotiti.

<sup>47-48</sup> Urubia 7 kisimisi to na-irowomidirotiti keremiro mea se giwaboi-rimo ohona sirio pari namabu sirio nato idabutiti-mo. Awawo sabowa ato Iosepa ro idabutiti woiti ohona sirio awawo moto ato iaremotiti. Nou ro awawo sabowa gabogabo idabutititi ohona, awawo moto urubia ro ta-geremari-rimo neito iaremotiti. Urubia ro pari ta-isiodirotiti-mo sabowa gabogabo ina Iosepa ro idabutititi awawo moto to.

<sup>49</sup> Ibo pua sipu tato ohona kiaremo duriomoro gabogabo awawo moto to, nou ro imese sirio ia se idabutiti imese ta-girotomuwado-rimo duriomoro gabogabo neio ro se giamo. Modobo pua ata ro kioputi aboto iedi ohona sirio ro, Iosepa ro edina ro gidabuti koriri beda sosoro ra ibo ie.

<sup>50</sup> Sogoi tau ido amadi-eredea-ri Iosepa mere teibo nou orobo Asenata Potipera ro nato giroto-ma.

<sup>51</sup> Iosepa ro a-gutura ibo, 'Mo Godi ro mibo ta-nemowagare ibose mo abera urubia woki imese nato nimati.' Iosepa ro nou ri giduti keba mere Manase, Hiburu owera to ibo owamo 'Woki kemati'.

<sup>52</sup> Ina Iosepa ro ibo, 'Iedi duriomoro nato mo mibo ato na-nimidiro, Godi ro mo pepea sirio komio ie.' Iedi saro mere ro nou ro a-giduti Eparaimi to, Hiburu owera to ibo owamo 'Pepea sirio ie'.

<sup>53</sup> Iedi 7 meamea kisimisi ato na-idabutiti-mo ohona Isipi duriomoro ato womu to ti-gereredea-ro.

<sup>54</sup> Iosepa ro beda sosoro owera to garo, iato 7 sogoi kisimisi gitamuai-rimo, duriomoro

gabogabo sogoi ro giwati, imese duriomoro  
gabogabo ohona ro ta-girihe kaupoti Isipi ato  
ohona ta-giamo.

<sup>55</sup> Iato Isipi duriomoro ato auna ia sogoi tau  
na-gereredea urubia sirio sogoi ro giwati. Taie  
neio auna owera iato garo-rimo Pero aboto,  
'Nimo ohona tato ie sogoi ri orowaburai ate,  
nimo ohona dimio-ro!'

Pero ro ibo, 'Ba-dou-mo Iosepa aboto, nou ro  
beda owera kutura ra nio ro aise  
gidimo-osioidi-ro!'

<sup>56</sup> Isipi duriomoro ato sogoi na-gorobodorouti  
ina Iosepa beda moto to giaremo ohona iato  
gidobuti, Isipi urubia sirio Iosepa aboudo ohona  
mani to ioudo gimade-rimo, mabu Isipi  
duriomoro ato sogoi auna ia se iwatititi, ohona  
ro ta-girihe.

<sup>57</sup> Duriomoro gabogabo urubia sirio ibose  
ta-goroho-rimo Isipi to Iosepa aboudo mani to  
ohona imade ri, mabu imese duriomoro sirio ato  
sogoi auna ia se gorobodorouti, neio ohona ro  
ta-girihe.

## 42

*Iosepa hiwo owera morobise to  
gororosioidi-ro*

<sup>1</sup> Iakobo umoro ta-goi ibo ohona tiamo Isipi  
duriomoro ato. Taie nou ro dubu mere sirio iato  
gimowapotai, 'Nio etona mabu ato  
irowomidirotiti idaibo sosoro kabuamuti  
na-eremabotidirotiti-dumo?

<sup>2</sup> Mo ro ta-nirorowai owera, urubia Isipi to  
oroho-dumo ohona imade ri. Nio ba-dou-mo

Isipi duriomoro to ohona ioudo ba-dimade-rimo. Nimo idaibo sosoro komidiro modobo pua, nimo orowaburainiri-dumo.'

<sup>3</sup> Taie Iosepa odio 10 naramio ro neio imese gaimai-rimo ohona imade ri Isipi duriomoro rido,

<sup>4</sup> kaupoti Iosepa saro rudo edi mere ro na-girarebidiro-ro Beniamini Iakobo ro emeiriai pua naramio mutu ou ri, mabu Iakobo ubi tato ie Beniamini ata nakomu ata ro kari ipi gabo ato.

<sup>5</sup> Iakobo ata masiro Isiraere nou 10 dubu mere imese gimeriai amia urubia aboto garadabuai-rimo ohona imade ri Isipi duriomoro rido, mabu neio Keineni duriomoro ato sogoi se irowomidiroiti.

<sup>6</sup> Isipi duriomoro Iosepa ro iaurititi gabamani to nou ro imidiroiti, urubia ohona nou aboudo imadetiti-mo. Iato Iosepa naramio neio ro orowateai-diomo Isipi duriomoro to, iato Iosepa sosoro gabo ato neio aise giroborea-rimo.

<sup>7-8</sup> Iosepa ro na-giwiia edi urubia ro nou ro ta-gieibimai neio etio ra kaupoti nou neio ro eibimai pua. Nou daimodaimo dubu to garatigi. Taie nou ro masawe to iato gutura ibo, 'Nio boido ra? Boido ou-diomo?'

Iosepa naramio ro iato gemowameai-rimo, 'Nimo Keineni duriomoro rido nou-diomo ohona imade rie oro aboudo.'

<sup>9</sup> Iosepa ro na-giwiia naramio na-giroboreauti-rimo nou aboto, nou hiwo teibo woki to iato gimowou-ma naramio ro giroboreauti-rimo. Taie Iosepa ro iato gutura ibo, 'Nio duriomoro umoroumoro a-woititi-dumo ra?'

<sup>10</sup> Naramio ro iato gemowameai-rimo ibo, 'E e, auna dubu, ibo pua, nimo puki urubia pua, nimo dorogora se urubia ie, nimo a-nou-diomo ohona imade ri.

<sup>11</sup> Nimo neito na-nou-diomo kaupoti abera ro nirasomai, ibo pua nimo bagea owera karo oro aboto, morobise owera naro-dumo.'

<sup>12</sup> Taie Iosepa ro iato gutura nou naramio aboto, 'E e, nio idomari nou ri owou-dioumo nedi duriomoro ro arahidimai-ri.'

<sup>13</sup> Naramio ro iato gemowameai-rimo, 'Nimo 12 ie keba se, abora nimo 10 ie, kaupoti abera ro nirasomai. Nimo Keineni duriomoro ato nirowomidiro, ina neama kainai ta-nemeserai-mo idau mutu iato tomidiro-do, ibose nimo ata neama ta-garaburai.'

<sup>14</sup> Iosepa ro ibo, 'Nio mo ro ta-nimowapotai keba se nio morobise puki urubia ie.

<sup>15</sup> Nio anama-iwaibia-ri Pero idaibo tau ato na-omidiro nio ro nedi duriomoro ro sobosobo to emeserai-ri pua womu tato nio neama kaina neito namadi-ou-ri mo aboto.

<sup>16</sup> Nio ata ba-mou neama orobai ri ba-mowou-ro neito mo aboto. Amia urubia nio dibura to anama-iedea-ri. Nou kowou ato nio neama kaina mo ro nama-imowea-ri mo umoro nato nama-ai-ri ibo nio morobise owera aro-dioumo. Ina nou kowou tato mo aboto, Pero idaibo tau ato na-omidiro mo umoro anama-ai-ri ibo nio puki urubia ie.'

<sup>17</sup> Iato Iosepa ro neio dibura to aise giedea, netewa didi saiki to gorowomidiro.

<sup>18-20</sup> Netewa didi saiki peteibi na-goroporeai-birimo Iosepa ro a-gutura ibo naramio ato, 'Mo ro Godi auna se

nemaragoidiro-titi. Nio morobise urubia ato nio ata dibura to amadi-eremeserai-ri, amia urubia ro amadimo-osuruwo-ri ohona neio ro amadimi-iwou-ri upi merebusere aboto. Iato nio namadimo-orowateai-ri neama kainai ba-dowou-rimo neito mo aboto. Nio ro neama kaina namadidimo-owou-ri mo umoro anama-ai-ri ibo nio morobise oweri garo-rimo mo aboto. Nodi tanaro ro namadimo-osioi-ri nio orowaburai-ri pua.'

Iosepa naramio ubi aise goi-rimo idaibo tanaro nou kosioidiro aboto.

<sup>21</sup> Taie neio iato geremowauti-rimo nakara se, 'Nimo ro keba se beda ubauba tanaro nosioidiro-rimo neama aboto nimo mibo ro nou sapuwo to nirobai. Nou ro egea se garo ibo "Mo opia ate! Mo aise dowarebai-rimo!" Nimo ubi tato noi-rimo nou kowarebai aboto. Abora nou e wisa torowameai-die nimo aboto.'

<sup>22</sup> Iato Rubeni ro a-gutura ibo, 'Nio mo ro ta-nimowapotai modobo pua nedi mere ro nio ro ubauba kowai aboto, ina mo oweri nio ro age-seai-rimo nou kowarebai aboto. Edi ubauba tanaro ro na-nosioidiro-rimo nou aboto abora nou e umoro noti noi-dumo wisa ro orowameai-die nimo aboto.'

<sup>23</sup> Taie Iosepa naramio aboto oweri na-garo ibo pua nou ro simara oweri to karo. Nou ro oweri kiwesegere dubu turi ato ta-gowotobowa, Iosepa oweri nou ro gemowesegere. Neio ata umoro iamo pua ibo nou Iosepa ie kaupoti neio edi oweri to garo-rimo Iosepa ro ta-gimewidiro.

<sup>24</sup> Nou aise garatea ata ibi gugugu to naramio idobi iato gimerete.



Taie tuturu to pua nou na-gosuwoidiro-ro ower aro ri naramio aboto iato Simioni se gorobai hodo to iato gemotohiti tu ato, sairo ato naramio ro ibo ti-giauri-rimo.

<sup>25</sup> Iosepa ro sowake urubia iato gimowapotai ibo, 'Edi urubia ro ohona baiko to ba-dimaratuti-mo, ina neio ro beda mani to imade-dumo ohona ba-dimowame-mo mani pauso baiko goro to ba-dimibiti-mo, ina modobo ie neio ipi gabo ato ihona ba-dimio-mo.' Iosepa ower aro gabo modobo, sowake urubia ro ibose gisioidiro-rimo. (Iosepa naramio umoro oi pua nou ro beda ower aro to garo nou sowake urubia aboto.)

<sup>26</sup> Iosepa naramio neio ohona baiko doniki ohu ato na-giaremuti-rimo, taie imese gorowameai-rimo duriomoro to.

<sup>27</sup> Neio ipi ato duwo ro na-gimatimuti iato aise gutua-rimo. Iosepa ata naramu nou ohona baiko iato gemapimai, nou doniki ohona emeihai rie. Baiko nou ro na-gemapimai nou ro mani se giwia baiko goro ato,

<sup>28</sup> nou ro iato gimowapotai borubi, 'Mo ro edi mani ro na-niaiwai nedi ohona ro nou sapuwo to noti tiamo mo baiko goro ato, etu ro hatu nemowameai-die?'

Iato neio auna ia tere ro girobai, aborabora se giraroweauti-rimo, neio ower aro iato geremowauti-rimo beda sosoro tanaro ro gorosoioidiro-rimo. Neio ro ibo, 'Etou tanaro isioidiro-die Godi ro nimo aboto? Nou abora tanaro ie!'

*Iosepa naramio Keineni duriomoro to*

*gorowameai-rimo*

<sup>29</sup> Iosepa naramio imese gorowameai-rimo neio abera aboto Keineni duriomoro to. Neio ro beda tanaro giauri-rimo iato na-gororosioidiro-rimo, Iakobo aboto iato gorowauti-rimo. Neio ro ibo,

<sup>30</sup> 'Isipi duriomoro edi dubu ro na-iaurititi nou ro oweri masawe to garo-ro nimo aboto, ata sosoro girarowo-ro. Nou ro ibose ta-gutura-ro, "Nio puki ou-diomo neito nedi duriomoro nou owaseidiro rie."

<sup>31</sup> Nimo ro ibose tanaro mo nou aboto, "Nimo puki urubia pua, morobise urubia ie.

<sup>32</sup> Nimo naminiramio ie kaupoti abera ro nirasomai. Keba se nimo 12 ie ina abora nimo 10 ie, ata keba se garaseperai. Nimo neama kainai ta-nemeserai-mo abera mutu tomidiro-do Keineni duriomoro ato."

<sup>33</sup> Taie ina iedi duriomoro kiauri dubu ro nou ro gutura nimo aboto ibo, "Mo abato nio ata ba-momidiro-ro mo umoro nato nama-ai-ri nio morobise urubia ie. Nio arua ba-dorowameai-mo ohona ba-diwameai-mo upi merebusere sogoi ro iwatiwiri.

<sup>34</sup> Nio namadimo-orowateai-ri simara duriomoro to nio neama kainai ba-dowou-rimo mo aboto. Iato mo umoro nato nama-ai-ri nio puki urubia pua, morobise urubia ie. Ina nio naramu neama mo ro nato nama-imowameai-ri iato nio dorogora se amadimo-oroho-ri ata ubauba kimaragoidiro tato, namabu mani to nato ba-dimade-mo." '

<sup>35</sup> Taie Iosepa naramio ohona baiko iato gimagagawado-rimo neio ro simara mani se giauri-rimo na-giamo simara baiko goro ato.

Neio abera mutu mani na-giauri-rimo ohona ohu ato na-giamo, neio auna ia tere ro girobai.

<sup>36</sup> Taie Iakobo ro iato gutura, 'Mo mere teibo nio ro ta-giwagare-marimo Iosepa ra Simioni ra pоторо ie, ina Beniamini emediawado-dumo owagare ri. Mo sapuwo rido imese tanaro patu ubauba ia se ororosioi-di-ro-dumo.'

<sup>37</sup> Rubeni ro iato gutura Iakobo aboto, 'Beniamini mo aboto ba-dapoi-ro garegare tato se. Mo ro anama-owou-ri Isipi gabamani dubu aboto nou ro ama-owea-ri tauo. Mo ro mea se anama-iauri-ri ina anamadi-emowameai-ri. Beniamini mo ro kowameai tato mo mere teibo oro ro nato ba-diopia-ma nou sapuwo to.'

<sup>38</sup> Ina Iakobo ro ibo, 'Mo mere Beniamini oro ro owou-ri pua Isipi duriomoro to. Nou naramu ta-garaburai, Rasere mere kaupoti nou se ie. Mo auna ia tere ie nou ipi gabo ato ata tanaro ro kowea. Mo idaibo omidi-ro-ri pua ibose nedi mibo ro mo nou ro nama-opia-ri.'

## 43

*Iosepa naramio ina gorowameai-rimo Isipi to*

<sup>1</sup> Iedi tau ro nato Keineni duriomoro ato meamea ohona isuwodutiti pua, urubia iato auna sogoi ro iwatititi.

<sup>2</sup> Taie naramio ro iedi ohona ro na-gimade-rimo Isipi rido keba se neibi ro kiho to ta-giporeai-birimo. Taie neibi abera ro iato gutura ibo, 'Nibi ina ba-dorowameai-bimo ohona egea mere se ba-dimidai-birimo Isipi rido.'

<sup>3</sup> Ina Iakobo Iuda ro gemowameai ibo, 'Kaupoti iedi gabamani na-omidi-ro iato neibi

nou ro koko owerā ta-nimia-ibiro. Nou ro ibo gutura neibi ato “Mo sosoro woidomari nibi ro koweā modobo pua ina, womu tato nibi neama kainai mutu namadibi-imou-ri neito mo aboto.”

<sup>4</sup> Beniamini oro ro namadi-adodorai-ri neibi mutu ou ri io neibi oro sapuwo to nato namabimo-ou-ri ohona imade ri Isipi duriomoro rido.

<sup>5</sup> Oro ro kadodorai tato Beniamini neibi mutu ou ri neibi iodori-ibiri pua Isipi duriomoro to mabu iedi gabamani ro nou ro ta-gutura-ro ibo, “Nibi ro neama kainai kowou tato mo aboto, mo nibi ro sosoro woidomari ina koweā modobo pua.” ’

<sup>6</sup> Ina Iakobo ro ibo neibi aboto, ‘Mo ata mibo nemotomai-bimo nibi ro idaibo sosoro owerā to na-garo-birimo. Nibi ro etona mabu ato gemowapotai-birimo edi gabamani dubu ro ibo nibi neama kainai mutu e?’

<sup>7</sup> Taie neibi ro ibo Iakobo aboto, ‘Iedi dubu ro nou ro neibi gu sapuwo to auna ia se nimodoruti-ibi. Nou ro ibo, “Nibi abera a-womidiro ra?” Ina neibi ro ibo, “Neibi abera tomidiro.” Neibi nou ro auna ia se nimodoruti-ibi ibo, “Nibi neama kainai mutu ra?” Ina nou neibi ro iato nemowameai-birimo. Neibi umoro oi pua keba se nou ro a-nimuhia-ibiro neama kainai sapuwo to na-gutura-ro ibo “Nibi neama kainai ba-dowodori-birimo mo aboto!” ’

<sup>8</sup> Taie Iuda ro ibo nou abera ato, ‘Beniamini mo aboto aise ba-dadodorai-ro mo ro anama-owou-ri. Abora aise dosioihiro. Nimo atu se korowaburai modobo pua nato.

<sup>9</sup> Oro ro mo aboto dadodorai-ro nou mea se mo ro anama-iauri-ri. Nou mo ro kowameai tato

mo oro ro nato ba-demaruti-ro auna oweru to womu tato mo pamo nama-owea-ri.

<sup>10</sup> Neibi idaibo ata tau nowagare-birimo a-norowameai-birimo, oro ro kimowasiai-ibi tato rasiri ie ina ba-naimai-bimo ohona kimade ina ba-norowameai-birimo ina iato korowameai idaibo sosoro koroho nou ba-noroho-bimo kaupoti neibi ro oweru keremowauti to noporeai-bimo nedi saiki ro.'

<sup>11</sup> Taie abera ro ibo, 'Ata gabo potoro ato taie ibose ba-dosioi-di-ro. Nio namadimo-ou-ri ba-dimidai-mo neido meamea ohona ro buruku to ba-dibiti-mo ina ota meresini, nogobe, meamea nibo dehoru, kiho ota iopu nou ba-di-wodo-rimo nio nirimagare namabu patu duriomoro kemeauri dubu nou ba-domia-mo,

<sup>12</sup> mani iopu nibi ro namabimi-imidai-ri keba se beda sosoro giwodori-rimo ina ohu rudo idaibo sosoro ba-ditomai-birimo. Ibose woki emati ate edi mani ro na-gimowameai-ibi nio ro ina ba-dimowameai-mo. Etu umoro ra neio a-garadorea-rimo.

<sup>13</sup> Taie Beniamini dadabuai-mo, mea se ba-demeauri-rimo nio ro.

<sup>14</sup> Dasiriai-mo idaibo tau ato, iedi dubu ro nou aboto se ba-dirodoromai-mo. Godi imese auna ia pupuwo dubu iedi gabamani ro na-womidi-ro nou aboto mea nirimagare kimaragoidi-ro ba-maiwai nio sapuwo to. Nou ro ibose Simioni ra Beniamini ra ba-miadodorai-marou neito amadido-orowameai-ri nio mutu atu se mo aboto. Mo aboudo mere ata kararaseperai ato imese kararaseperai ie.'

<sup>15</sup> Taie naramio ro iato gemadabuti-rimo namabu eputa dubu omia na, neio Beniamini

mutu imese gemowou-rimo Isipi duriomoro to. Naramio ibose sirio mani ta-gimidai-rimo ohona imade na, keba se edi mani giwou-rimo nou mutu atu se gidabuai-rimo imese giwou-rimo.

Neio neido hio ito geremamidimai-rimo Isipi duriomoro to na-gorowateai-rimo, taie Iosepa sosoro gabo ato imese gorowotoburio.

<sup>16</sup> Iosepa ro na-gowea Beniamini neibi mutu kotoi moro ato, nou ro ibo nou moto kemeauri dubu aboto, 'Nodi urubia ro na-orowotoi dirobai-ro ba-diwodoro mo moto to, ibose oro ro burumakau ata ba-dimopia ohona ba-dimitai, nedi saiki turi ro neio mo mutu mo moto ato ohona atu se anamadimi-iho-ri.'

<sup>17</sup> Taie moto kiauri dubu ro beda owera girowidiro Iosepa aboudo nou ro aise gisioidiro. Taie neio nou ro kidabuai iato giwodoro Iosepa moto to.

<sup>18</sup> Neio tere mutu godoro-rimo. Neio iato geremowauti-rimo, 'Kebase neibi na-nou-birimo ohona imade ri etu umoro ra neio ro beda mani gibiti-rimo neibi baiko goro to, nimo nou sapuwo to nirobai-die. Nou ubi ie nimo dibura to kiedea, nimo nou sowake urubia to ararasoro ri, ibose nimo doniki nou ro anama-iwasiti-ri.'

<sup>19</sup> Taie neio imese gou-rimo Iosepa moto kemeauri dubu aboto, ido godoro-rimo, magere damo ato neio ro iato gemowapotai-rimo iedi dubu ro, neibi ro ibo,

<sup>20</sup> 'Auna dubu nimo keba se neito ta-nou-rimo Isipi duriomoro to ohona imade ri,

<sup>21</sup> nimo ina neido na-norowameai-rimo ohona baiko mutu nimo ipi ato duwo ro na-nimatumuti iato aise nutua-rimo. Taie nimo atu se baiko iato nimahitauti-rimo, nimo baiko

erere ato mani se niauri-rimo. Nedi mani ro nimo ro iwopirua pua ta-niwameai-rimo nimo abato tiamo iaiwai rie nio aboto, nimo beda ohona niwou-rimo neido etu umoro ra woki geremati ohona kimade dubu ro,

<sup>22</sup> ibose nimo simara mani ta-niwou-rimo orio ohona imade na nio aboudo. Nimo umoro iamo pua nedi mani ro etu ro nimowame baiko goro to.'

<sup>23</sup> Taie moto kiauri dubu ro ibo, 'Puaie ata kimaragoidiro tato se ie modobo ie. Nibi tere na ie. Nio edina na-emowabutititi-dumo, nio abera ro edina na-emowabutititi Godi nou ro aise gimowame. Nio ro edi mani giaiwo-rimo mo aboto, mo ro ta-nimade.'

Taie Simioni nou ro na-gorobai-ro neio aboto imese gowosuruwo-ro.

<sup>24</sup> Iato moto kiauri dubu ro neio imese giwodoro edio urubia ro Iosepa moto to, obo na-gimia taie neio sairo imese giwiouti-rimo ibose nou ro neio doniki ohona iato gimio.

<sup>25</sup> Taie naramio ro edi namabu gidabuti-rimo saiki turi ato omia na neio ro iato giehuti-rimo baiko goro rido taie imese giaremuti-rimo atu moro ato. Neio umoro ta-goï-rimo neio abora Iosepa mutu ohona atu se amadimi-iho-ri.

<sup>26</sup> Iosepa na-gorowameai-ro woko aboudo, naramio ro edi namabu gidabuti-rimo neio ro nou iato gomio-rimo. Taie neio eputa goto to atu se aise giborea-rimo.

<sup>27</sup> Iosepa ro neio iato gimodowa, 'Nio modobo ra? Mo nio ro na-nemowauti-rimo nio abera negere sapuwo to nou modobo ra, nou aise a-womidiro ra?'

<sup>28</sup> Ina naramio ro ibo, 'Oro sowake dubu nimo abera modobo ato tomidiro, nou araburai pua.' Taie neio eputa ina sopu to aise giborea-birimo Iosepa aboto mabu nou auna dubu e.

<sup>29</sup> Ina Iosepa ro na-gowea Beniamini mabu neitiro atu mamu ro giroto-ma, nou ro naramio iato gimodowa, 'Nio ro na-nemowapotai-rimo neama kainai sapuwo to nedi mere ro nio neama kainai ra?'

Iosepa ro iato gutura Beniamini aboto, 'Mo mere, oro Godi ro korosa ba-momia!'

<sup>30</sup> Nou ro na-gowea nou neama Beniamini simara idomari to nou niro ubauba ia se gowamo, ina nou ri godoidiro moto goro to neama idobi piro se iato gemerete, mabu nou ro kiauri modobo pua nou neama kainai. Nou idobi suwo aise gisuputai-rimo taie noudo godoidiro nou neio ro kowea modobo pua.

<sup>31</sup> Nou idobi kiroto na-goporeai taie nou woidomari iato giwiouti ina imese gosuwoidiro-ro neio aboto. Nou a-gororodiobuti nakara se idobi auna se kemai modobo pua.

Taie nou ro ibo sowake urubia aboto, 'Ohona ba-dihoduti-mo,' taie neio ro ohona iato gihoduti-rimo.

<sup>32</sup> Iosepa timase gemohodowa-rimo, naramio timase gimohodowa-rimo, Isipi urubia neio timase gimohodowa-rimo mabu neio ubi tato ia ie Hiburu urubia mutu atu moro ato kiho.

<sup>33</sup> Taie Iosepa naramio na-gorowomititi neio keba dubu keba to gomi, iato nou abato na-gai-ro nou ro gomi, iato nou abato na-gai-ro nou ro gomi, ibo gomititi-rimo womu tato



Beniamini nou saro ia to gomi-ro. Neio nakara se iato geremowauti-rimo, boroboro se giraroweauti-rimo, auna ia kimaragoidiro nou gowea-rimo.

<sup>34</sup> Edi ohona ro na-giaremuti-rimo Iosepa edi moro nato arua ohona aise gimeriai-ro nou naramio aboto, kaupoti Beniamini nou ro 5 tau to gomio-ro ohona. Taie Iosepa nou naramio mutu auna kamade ro giwati ohona na-giho-rimo waini na-gidio-rimo Iosepa mutu.

## 44

### *Iosepa panikere a-garasoperai*

<sup>1</sup> Taie Iosepa moto kemeauri dubu iato gemowapotai ibo, 'Nodi urubia ro ohona baiko to ba-mirotomuwo-rimo ina oro ro neio mani ba-dimowame simara ohona baiko to.

<sup>2</sup> Ibose mo siriba panikere ba-dibitidiro neio edi neama ro nou baiko to ina ibose nou mani ba-demebitidiro.'

Iosepa ro iedi owera ro na-garo nou moto kemeauri dubu aboto nou ro ibose to gisioidiro.

<sup>3</sup> Taie kowaroho duwoduwo naramio nou ro imese gitiodorai neio simara doniki mutu.

<sup>4</sup> Neio sabowa egea mere se gemeserai-rimo ipi ato gou-rimo, taie Iosepa nou nato gutura nou moto kemeauri dubu aboto, 'Oro abora deribua nedi urubia ro na-wou-dumo saro rudo diwasoro, oro ro nama-imatimai-ri neio oro ro ba-dimaiauti ibo ba-dutura, "Nio meana ubauba to etou ri owameai-dioumo?

<sup>5</sup> Ina nibi ro owopirowa-diebimo mo eputa dubu nou panikere obo edina to na-idiotiti. Ibose nou neito kodio ato obo nou hiwo owera

tuputupu se irowautititi. Nio ro imese ata ia ubauba tanaro osioidiro-dioumo.” ’

<sup>6</sup> Taie iedi moto kemeauri dubu ro neio nou ro ioudo gaimai-ro. Iosepa naramio nou ro ipi ato na-gimatimai, taie iedi dubu ro nou ro ibo ti-garo Iosepa beda sosoro owera to gemowauti.

<sup>7</sup> Ina naramio ro ibo, ‘Auna dubu oro ro etou mabu ato aro-die idaibo owera? Nimo ro idaibo tanaro osioidiro-ri pua mabu nimo umoro ie io, ubauba ie.

<sup>8</sup> Kibase nimo ro beda mani niwia-rimo baiko goro ato, Keineni duriomoro rido nimo ro ta-niwameai-diemo. Nimo oro eputa dubu moto rido iwopiro pua mani daro arua meamea namabu,

<sup>9</sup> oro ro eputa dubu panikere nimo ata baiko goro ato nama-owea-ri, nou ro se ba-maraburai, nimo arua rubi oro sowake anamadimo-orohotiti-ri.’

<sup>10</sup> Taie iedi moto kemeauri dubu nou ro ibo, ‘Nio beda sosoro owera to aro-dioumo aise ba-mororsioidiro. Kaupoti etu abato nowea panikere edi mere ro nou mo sowake ama-irohotiti-ri, nio arua ata ubauba tato se amadimo-orowameai-ri.’

<sup>11</sup> Taie neio baiko iato gibeduti-rimo goto ato na-giaremuti-rimo, taie neio baiko iato gimaputi-rimo.

<sup>12</sup> Iedi moto kemeauri dubu ro nou ro panikere kosora iato gatamuai. Nou ro naramu dubu aboudo gatamuai-ro iato ata naramu dubu imese neito gorowati womu tato neama baiko to nou ti-gereredeadea-ro. Beniamini baiko nou ro na-gemapimai panikere nou ro nato gowea nou baiko goro ato gowamo.

13 Taie naramio ro na-gowea-rimo panikere Beniamini baiko goro rido na-geihai-ro neio auna ia ubauba kimaragoidiro gowea-rimo, taie neio namabu iato gerewekekeouti-rimo mabu neio auna ia mibo gowea-rimo. Taie neio ohona baiko ina na-gitahiti-rimo doniki ohu ato gitomo-rimo ina ioudo imese gorowameai-rimo Iosepa bato gomidiro iedi sabowa gebari ro neito.

14 Taie neio Iosepa moto to na-gorowateai-rimo Iosepa ibose ti-gomidiro. Iato neio eputa aise giborea-rimo sopu to mabu Iosepa nou auna dubu e.

15 Taie Iosepa ro ibo, 'Nio etou tanaro osioidiro-dumo, nio umoro ra ibo mo idaibo dubu e mo keremasibowado ie, mo ibose hiwo oweru tuputupu se korowauti ie.'

16 Iuda ro ibo, 'Auna dubu, nimo beda oweru namabimu-uturu-ri? Nimo ro beda sosoro to namadime-emowameai-ri oro ibo nimo ubauba ata osioidiro pua? Nimo Godi ro nimowatateai ubauba nou ro ta-nimowawe-ro. Ina nimo imese na-norowotoi oro sowake anamadimi-irohotiti-ri, panikere etu abato oweru nou ro se koroho oro sowake modobo pua nimo imese atu se ie koroho modobo ie.'

17 Taie Iosepa ro ibo, 'Mo ro idaibo tanaro osioidiro-ri pua. Nio imese sirio se mo sowake urubia to ararasoro-ri pua, kaupoti panikere etu ro gomidai nou kawakawa mo sowake nou ro ama-irohotiti-ri. Nio arua rubi ba-dorowameai-mo ata ubauba kimaragoidiro tato se nio simara abera aboto.'

18 Taie Iuda imese gou Iosepa aboto nou ro iato gutura, 'Auna dubu modobo buro ra mo ower a karo keba se oro aboto, mo simara kimaragoidiro ower a anama-eheruti-ri oro aboto. Oro serawo oi ate mo aboto. Mo umoro ie oro auna gabamani dubu e, oro auna ia pupuwo dubu e Isipi duriomoro eputa dubu nou pupuwo beda sosoro ra oro idaibo sosoro pupuwo ie.

19 Oro ro ta-nimodoruti nimo ibo, "Nio abera negere a-womidiro ra, ibose nio neama kainai mutu ra?"

20 Ina nimo ro oro kemodowa ower a iato nemowameai-rimo, "Nimo abera neama kainai mutu tomidiro-do. Nimo neama kainai edi tau ato gowahau mamu ro nimo abera oromano ro ta-gorobai. Nedi mere kainai ro nou naramu ta-garaburai, kaupoti mamu ro giroto-ma neitiro, ina abora nou nakara ia se geremeserai-ro, nou abera auna ia nirimagare ie nou aboto. Nou kasouti pua ata ata moro to koroho pua."

21 Oro ro ta-gutura-ro nimo aboto ibo, "Nio neama kaina ba-dowou-rimo, mo ubi ie nou kowe a aboto."

22 Ina nimo oro aboto ta-nutura-rimo ibo "Iedi mere ro nou modobo pua abera nou ro kemeserai aboto, nou ro nama-emeserai-ri abera iedi tau ro nato pamo aise ama-owe a-ri."

23 Ina oro ro ibo ta-gutura-ro nimo aboto, "Nio ro neama aise kowou modobo ie mo aboto, nio ro kowou tato mo ubi tato ie nio sosoro woidomari ina mo ro kimoweai."

24 Nimo neido na-norowameai-rimo nimo simara abera aboto nimo ro iato

nemowauti-rimo oro beda sosoro owera garo nimo aboto.

<sup>25</sup> Ohona na-goroporeai nimo abera ro ibo, “Nimo abora ohona potoro ie. Nio ba-dou-mo Isipi duriomoro to ohona ina imade ri.”

<sup>26</sup> Ina nimo abera ibo nemowameai-rimo, “Nimo modobo pua nakara se kou neama kainai tato. Nimo nou tato namadimo-ou-ri Isipi gabamani dubu ubi tato ie nimo sosoro woidomari ina nou ro kimoweai.”

<sup>27</sup> Ina mo abera ro ibo nimo aboto, “Nio umoro ie mo orobo ro netewa teibo mere kawakawa nimowohau-ma,

<sup>28</sup> mo ata mere ro ta-nemeserai-ro. Mo ro ibo nimaragoidirotiti nou durupi tumu na ro ta-gekekeouti. Iedi tau ato gararasoperai nou sosoro woidomari mo aboudo nato giwopirowa.

<sup>29</sup> Nio ro ina neama emediowado-dumo owou ri. Etou ubauba ro ororosioidiro nou aboto iedi tau ro nato edi mibo ro mo nou ro anama-owaburai-ri.”

<sup>30-31</sup> Nimo ina beda sosoro namadimo-orowati-ri neido namadimo-orowameai-ri nedi mere nou tato, nimo abera pamo ama-owea-ri, nou keremiro nedi mere ro nou ro emerebidiro. Nimo ro namadime-emamuai-ri nou naraburai-ri.

<sup>32</sup> Mo abera ta-nemowapotai ibo, “Oro kimaragoidiro tato se, nedi mere ro mo ro mea mino to anama-iauri-ri. Nou mo ro kowameai tato, mo oro ro nato auna owera to ba-demarutiti-ro womu tato mo karaburai.”

<sup>33</sup> Auna dubu abora nedi tau ro nato nedi mere ro nou bobo ato mo ro nama-irohotiti-ri oro sowake. Modobo ie nedi mere ro oro ro

kadodorai aboto, nou korowameai arua  
naramio mutu.

<sup>34</sup> Mo abera ro nama-owea-ri nou tato  
korowameai ina nou modobo pua mo sosoro  
gabo ato kororopia.'

## 45

*Iosepa nakara se geremabowa nou naramio  
aboto*

<sup>1</sup> Iosepa woko urubia sosoro gabo ato  
na-goroho modobo pua, nou niro turi koko se  
korobidiro aboto. Taie nou do ie nou ro woko  
urubia aboto kiaia, 'Mo aboudo urubia sirio  
neido maragare-mo.'

Taie neio iato aise garagare-rimo nou aboudo,  
nou naramio neio kawakawa se  
geremeserai-rimo, Iosepa abato, imese  
gorowotoi nou ubi ie neio aboto eremabowa rie.

<sup>2</sup> Nou auna ia idobi giroto naramio sosoro  
gabo ato. Isipi urubia ro nou idobi  
ta-gemewidiro-rimo, ina nou idobi kioto ower  
nato gorobodorai eputa dubu moto ato  
na-gorowomidiro edi urubia sirio ro neio ro iato  
girowai-rimo.

<sup>3</sup> Nou ro iato gutura naramio aboto, 'Mo  
masiro Iosepa ie. Mo abera modobo ato  
a-womidiro ra?'

Nou naramio ro na-girowai-rimo nou beda  
sosoro ower to garo neio ro modobo pua nou  
owera wisa samo to kemowameai aboto, mabu  
neio auna tere ro giwati.

<sup>4</sup> Taie Iosepa ro ibo neio aboto, 'Nirimagare  
peteibi mo aboto aupise dosioma-birimo.' Taie  
neio nou aboto aupise iato gosioma-rimo.

Nou ro iato gimowapotai ibo, 'Mo nou e nio neama naramu. Mo masiro Iosepa. Mo nio ro na-nawoto-rimo ata sabowa mere sosoro ie Isipi duriomoro to mo nou e.

<sup>5</sup> Kaupoti mo beda sosoro na-woto-rimo nou sapuwo to nio kimaragoidiro ubauba iwia ate, ibose nio nakara se eremosurupo ate. Nedi tanaro ro na-gororosoidiro mo Godi ro nemeiriai-ro keba gabo moro to urubia sogoi pamo aboudo iwataatei ri.

<sup>6</sup> Abora netewa teibo kisimisi ta-goroporeai-do nedi duriomoro nato, pari ohona mea se isuwoduti pua, ina arua 5 kisimisi tiamo-die, urubia pari ohona ibouti-ri pua, idabuti-ri pua, imese duriomoro gebari nou ororo ia se ama-owamotiti-ri,

<sup>7</sup> Ina nou do ie nio sapuwo to mo Godi ro nemeiriai-ro keba moro to nio aramio merebusere sirio irowomidiroitiwai ri, Godi ro edi pupuwo tanaro ro ta-gitamuai kisioidiro.

<sup>8</sup> Ina ibo pua mo nio ro kemeiriai neito Godi nakara se mo nou ro nemeiriai-ro. Abora Pero edi namabu sirio ro, mo nou namabu abera to nararasoro. Isipi duriomoro gebari mo ro niauri, mo Godi ro ohu to ta-nowioidiro. Nou edi moto gebari ro mo ro nemeauri, mo keba dubu nou e.

<sup>9</sup> Nio abora neido ba-dasiriai-mo hio ito! Idau ibo ba-demowapotai-mo, "Oro mere Iosepa ibo utura-die 'Mo Godi ro auna gabamani to ta-nowomi Isipi duriomoro ato. Oro mo aboto samo ito ba-dodori-ro,

<sup>10</sup> oro Goseni duriomoro ato ama-omidiro-ri, mo gomo ato. Oro aramio merebusere, oro ia, oro sipisipi, nanigosi, burumakau, oro beda

mutu nakomu ra aise ba-diaubai-ro.

<sup>11</sup> Oro mo ro nato nama-iaurititi-ri nedi 5  
kisimisi ro na-wou-dioumo sogoi kisimisi. Idaibo  
sosoro oro aramio merebusere, oro sowake  
urubia, kiwoubua namabu, daro oro ia modobo  
pua sogoi ro kiwati.' "

<sup>12</sup> Nio ro mo abora simara idomari to  
ti-niauri-dumo, ibose mo Beniamini ro  
ti-niauri-die, mo abora nedi dubu ro na-naro nio  
aboto oweru mo Iosepa ie.

<sup>13</sup> Idau ba-demowapotai-mo ibo mo abora  
auna to nomidiro ibose Isipi duriomoro mo ro  
niauri. Nio ro ba-demowapotai-mo etou tanaro  
giauri-rimo nato. Nio abora dasiriai-mo, nou  
ba-dadabuai-rimo neito samo to ba-dowou-rimo  
mo aboto.'

<sup>14</sup> Taie Iosepa nou neido na-gosiomai  
Beniamini nou ro aise gohiai idobi iato  
gemerete. Beniamini ro ibose naramu  
ta-gemerete idobi.

<sup>15</sup> Taie naramio Iosepa ro iato giohi ina iato  
gisome, ata kohiai iato kosomea ie neito  
gorowati idobi mutu. Taie naminiramio kaupoti  
moro to na-garadabuai-rimo oweru iato  
geremowagomea-rimo. Taie.

*Pero umoro goi Iosepa naramio sapuwo to*

<sup>16</sup> Pero nou simara gabamani urubia mutu  
neio umoro na-goi-rimo Iosepa naramio  
ta-gou-diomo neio auna ia kamade ro giwati.

<sup>17</sup> Taie Pero ro nato gutura Iosepa aboto ibo  
nou naramio kimowapotai ibo, 'Nio namabu  
ba-dimidai-mo doniki ohu ato ba-ditomo-mo nio  
ba-dorowameai-mo Keineni duriomoro to.



<sup>18</sup> Nio abera negere ba-dowou-rimo ibose nio upi merebusere mutu neito atu se ba-dou-rimo. Mo ro mea goto kere nou nama-imia-ri nedi Isipi duriomoro ro nato. Nio nato meamea ia ohona amadimi-ihotiti-ri.

<sup>19</sup> Nio ro gabo ato koroho namabu ba-dimidai-rimo, nio upi merebusere kiowiti sapuwo to, ibose nio abera oromano ba-dowameai-rimo neito mo aboto.

<sup>20</sup> Nio kimaragoidiro tato se beda sosoro nakomu ra neito kiwou tato, idaibo namabu nato tiamo sirio ie Isipi duriomoro ato.'

<sup>21</sup> Taie Isiraere dubu mere sirio ro edi tanaro neio ro aise gosioidiro-rimo ina Iosepa ro iato gimapoi-ibi gabo ato koroho namabu, Pero oweraga gabo modobo. Nou ro ibose ipi gabo ato kiho ohona iato gimiai-ibi.

<sup>22</sup> Iosepa ro ibose naramio ta-gimio kiroidiro namabu iworohuti na, Beniamini gomio sirio kiroidiro namabu 5 obotama 5 sodo, ina auna mani iato gimowateai nou ro,

<sup>23</sup> ibose nou abera negere aboto 10 dubu doniki nou gimeriai Isipi duriomoro rido. Nou ro meamea namabu baikto to ta-gemodiowado, nou gemaremuti doniki ohu ato, ibose nou ta-gimeriai 10 upi doniki. Neio kono baikto, parawa baikto, ibose arua Iakobo ipi gabo ato ihona nou Isipi to kou ato ohona iedi 10 upi doniki ro Iakobo nou mutu gemowou-rimo.

<sup>24</sup> Taie Iosepa ro nou naramio aboto asiriai-ri iato gutura. Naramio ro Isipi duriomoro na-gemeserai-rimo nou ro neio iato gimowapotai ibo, 'Nio ipi ato eremaro ate

dorogora se ba-dou-mo womu tato korowateai.'

*Iosepa naramio a-gou-rimo abera adabuai ri*

<sup>25</sup> Iato Iosepa naramio Isipi duriomoro iato gemeserai-rimo neio abera aboto imese giodori-ro Keineni duriomoro to.

<sup>26</sup> Nou owera neio ro iato gemowauti-rimo, 'Iosepa araburai pua nou tomidiro. Nou abora auna gabamani to omidiro Isipi duriomoro ato.'

Neio abera keba se aborabora ro gorobai, nou ro mea se imibiria pua edio owera ro.

<sup>27</sup> Kaupoti nou naramio ro mea se iato gemowauti-rimo Iosepa ro beda sosoro owera to garo neio aboto. Isiraere iato na-giraroweauti nou ro gabo ato koroho nakomu neio se giauri iedi namabu ro Iosepa ro gimeriai-die nou kowameai sapuwo to Isipi duriomoro to, nou iato keremiro pupuwo neito geremowai.

<sup>28</sup> Isiraere ro ibo, 'Mo abora se nimibiria nio owera. Mo mere Iosepa morobise tomidiro. Mo ido karaburai modobo pua keba se mo ro modobo ie nou sosoro woidomari kemowea.'

## 46

*Isiraere Keineni duriomoro a-gemeserai Isipi to gou-ro*

<sup>1</sup> Isiraere, nou ata masiro Iakobo, nou beda mutu namabu patu ra nou ro na-giwoiriamuti na-gimododiawado taie imese gaimai-ro Isipi to.

Taie nou Besiba ato aise gororodiobo, nadi iato aise gitomuti, sipisipi nou ro keribai iato gemopia, lawe imese gemematowo.

<sup>2</sup> Iedi duwo ro nato Godi ro ibo, 'Iakobo!  
Iakobo!'

Ina Isiraere ro nato gemowameai, 'Mo nou e,  
oro etou ri ra?'

<sup>3</sup> Taie Godi ro ibo, 'Mo Godi ie, mo ata masiro  
Ere ie, oro abera ro na-nemowabutititi, mo nou  
e. Oro tere eremati ate Isipi duriomoro to  
nama-ou-ri mabu oro edi duriomoro ro neito  
nama-ou-ri oro aramio merebusere sirio mo ro  
anama-emowaititi-ri.

<sup>4</sup> Oro nama-ou-ri Isipi to, mo mutu atu se  
namado-ou-ri. Oro iato nama-imidirotiti-ri oro  
anama-iaurititi-ri, ina ioudo  
anamadi-owameai-ri. Oro nama-araburai-ri  
Iosepa se ama-owaibia-ri, nou ibose to  
ama-omidiro-ri oro mutu.'

<sup>5</sup> Ata kowaroho Isiraere Besiba aise gemeserai  
nou imese gou Isipi to. Pero ro gabo ato koroho  
namabu sirio na-gimemeiriai-ro neio aboto  
Isiraere dubu mere sirio ro imese namabu neio  
ro neito ta-giaremuti-rimo, ibose neio upi  
merebusere idau Isiraere ia neito  
ta-gorowiti-rimo.

<sup>6</sup> Neio beda mutu nakomu giworohuti-rimo  
kiwoubua namabu Keineni duriomoro ato  
na-giworohuti-rimo imese giwou-rimo Isipi to.

<sup>7</sup> Isiraere idaibo sosoro gou Isipi duriomoro  
ito, nou merebusere aramio neio mutu atu se  
gou. Taie.

<sup>8-15</sup> Isiraere nou Isipi to na-gou simara aramio  
merebusere mutu nou neio masiro ie. Neio  
Mesopotamia duriomoro ato girotuti-rimo  
mamio ro.

Isiraere ro Ria mutu neitiro aramio  
merebusere imese 33, nou neio masiro ie.

Isiraere Rubeni garasomai, nou keba mere ie. Ina Rubeni ro 4 dubu mere girasomai-bi, neibi masiro Hanoki, Paru, Hesoroni, Karami. Simioni ro dubu mere sirio girasomai, neio masiro Iemuere, Iamini, Ohada, Iakini, Sohara, Saura. Saura mamu Keineni duriomoro besere ie. Riwai ro dubu mere Peteibi girasomai-ibi, neibi masiro Geresoni, Kohata, Merari. Iuda ro dubu mere girasomai-bi neibi masiro Eri, Onana, Sira, Peresi, Seraha. Kebabase Eri ra Onana ra neitiro Keineni ato gorowaburai-rido. Ina Peresi ro girasomai-ma netewa teibo dubu mere teibo Hesoroni ra Hamuru ra. Isaka ro dubu mere girasomai, neibi masiro Tora, Pua, Iasubu, Simironi. Seburuni ro dubu mere Peteibi girasomai-ibi neibi masiro Sereda, Erona, Iaharere. Iakobo ibose ta-garasomai besere Ria ato nou masiro Daina.

**16-18** Iakobo Siripa mutu neitiro aramio merebusere imese 16 nou neio masiro ie. (Siripa nou Rebeni sowake orobo ie, nou ro nou besere Ria nou aboto gaiwai sowake oroho na.) Gadi ro dubu mere girasomai neio masiro Seponi, Hagi, Suni, Eseboni, Eri, Arodi, Areri. Asere ro dubu mere girasomai-bi Imina, Isiwa, Isiwai, Beria. Neibi medera Serahi. Ina Beria netewa teibo dubu mere teibo girasomai-ma Hebere Marikiere mutu.

**19-22** Isiraere Rasere mutu neitiro aramio merebusere 14, nou neio masiro ie. Rasere ro netewa teibo dubu mere teibo giroto-ma Iosepa ra Beniamini ra. Iosepa ro netewa teibo dubu mere teibo girasomai-ma Manase ra Eparaimi ra, nou Isipi ato na-gomidiro. Asenati Potipera

besere ie nedi dubu mere teibo ro nou ro giroto-ma. Oni sabowa ato tarena namabu kiamo moto ato Potipera iato isioidirotiti woko. Beniamini ro sirio dubu mere girasomai neio masiro, Bera, Bekere, Asabere, Gera, Namana, Ehi, Rosa, Mupima, Hupima, Arada.

<sup>23-25</sup> Isiraere Biriha mutu neitiro aramio merebusere imese 7, nou neio masiro ie. (Biriha nou Rebeni sowake orobo ie, nou ro nou besere Rasere nou aboto gaiwai nou sowake oroho na.) Dani ro mere garasomai nou masiro Husima. Napatari ro dubu mere girasomai-bi Iahasiere, Guni, Iesere, Siremi.

<sup>26</sup> Neio imese sirio se kidabuai ato Iakobo edi aramio merebusere ro Isipi ito na-gou-rimo imese 66. Iakobo eteamio neio mutu idabuai pua kioputi to.

<sup>27</sup> Iosepa ro netewa teibo dubu mere teibo Isipi duriomoro ato ta-girasomai-ma. Neio imese sirio se kidabuai ato Iakobo ia mutu imese 70.

### *Iakobo a-gorowateai Isipi to*

<sup>28</sup> Isiraere ro Iuda gemeiriai keba se Goseni duriomoro to, Iosepa mutu ororowea rie. Goseni moro kainai Isipi duriomoro ato owamo. Isiraere nou aramio merebusere mutu neio na-gorowateai-rimo Goseni to,

<sup>29</sup> Iosepa isana nou gabo ato koroho nakomu nou ro ta-gemododiai nou iato gou nou abera owea-ri nedi moro ro nato. Taie nou abera na-gowea nou ro iato aise gohiai, auna ia idobi neito gorowati.

<sup>30</sup> Isiraere ro iato gutura, 'Oro sosoro woidomari mo ro abora se noti nemowea, taie iato mo ata kimaragoidiro tato se

anama-araburairi. Mo ibose to  
nimaragoidiroiti oro ta-garaburairi, mo abora  
umoro ta-noi mo ro simara idomari to ta-nowea  
oro tomidiro.'

<sup>31</sup> Iato Iosepa naramio aboto, ibose neio beda  
urubia mutu gou-rimo neio aboto, nou ro iato  
gutura, 'Mo abora anama-ou-ri eputa dubu  
aboto, nou anama-emowapotai-ri ibo, "Neio  
ta-orowateai-rimo mo aboto, Keineni duriomoro  
ta-wemeserai-mo neio abora karaho ta-woi-rimo  
neito.

<sup>32</sup> Neio sipisipi kimowotoi urubia ie neio  
kaupoti woko nou isioirotiti-dumo. Ina neio ro  
ta-iwou-rimo sirio sipisipi nanigosi burumakau  
imese beda mutu kiwoubua namabu patu ra."

<sup>33</sup> Nou ro oweri nama-emeirai-ri nio ou-ri  
nou aboto, nio nou ro nama-iratodai-ri ibo, "Nio  
beda woko isioirotiti-dumo?"

<sup>34</sup> nio ro ba-demowameai-mo, "Oro sowake  
urubia nimo, sipisipi nanigosi burumakau nou  
kimowotoi woko nisioidiroiti-dumo, ina iedi atu  
woko ro nimo abeamio nasaio neio ro  
ta-wisioidiroiti-mo idaibo woko." Nio ro idaibo  
sosoro oweri namadima-aro-ri nio eputa dubu  
ro gabo ama-imagerai-ri, nio Goseni ato  
amadimo-omi-ri iato ama-irowomidirotiti-ri.  
Isipi urubia abato nio iato orowomidiro-ri pua,  
mabu neio ubi tato ia ie sipisipi burumakau  
kimowotoi urubia neio mutu atu moro ato  
korowomidiro.'

## 47

### *Iosepa urubia Pero aboito gou-rimo*

<sup>1</sup> Iosepa iato gou eputa dubu aboto nou ro iato  
gemowapotai ibo, 'Mo urubia ta-orowateai-rimo

Keineni duriomoro rudo neio torowomidiro-die Goseni ato. Neio ro ta-iwou-rimo sipisipi nanigosi burumakau daro imese beda mutu namabu sirio ra Keineni ato neio ro na-iworohutiti-mo, imese aise giaubai-diomo bame gedea-diomo neito.'

<sup>2</sup> Taie Iosepa ro 5 naramio iato gieribai-bi, imese giwou-bi iato, giwapotai-bi eputa dubu aboto.

<sup>3</sup> Eputa dubu ro neibi iato giratodai-ibi, nou ro ibo, 'Nio beda woko isioidirotiti-dumo?'

Ina neibi ro ibo, 'O nimo aramio nogenoge abeamio neio kiwoubua namabu kimowotoi woko isioidirotiti-mo. Ina nimo oro edi sowake urubia ro nimo idaibo sosoro woko abora nou nisioidirotiti-dumo.

<sup>4</sup> Nimo neito na-nou-diemo ibo pua apira kou, nimo neito karaho noi-diemo abora nato nama-irowomidirotiti-ri. Keineni duriomoro ato na-nirowomidirotiti auna sogoi tau nou gereredeadea nimo kiwoubua nakomu sugamuso tato ie ibose nimo ia kiho nakomu pоторо ie nou do ie nimo karaho koi Isipi duriomoro to. Oro ro modobo ra nimo ata moro ata kimapoi Goseni ato, nimo nato nama-irowomidirotiti-ri?'

<sup>5</sup> Ina eputa dubu aise gerewesegerai Iosepa aboto, nou ro ibo, 'Oro abera naramio mutu ta-wou-rimo oro aboto.

<sup>6</sup> Oro ro ba-dimapoi mea ia goto kere bato owamo neio nato ba-mirowomidiro. Neio modobo ie Goseni duriomoro ato komidiro. Neio arua urubia kiwoubua namabu auna umoro mutu na-worowomidiro neio mo ro woko anama-imio-ri modi kiwoubua namabu ro nou namadimi-imeauri-ri nato.'

<sup>7</sup> Taie iato Iosepa abera Isiraere nato gowou-ro eputa dubu aboto. Nou ro iato gowapotai eputa dubu aboto, 'Nou mo abera ie.'

Taie Isiraere ro Pero korosa iato gomia.

<sup>8</sup> Eputa dubu na-gerewesegerai Isiraere aboto, nou ro iato garatodai, 'Oro beda mutu kisimisi ra?'

<sup>9</sup> Ina oromano ro ibo, 'Mo kisimisi sipu pua. Mo edi koroho na-nirohotiti mo giropu mibo mutu nirohotiti. Mo kisimisi womu owamo ibo 130 kisimisi. Mo abera aramio nogenoge neio tuturu tau to ta-irowomidiro, mo ibo pua neio sosoro.'

<sup>10</sup> Taie Isiraere ro eputa dubu korosa ina iato gomia, ina eputa dubu nou ro iato aise gemeserai.

<sup>11</sup> Eputa dubu edi owera na-garo Iosepa aboto nou ro aise gosioidiro. Nou ro nou urubia mea ia komidiro duriomoro iato gimia, edi duriomoro ro nou ro na-gimia ata auna sabowa masiro Ramasese nou gomo ato gowamo.

<sup>12</sup> Taie nou urubia iato na-gorowomidiro ohona baiko se iato gimio neio ihona erere tau ato simara modobo ato gimio. Taie.

### *Isipi urubia sogoi ro giwati*

<sup>13</sup> Isipi duriomoro ato auna ia sogoi ro giwati, nedi duriomoro gebari ro imese ororo ia se gowamo imese nakomu iato isuwodutiti pua. Keineni duriomoro ato atu tanaro ibose ti-gororosoidiro, io urubia ohona tato se irowomidiro.

<sup>14</sup> Iedi tau ro nato Isipi urubia Keineni urubia mani mutu irohotiti-mo Iosepa aboto ohona



ioudo imadetiti-mo ina iedi mani sirio ro Iosepa ro aise idabutititi kaupoti moro to Isipi eputa dubu nou sapuwo to.

<sup>15</sup> Taie iedi urubia ro neio mani na-iworohotiti-mo Iosepa aboto neio ohona ioudo imadetiti-mo, iato ibo wirowatiti-mo neio womu tato urubia sirio mani ti-giporeai-rimo ohona kimade to.

Taie urubia imese gou-rimo Iosepa aboto mabu neio mani tato ie ohona imade na. Neio ro iato gutura-rimo nou aboto, 'Nimo modobo ie oro ro ohona to kiwarebai mabu nimo abora mani pоторо ie. Nimo abora tu kawakawa norowomidiro. Nimo oro ro kiwarebai tato nimo imese sogoi ro anama-iwatiti-ri, oro idomari gabo ato anamadimo-orowaburo-ri.'

<sup>16</sup> Iosepa ro iato gimowameai neio, 'O morobise ra nio abora mani tato ie. Abora nio mo owera se dirowidiro-rimo, beda mutu kiwoubua namabu ro oroho-dumo nio abato ba-diwow-rimo neito, anamadime-eremahudirio-ri mo mutu. Nio kiwoubua namabu kiwow ato mo aboto nio wisa na ohona nato kimio ie, idaibo sosoro namadimo-orowatititi-ri.'

<sup>17</sup> Urubia ubi aise goi-rimo idaibo tanaro kisioidiro aboto. Taie neio iato simara kiwoubua namabu nou giworoho-rimo Iosepa aboto, wisa nou ro neio ohona gimio ibo geremahudirio-rimo neio. Idaibo sosoro tanaro neio ro na-isioidirotiti-mo urubia sogoi tato ta-irowomidirotiti kaupoti kisimisi to, womu tato neio kiwoubua namabu sirio imese ti-giporeai-rimo kiworoho Iosepa aboto.

<sup>18</sup> Taie neio ina nato gou-rimo nou aboto, neio ro ibo, 'Oro umoro ie nimo mani oro ro ta-niwoporeai abora ata mani ata nimo abato irarowo pua, nimo abora kiwoubua namabu oro ro ta-niwoporeai, ata kiwoubua namabu ata nimo abato eremeserai pua, oro abato toroho-dumo. Auna dubu, abora nimo ia kawakawa ro norowomidiro, nimo ro kaupoti a-nirobidiro-dumo simara goto kere.

<sup>19</sup> Nimo modobo pua oro idomari gabo ato sogoi ri anamadimo-orowaburo-ri. Nimo goto kere idaibo urubia tato ama-iamotiti-ri. Nimo goto kere oro aboto abora anamadimi-iaiwai-ri, anamadime-eremahudorai-ri nimo wisa oro ro ohona anamadi-imio-ri goto kere oro ro ba-dirahidimai. Ibose nimo durupi anamadimi-iaiwai-ri eputa dubu aboto, nou woko namadime-emesioidiro-ri ata wisa tato se. Nimo kibouti na woiti iopu ba-dimio-ro pari anamadimi-isioidiro-ri. Nimo ubi tato ie goto kere dorogora se kiamo kawa kiamo.'

<sup>20-21</sup> Iato Iosepa ro Isipi urubia sirio aboudo goto kere iato gimade ohona to, eputa dubu ro aise girahidimai. Mabu iedi tau ro nato sogoi imese ata sosoro mino to gereredea urubia imese ubauba aise gorowomidiro ohona tato. Neio goto kere beda tau ato giasouti-rimo eputa dubu aboto, nou ro aise girahidimai, ibose imese sirio Isipi urubia neio nou woko emesioidiro-ri-mo sowake urubia to wirarasoro-mo.

<sup>22</sup> Beda urubia ro iaurititi-mo tarena namabu neio iedi goto kere ro iwamade pua, mabu edi eputa dubu ro neio mani ta-imiotiti edio woko

ro na-isioidiro-titi-mo nou sapuwo to. Neio edi mani ro neito imadetiti-mo ohona neio simara goto kere ato modobo ato nato irowomidiro-titi.

<sup>23</sup> Taie Iosepa iato gutura urubia aboto, 'Abora nio imese sirio urubia goto kere mutu mo ro ta-niwamade, eputa dubu irahidimai-ri. Woiti iopu nou e, ba-dibouti-rimo simara pari ato. Iedi woiti ro neio namadimi-isuwoduti-ri mea mino to.

<sup>24</sup> Woiti namadimi-idabuti-ri neio kiroromai tau ato oro ro kiaremuti ato 5 soirio nou gi-isioidiro-ri. Kaupoti soirio oro ro Pero nou giemowou-ri. Arua 4 soirio oro kiwameai modobo ie simara moto to, oro upi merebusere neio ihona ie, arua iopu pepea na girobidiro-ri.'

<sup>25</sup> Urubia ro ibo, 'O Iosepa nimo sogoi ro aupi ia se ie kiwaburai, nimo korowaburai moro rudo oro ro niwameai-die. Oro nimo aboto meamea tanaro ta-isioidiro-titi, nimo Pero sowake urubia to namadima-ararasoro-ri, wisa tato woko anamadime-emesioidiro-titi-ri.'

<sup>26</sup> Taie Iosepa ro iato sabi aise gedea Isipi duriomoro ato. Oro pari namabu kiwou ato ioudo oro ro 5 soirio kisioidiro modobo ie keba se, na-isioidiro 5 soirio, 4 soirio oro kidabuti ato oro do ie. Kaupoti soirio Pero nou giemowou-ri. Iedi sabi ro abora owamotiti. Kaupoti beda urubia ro iaurititi-mo tarena namabu neio edi goto kere ro Pero ro iwamade pua, neio do ie.

*Isiraere ower a garo karaburai sapuwo ato*

<sup>27</sup> Isiraere aramio merebusere mutu iato imese wimidiro-titi-mo Goseni ato imese tuturu tau to. Goseni Isipi duriomoro ato owamo. Neio iato na-irowomidiro-titi-mo sirio namabu

geremowoiriamuti-rimo, ibose neio sipu tato  
aramio merebusere mutu gou-rimo Keineni  
duriomoro rido, ina aramio merebusere sirio  
iato giwia-rimo.

<sup>28</sup> Isiraere ta-imidirotiti aramio merebusere  
mutu 17 kisimisi to Isipi duriomoro ato, nou 147  
kisimisi iato girobai, nou oromano ia ta-goi.

<sup>29</sup> Taie Isiraere nou na-geremasibai ibo nou  
karaburai muso pua, nou ro mere dubu Iosepa  
iato gorumai nou aboto ou ri. Nou ro ibo, 'Mere,  
oro tu neito ba-dowaumia-ro mo oroisia maumo  
to, oro morobise owera daro-ro mo  
nama-araburai-ri mo oro ro nato emoba-ri pua  
Isipi duriomoro ato.

<sup>30</sup> Mo karaburai ato mo oro ro neido  
ba-dowameai-ro Isipi duriomoro rido mo simara  
duriomoro to, mo aramio nogenoge bato irobu  
ito ba-dowameai-ro iato ba-demoba-ro.'

Mere ro ibo, 'Idau, oro beda owera aro-die mo  
ro anama-osioidiro-ri.'

<sup>31</sup> Abera ibo, 'Oro morobise owera daro-ro!'

Taie Iosepa ro idaibo sosoro owera garo abera  
aboto. Isiraere nou edi gonopu to na-iradioutititi  
neito aise girimomua, taie Iawe iato gemowabu.

## 48

*Iakobo ro korosa gimia-ma Iosepa mere teibo*

<sup>1</sup> Iosepa umoro ta-goi nou abera temeteme ro  
na-gorobai-rimo nou durupi ubauba se gowamo.  
Taie Iosepa mere teibo nato giwaboi-marou nou  
abera negere aboto, Manase ra Eparaimi ra.

<sup>2</sup> Nou ro na-giwaboi-marou ina neibi  
na-gorowateai-birimo moto to, taie ata dubu ro

ibo Iakobo ato, 'Oro mere Iosepa totoi-die oro owea ri ou-die.'

Isiraere edi tau ro nato nou durupi egea se gowaibitiwado, pupuwo tato ia se gowamo, hio ito kerebua modobo pua keta rido. Taie nou pupuwo kainai na-gowea umodi to mere imese gerebua-ro

<sup>3</sup> nou iato gutura Iosepa aboto, 'Imese pupuwo ia Godi nou ro gorowapotai-ro mo aboto Rusi ato Keineni duriomoro ato na-owamo, mo nou ro korosa iato nomia.

<sup>4</sup> Nou ro ibo a-garo mo aboto, "Oro mo ro sirio aramio merebusere anama-omio-ri, ibose oro auna abera to ama-ararapoi-ri sirio erere oweru urubia oro aboudo amadimo-orobodorai-ri. Oro aramio merebusere mo ro anama-imasouti-ri nedi Keineni duriomoro ro neio nato ama-irowomidiroiti-ri womu tato womu tato to."

<sup>5</sup> Oro mere teibo Isipi ato gohau-rido mo ido norowateai-ro neito, abora mo ro a-nutura neitiro mo ia simara mere teibo neitiro to anama-iapoi-mari, Rubeni ra Simioni ra beda sosoro ra mo mere teibo ie, Eparaimi ra Manase ra neitiro mo ro abora mo mere teibo to niapoi-ma.

<sup>6</sup> Oro arua merebusere ido nama-iwia-ri io oro merebusere ie kaupoti neio aramio merebusere simara goto kere irahidimai-ri pua Keineni duriomoro ato, Manase ra Eparaimi ra neitiro edi aramio merebusere ro neio ro amadimi-imasouti-ri neio goto kere.

<sup>7</sup> Mo keba tau ato Mesopotamia duriomoro rudo na-nou-ro Eparata sabowa nemou-ro oro mamu buro ipi ato iato garaburai Keineni

duriomoro ato. Nou na-garaburai mo auna kamade tato ta-noi, taie mo ro nou bobo to aise nedeia Eparata gabo kakate ato.' (Eparata ata masiro Beterehema.)

<sup>8-10</sup> Iedi tau ro nato Isiraere nou idomari teibo timotimo ta-go-i-rido, nou mea se kirarowo modobo pua, nou oromano ia ro ta-gorobai. Nou na-giraroweauti Iosepa mere teibo se giwia-ma, nou ro ibo, 'Beda mere teibo ra nou?'

Ina Iosepa ro iato giwapotai-ma abera aboto, 'Mo Isipi duriomoro ato na-nimidirotiti mo Godi ro nato nomia-ro nedi mere teibo ro.'

Abera ro ibo, 'Neito ma-diwosiomai-maro mo aboto mo ro korosa anama-iwai-mari.'

Taie Iosepa mere teibo nou aboto nato giwosiomai-maro. Abera ro na-giohiai-ma nou ro iato gisome-ma,

<sup>11</sup> nou ibo, 'Mo ibo ta-nimaragoidirotiti oro mo ro ina owea-ri pua. Kaupoti mo Godi ro ta-nowou-ro neito oro sosoro owea ri oro mere teibo mutu.'

<sup>12</sup> Taie Iosepa mere teibo egea mere se giwosiomai-maro Isiraere aboudo Iosepa iato a-giroborea sopu to.

<sup>13</sup> Nou ro Eparaimi Isiraere edi pere sapuwo ro nato gowotobowa ina Manase Isiraere edi tumodi sapuwo ro nato gowotobowa taie imese giwou-maro aramunegere aboto.

<sup>14</sup> Isiraere iato tu teibo gararahodorai-rido nou edi tumodi tu ro Eparaimi eputa to gedea, ina nou pere tu Manase eputa to gedea,

<sup>15</sup> taie Isiraere ro Iosepa sapuwo to nou mere teibo korosa iato gimia-ma, 'Mo aramunegere Aberaham, mo abera Aisaki, neitiro Godi edi ubi

tanaro ro ta-isioidiro-titi-do. Mo Godi ro ta-nemowotoititi-ro mea mino to mo na-nimidiro-titi.

<sup>16</sup> Godi nou se ie mo imese ubauba aboudo nou ro nowatateawadotiti-ro. Nedi mere teibo ro nou ro korosa ba-mimia-marō. Mo edi masiro ro neitiro ro ba-mobodorai-do, ibose mo aramunegere Aberaham mo abera Aisaki neitiro edi masiro teibo ro neitiro ro ba-mibodoraititi-mado. Neitiro merebusere sirio ba-miwia-do nedi duriomoro gebari ro nato.'

<sup>17</sup> Iosepa ro na-gowea nou abera dubu edi tumodi tu ro Eparaimi eputa to na-gedea nou auna ubi tato goi. Nou abera negere edi tumodi tu ro nou ro na-gorobai nou ubi ie owagare ri Eparaimi eputa rido owatateai-rie Manase eputa to emedea rie,

<sup>18</sup> nou ro ibo abera aboto, 'Oro ro ubauba se osioidiro Idau, Manase mo keba mere nou e. Oro edi tumodi tu ro modobo ie nou eputa to kedea mabu tumodi tu owamo ibo nou pupuwo mutu e, korosa nou ato kiamo ie.'

<sup>19</sup> Isiraere ro a-gebeiomai, nou ro nato gutura, 'Mo mere mo umoro ie mo etou tanaro nosioidiro. Manase ibose nou auna anama-owai-ri mo ro. Nou merebusere sirio nou aboudo amadimo-orobodorai-ri. Kaupoti nou neama dubu ohu ia to nou ro amadi-omidiro-ri, nou aramio merebusere neio sirio erere owera urubia nou aboudo amadimo-orobodorai-ri.'

<sup>20</sup> Taie Isiraere edi saiki ro nato neitiro korosa aise gimia-ma ibo, 'Korosa idaibo kimio ato Isiraere urubia nama-orowomidiro-titi-ri neio ibo ba-miarotiti-mo, "Godi ro Eparaimi ra Manase ra korosa na-gimia-ma idaibo sosoro korosa nou ba-momia oro." ' Nou idaibo tanaro

nou gosioihiro neama a-gewesia nou ro keba to, naramu nou ro saro to gewesia-ro.

<sup>21</sup> Taie nou ro iato gutura Iosepa aboto, 'Mo ma-dowea-ro mo taie mo karaburai aupise ie. Oro Godi mutu ama-imidirotiti-ri, oro nou ro ama-owameai-ri nedi duriomoro neido.

<sup>22</sup> Mo ro goto kere ta-napoi oro aboto, oro naramio aboto mo ro idaibo goto kere apoi pua. Oro Sekemi moro Amore urubia edina na-niwasiri-ro boso ato, oro nou nemapoi.'

## 49

### *Iakobo Nou 12 Dubu Mere Korosa Gimia*

<sup>1</sup> Taie Iakobo dubu mere sirio aboto owera iato gimeriai neio nou aboto ou ri. Neio na-gorowateai-rimo nou aboto, nou ro ibo, 'Mo aboto aupise neito morowoiriamuti-ro. Beda tanaro ro amadimo-ororosioihiro-ri nio aboto mo ro nou nama-iwauti-ri.

<sup>2</sup> Nio imese sirio se dosiomai-rimo aupi se, mo owera gare se demedea-rimo.

<sup>3</sup> Rubeni oro mo keba mere ie, mo dubu rido narasomai oro. Oro niramio ro keba to iauri-dumo, imese pupuwo ia oro abato iamo.

<sup>4</sup> Oro obo sosoro iadodiroiti-ro, oro irorodiobutiti pua. Niramio oro ro iworohutiti-ri pua mabu oro mo orobo mutu ta-girobu-ma, mo oro ro siripo ta-nowai idaibo ubauba tanaro na-gosioihiro.

<sup>5</sup> Simioni ra Riwai ra atu tanaro ie nitiro, serawo sobosobo gipouti-rido giri susura to urubia neito giopiauti-rido.

<sup>6</sup> Nitiro piro se namadi-iworohuti-ri owera, mo nitiro aboto aradabu-ri pua. Nitiro serawo



na-goi-rido urubia sirio aise giopiauti-rido, ina burumakau sairo sumi dorogora se giwasiouti-rido.

<sup>7</sup> Nitiro serawo imese koko ia ie, edi serawo ro nou ro ama-iwai-mari nitiro ubauba. Nitiro aramio merebusere simara duriomoro ato orowomidi-ro-ri pua, mo ro Isiraere duriomoro gabogabo neito anama-ihoduti-ri.

<sup>8</sup> Iuda oro naminiramio ro masiro amadimo-owouburiotiti-ri, oro aboto neio amadimi-iroboreautiti-ri. Oro nasa rubi serawo namadimi-iworohutiti-ri oro aboto, oro ro wagoha to ama-itutiti-ri.

<sup>9</sup> Oro serawo tumu na sosoro ie, oro ometa koroho ato oro tumu na kopia ato aise kouho ie, kamidimai ato tama ra dao ra iato kimasiti ie. Ata ro koriomai modobo pua.

<sup>10</sup> Oro aboudo amia urubia eputa rubi to neio ro ama-irowomidirotiti-ri, womu tato morobise eputa dubu nama-omi-ri. Imese sirio urubia erere oweru to namadimi-iarotiti-ri nou ubi tanaro amadimi-isioidirotiti-ri.

<sup>11-12</sup> Iuda, oro aramio merebusere duriomoro ato kiho ota iopu sirio amadimi-isuwodutiti-ri, neio ro nakara se modobo pua kiho aboto, ibose kiwoubua namabu atu se neio mutu amadimi-ihotiti-ri. Tuba sosoro obo imese sirio ia ie oro aramio merebusere nakara se kidio modobo pua, ina urubia obotama neido kiwiouti modobo ie. Neio tuba sosoro obo amadimi-idiotiti-ri womu tato kiamidimawado, ina ibose burumakau nono isi amadimi-idiotiti-ri womu tato neio kiamidimawado.

<sup>13</sup> Seburuni oro aramio merebusere buru oromo bara ato ama-irowomidirotiti-ri womu

tato Sidoni sabowa kowasomai. Iedi buru oromo bara nato urubia ro sawa pe sirio ibi to amadimi-iairiodirotiti-ri.

<sup>14-15</sup> Isaka oro pupuwo doniki sosoro ie. Oro aramio merebusere mibo nakomu amadimi-iworohutiti-ri. Beda moro mea kowea ra neio sebesebe nato aise keremasebidiro ie. Ina ioudo iato kerebua ie mibo nakomu mutu kare rubi sosoro amadimi-iworohutiti-ri.

<sup>16</sup> Dani, oro aramio merebusere ro urubia korowomidiro muro mea mino to neio ro amadimi-imotuputititi-ri.

<sup>17</sup> Oro gabo bara ato serawo bagawe sosoro ama-orobutiti-ri. Urubia dubu hosi to kou ato, oro ro hosi obo nupu ato kagegeai ato, urubia dubu huru to karakukua ie.

<sup>18</sup> Iawe mo ubi ie mo oro ro ubauba aboudo kowatateai.

<sup>19</sup> Gadi oro aramio merebusere boso rubi ro kowaroho duwoduwo ato amadimi-imataumotiti-ri, kaupoti neio oro urubia ro amadimi-ibodoidirotiti-ri.

<sup>20</sup> Asere oro aramio merebusere neio duriomoro ato meamea ohona amadimi-isuwodutiti-ri, eputa rubi edi ohona ro na-ihotiti-dumo iato ama-iamotiti-ri.

<sup>21</sup> Napatari oro orobo dia sosoro ie, tumu ato mea mino to ama-irarioidirotiti-ri, meamea sosoro dia kainakaina nou ama-irotutiti-ri.

<sup>22</sup> Iosepa oro ota sere sosoro na-wotoi obo sosu abato kiho ota iopu sirio mutu.

<sup>23</sup> Urubia ro oro serawo ri iona gari to amadimo-obotiti-ri.

<sup>24-25</sup> Oro Godi ro ama-omiotiti-ri pupuwo, ina nou ri urubia ama-imotoburiotiti-ri iona gari mea se ama-irobidirotiti-ri neio nato

ama-ibotiti-ri. Oro pupuwo ia Godi rudo. Nou mo ro nemowabutiti, nou mo pupuwo, nou urubia mea se imototoititi, Isiraere urubia iwasioutiti ubauba aboudo, oro nou ro ama-owarebidiroititi-ri ibo oro daroho amadi-ememeiriotiti-ri, obo sosu amadi-emowosuwodutiti-ri goto rudo, oro orobo merebusere sirio amadi-omiotiti-ri, ibose oro kiwoubua namabu sarupo kainakaina sirio amadimi-iroititi-ri.

<sup>26</sup> Ibose oro aramio merebusere idaibo sosoro ama-irowomidititi-ri. Godi ro podo gebarigebari korosa ta-giwai, kaupoti mo edi korosa ro na-niaiwai auna ia ie, tagara podo ta-irohodorai-ro. Nedi korosa ro ba-miamo Iosepa abato, naramio keba dubu to nou ro ararasoro.

<sup>27</sup> Beniamini oro tumu soka sosoro ie, kowaroho ato ohona binio to kiosora ie nou kiho ie, kiauमतowado ie, sirio adimo ato beda tumu na kiohi ra merebusere nou kimio ie.'

<sup>28</sup> Isiraere 12 gu sapuwo to Iakobo ro idaibo sosoro iana owera nou gimowauti, dubu mere gabogabo korosa iato gimio neio simara modobo ato.

### *Isiraere garaburai*

<sup>29-32</sup> Isiraere ro iato gimowapotai-ibi neio ibo, 'Nio kimeserai aupise ie mo ro. Mo nio ro ito ba-dowameai-rimo Keineni duriomoro to, goto masiro Makapera bobo goro iato taidiro, mo pamo durupi iato ba-dedea-rimo. Makapera towamo iato, Mamere sabowa ato saiki beda sapuwo rido idiawadotiti-die. Iedi bobo goro ro pari mutu atu se Eporoni Hiti gu dubu e keba se

nou aboudo gimidai Aberaham ro mani to. Aberaham ra Sera ra iato gibiria-marimo, ibose Aisaki ra Rebeka ra neitiro iato gibiria-marimo. Mo orobo Ria ibose ta-nibiria iedi bobo goro ro neito.'

<sup>33</sup> Iedi owera ro karo na-goporeai nou aise gutuwa. Tuturu to pua nou giropu gororo na-gutura-rimo iato aise gaimai. Taie.

## 50

### *Isiraere dubu mere gibiria-rimo*

<sup>1</sup> Iakobo na-garaburai Iosepa nou auna nirimagare goi nou aboto. Nou ro iato aise gohiai idobi imese gemerete, ibose pamo ato iato gosome.

<sup>2-3</sup> Taie Iosepa iato gutura pamo woko umoro urubia aboto, nou durupi neio ro mea mino to osioidiro-ri, mea meresini emaromori. Taie iedi umoro urubia ro neio ro Iakobo edi pamo durupi ro mea mino to goworohuti-rimo, modobo pua nou durupi hoho ro korobai daro kepusse aboto. Neio ro katahiti obotama to mea mino to taie iedi umoro urubia ro neio simara muro to gosioidiro-rimo ina neio ro edi durupi ro 40 saiki neito gemododiai-rimo, modobo pua nou kepusse aboto. Isipi urubia neio idaibo sosoro tanaro to iworohutiti-mo neio pamo urubia, 40 saiki nou durupi neito kemododia ie mea mino to. Taie Isipi urubia Iakobo pape na-irowomidirotiti 70 saiki neito wirowomidirotiti.

<sup>4</sup> Taie iedi pape ro na-goroporeai Iosepa ro nato gutura eputa dubu iedi gabamani urubia ro

neio aboto. Nou ro ibo, 'Nio modobo buro ra mo oweru kemowou eputa dubu aboto?

<sup>5</sup> Mo abera dubu karaburai aupise na-gowamo-ro nou ata oweru ta-gutura-ro mo aboto, ina mo ro morobise oweru ta-nutura ibo mo ro anama-owou-ri, mo abera dubu nou beda bobo goro gemododiai Keineni duriomoro ato iato nama-edea-ri. Eputa dubu ba-demowapotai-mo ibo "Mo kadodorai modobo ie, abera dubu pamo durupi nama-owou-ri ito iato nama-edea-ri, ina anamadi-orowameai-ri neito." '

<sup>6</sup> Taie eputa dubu ro na-girorowai edi oweru ro nou ro a-gutura-ro ibo, 'Nou beda morobise oweru garo abera aboto modobo ie aise kisioidiro. Ba-mowou abera dubu pamo ba-medea iato bobo goro to.'

<sup>7</sup> Taie Iosepa iedi oweru na-girorowai nou iato geremododiai, iato abera dubu durupi imese gowou. Sirio ia ro gou-rimo nou mutu imese aise garaubai, eputa dubu iedi gabamani urubia ro neio ta-garadabuai-rimo, Isipi awawo urubia sabowa edi urubia ro giauri-rimo neio ibose ta-garadabuai-rimo, Iakobo pamo durupi ibo gowaboi-rimo Keineni duriomoro to.

<sup>8</sup> Ibose Iosepa edi naramio ro neio ta-garadabuai-rimo, etio ro irowomidirotiti Iosepa mutu ibose etio ro irowomidirotiti nou abera ra naramio ra neio mutu Goseni ato iedio urubia sirio ro imese aise garaubai neio mutu atu se gou-rimo. Goseni ato merebusere kainakaina kiwoubua namabu neio kawakawa gimeserai-rimo.

<sup>9</sup> Arua rubi neio Iosepa mutu edina urubia ro na-gou-rimo neio gabo ato koroho namabu neito gou-rimo, arua urubia neio hosi to gou-rimo

<sup>10</sup> taie Keineni duriomoro to na-gorowateai-rimo, ata moro ta-ararasoro Atadi Iodeni oromo bara ato owamo, woiti takamai edina moro ato na-iamutiti-dumo neito gorowateai-rimo. Neito na-gorowateai-rimo taie Iakobo pamo durupi neio ro aise gedea-rimo iato gemerete-rimo. Iosepa pape 7 saiki to gomidiro iato.

<sup>11</sup> Ina Keineni urubia ro na-giwia-rimo edi tanaro na-gisioidiro-rimo Atadi ato neio ro ibo, 'Nedi Isipi urubia ro neio ro pape auna ia se emaragoidirotiti-dumo.' Ina edi moro ro neio ro nou ri giditi-rimo Eiboro Misiraim, ibo owamo Hiburu owera to 'Isipi urubia pape'.

<sup>12-13</sup> Ina Iakobo ro beda owera garo keba se nou pamo durupi sapuwo to nou dubu mere sirio aise gosioidiro-rumo. Taie neio ro nou durupi na-gowou-rimo imese gibiria-rimo Makapera bobo goro to Mamere abato na-owamo. Iedi bobo goro ro pari mutu Hiti gu dubu e Eporoni nou aboudo keba ia se Aberaham ro gimidai mani to.

<sup>14</sup> Taie Iosepa nou abera na-gibiria mea mino to, iedi tanaro ro imese na-goroporeai-rimo Iosepa etio mutu gou-rimo nou naramio arua rubi nou mutu na-gou-rimo ina neio ibose atu se imese gorowameai-rimo Isipi duriomoro to. Taie.

*Naramio Iosepa tere gemati-rimo*

<sup>15</sup> Iakobo na-garaburai nou wapo gabo ato iato Iosepa edi naramio ro neio nakara se nato geremowauti-rimo. Neio ro ibo, 'Etu umoro ra Iosepa nou serawo towamo nimo aboto, mabu nou aboto nimo ro ubauba ia tanaro ta-nisioidirotiti-mo. Etu mutu umoro ra nou wisa ubauba to kowameai nimo aboto.'

<sup>16</sup> Taie neio owera iato gemeiriai-rimo Iosepa aboto ibo, 'Oro abera ro nimo ta-nimowapotai nedi owera ro nou ido garaburai owera ibo ie,

<sup>17</sup> "Nio ro ubauba ia tanaro ta-gisioidiro-rimo nou aboto. Nio ro Iosepa ba-demowapotai-mo nou ro woki imimati ri." Ina abora oro aboto buro a-norowaro-dumo nimo beda ubauba tanaro nisioidiro-rimo oro ro nimo woki ba-dimimati-ro. Oro edi abera ro nedio urio ro na-emowabutiti ibose nimo nou ubi tanaro ti-nisioidirotiti-dumo.'

Nedi owera ro Iosepa ro na-gimidai nou auna idobi gedea.

<sup>18</sup> Iosepa naramio iato gou-rimo nou aboto neio iato giroborea-rimo nou sosoro gabo ato, owera iato garo-rimo ibo, 'Nimo oro sowake urubia to namadima-ararasoro-ri.'

<sup>19</sup> Kaupoti Iosepa ro iato gimowameai, 'Nio tere na ie! Mo Godi sosoro omidiro pua.

<sup>20</sup> Nio ubi ta-giamo mo ubauba owai ri, kaupoti Godi ro gewesegeruti edio tanaro ro meana to, nou ro gedea, nou ro nou mabu ato gosioidiro nedi tanaro ro urubia sirio nou ro sogoi ri korowaburo aboudo iwameai rie keremiro to, taie torowomidiro edi urubia sirio ro abora.

<sup>21</sup> Nio tere na ie, dosiomai-rimo mo aboto. Nio merebusere mutu mea mino to

anama-iworohuti-ri.' Nou ro beda owerā to gimowauti neio kamade aise goi-rimo. Taie.

### *Iosepa a-garaburai*

<sup>22</sup> Iosepa imese imidirotiti Isipi duriomoro ato naramio mutu womu tato nou 110 kisimisi ro na-gorobai.

<sup>23</sup> Nou na-imidirotiti Isipi duriomoro ato, nou mere Eparaimi merebusere ta-girasomai ina Eparaimi edi merebusere ro neio ro merebusere ta-girasomai-rimo. Iosepa mere Manase nou ro mere ta-garasomai masiro Makiri. Iosepa ro Makiri edi merebusere ro na-girasomai nou ro aise giahuruworo.

<sup>24-25</sup> Iato Iosepa naramio aboto owerā iato gemeiriai neio ou-ri nou aboto. Neio na-gou-rimo nou ro iato gimowapotai, 'Nio mo ro kimeserai aboto aupise ie. Nio aramio merebusere mutu Godi ro mea mino to ama-iaurititi-ri. Nou ro nio aramio merebusere ama-iwosuruwo-ri nedi duriomoro ro neido, ito ama-iwameai-ri Godi ro beda duriomoro gemapoi Aberaham Aisaki Iakobo neibi aboto. Mo sosoro gabo ato morobise owerā daro-rimo! Isiraere urubia Isipi duriomoro namadime-emeserai-ri mo soro ba-dimidai-mo Isipi duriomoro rido ba-diwameai-mo ito!'

Ina neio ro ibo, 'Nimo ro oro edi soro ro anamadimi-iwameai-ri ito.'

<sup>26</sup> Taie Iosepa 110 kisimisi to wimidirotiti nou iato aise garaburai. Taie pamo woko umoro urubia neio ro nou pamo durupi mea mino to na-gemododiai-rimo, meresini to kemaromo obotama to na-getebuti-rimo taie imese



gibiria-rimo pamo durupi bokose goro to. Iedi  
tanaro sirio ro iato gororosioidiro-rimo Isipi ato.  
Taie.

Keba keba tau ato tanaro patu beda sosoro to  
gororosioidiro-rimo nou totomu e. Taie.

CCX

**Tareka Buka**  
**Portions of the Holy Bible in the Bamu language of**  
**Western Province, Papua New Guinea**  
**Buk Baibel long tokples Bamu long Niugini**

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

---

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4